


常誦經咒合集

背誦手冊

金剛般若羅漢經 觀世音菩薩普門品 淨土品
維摩詰經 普賢菩薩品 禮佛八觀經 維摩詰經
般若羅漢經 多心經 佛說阿彌陀經 四攝經 淨土經
普門品 消災吉祥神咒 十方廣佛菩薩經 大悲咒
七佛滅罪真言 華嚴四十二名號 佛懺尊勝陀羅尼
觀音靈感真言 小吉祥天女咒 如意寶輪王陀羅尼
佛懺尊勝陀羅尼 多心經 羅漢上神咒 往生儀軌
小乘妙法蓮華經 功德寶山神咒 消災吉祥神咒

南无本师释迦牟尼佛





此梵文大佛顶陀罗尼(即首楞严咒)为开宝四年所刻,现收藏于法国国家图书馆。全咒刻在一张纸上,周边及中间配以佛菩萨以及护法像,布局周正大方,制作精美庄严,为敦煌遗书中少见的梵文精品。

目 录

金刚般若波罗蜜经.....	1
一、略明降住生信分。	
二、推广降住开解分。	
三、究竟降住起修分。	
四、决定降住成证分。	
药师琉璃光如来本愿功德经.....	22
佛说阿弥陀经.....	42
地藏菩萨本愿经.....	49
般若波罗蜜多心经.....	103
净行品(大方广佛华严经).....	104
梵行品(大方广佛华严经).....	115
普贤行愿品(大方广佛华严经).....	119
药王菩萨本事品(妙法莲华经).....	139
观音菩萨普门品(妙法莲华经).....	149
四种清净明诲(大佛顶首楞严经).....	156
观世音菩萨耳根圆通章(大佛顶首楞严经) ...	163

大势至菩萨念佛圆通章(大佛顶首楞严经) ...	164
楞严咒	165
大悲咒	178
十小咒	182
佛顶尊胜陀罗尼	185
一切如来心秘密全身舍利宝篋印陀罗尼	190
普庵咒	194
华严字母	197
礼佛大忏悔文	213
永嘉大师证道歌	219
放生仪轨	226
五戒诵戒仪轨	228
施食仪轨	230
听经、背经的方法（宣化上人开示）	234
华严字母 唱诵利人天	237

香 赞

炉香乍爇。法界蒙熏。诸佛海会悉遥闻。随处结
祥云。诚意方殷。诸佛现全身。
南无香云盖菩萨摩訶萨（三称）

金刚经启请

若有人持受金刚经者，先须至心念净口业等真言，然后
启请八金刚四菩萨名号，所在之处常当拥护。

净口业真言

ān xiū lì xiū lì mó hē xiū lì xiū xiū lì sà pó hē
唵。修唎修唎。摩訶修唎。修修唎。薩婆訶。

净身业真言

ān xiū duō lì xiū duō lì xiū mó lì xiū mó lì sà pó hē
唵。修多唎。修多唎。修摩唎。修摩唎。薩婆訶。

净意业真言

ān wā rì là dá hē hè hú
唵。嚩日囉怛訶賀斛。

净三业真言

ān suō wā pó wā shù tuó suō wā dá mó suō wā pó wā shù dù hàn
唵。娑嚩婆嚩秫駄。娑嚩達摩娑嚩。婆嚩秫度憾。

安土地真言（三遍）

ná mó sān mǎn duō mǔ tuó nán ān dù lū dù lū dì wěi sà pó hē
南無三滿多。母馱喃。唵度嚧度嚧。地尾薩婆訶。

普供养真言（三遍）

ān yē yē náng sān pó wā wà rì wā hú
唵。誡誡曩。三婆嚩。鞞日囉斛。

法界真言（七遍）： ān wā rì là tuó dǔ wàn
唵 嚩日囉馱覩鍛

清淨真言（七遍）： ān lán suǒ hē
唵 藍 莎訶

三坛真言（七遍）： ān yā hōng
唵 啞 吽

奉请八金刚

奉请	青除灾金刚	奉请	辟 毒金刚
奉请	黄随求金刚	奉请	白净水金刚
奉请	赤声火金刚	奉请	定持灾金刚
奉请	紫 贤金刚	奉请	大 神金刚

奉请四菩萨

奉请	金刚眷菩萨	奉请	金刚索菩萨
奉请	金刚爱菩萨	奉请	金刚语菩萨

发愿文

稽首三界尊。皈依十方佛。
我今发宏愿。持此金刚经。
上报四重恩。下济三途苦。
若有见闻者。悉发菩提心。
尽此一报身。同生极乐国。

云何梵

云何得长寿。金刚不坏身。
复以何因缘。得大坚固力。
云何于此经。究竟到彼岸。
愿佛开微密。广为众生说。

称圣号

南无十方三世一切佛法僧三宝（三称）

南无本师释迦牟尼佛（三称）

南无金刚般若波罗蜜经（三称）

开经偈

无上甚深微妙法
百千万劫难遭遇
我今见闻得受持
愿解如来真实义



金剛般若波羅蜜經

姚秦三藏法師鳩摩羅什 譯
科判節目于通理大師《金剛新眼疏》

【序分】

如是我聞。一時佛在舍衛國。祇樹給孤獨園。與大比丘眾。千二百五十人俱。爾時世尊食時。著衣持鉢。入舍衛大城乞食。於其城中。次第乞已。還至本處。飯食訖。收衣鉢。洗足已。敷座而坐。

【正宗分：一、略明降住生信分】

【A、當機誠請 B、如來許說 C、當機愿聞】

時長老須菩提。在大眾中。即從座起。偏袒右肩。右膝著地。合掌恭敬。而白佛言。希有。世尊。如來善護念諸菩薩。善付囑諸菩薩。世尊。善男子善女人。發阿耨多羅三藐三菩提心。云何應住。云何降伏其心。

佛言。善哉善哉。須菩提。如汝所說。如來善護念諸菩薩。善付囑諸菩薩。汝今諦聽。當為汝說。善男子善女人。發阿耨多羅三藐三菩提心。應如是住。如是降伏其心。唯然。世尊。愿樂欲聞。

【D、如来开示:(A)开示降住: a降心之方】

佛告须菩提。诸菩萨摩訶萨。应如是降伏其心。所有一切众生之类。若卵生。若胎生。若湿生。若化生。若有色。若无色。若有想。若无想。若非有想。非无想。我皆令入无余涅槃而灭度之。如是灭度无量无数无边众生。实无众生得灭度者。何以故。须菩提。若菩萨有我相人相众生相寿者相。即非菩萨。

【b住心之方】

复次。须菩提。菩萨于法。应无所住行于布施。所谓不住色布施。不住声香味触法布施。须菩提。菩萨应如是布施。不住于相。何以故。若菩萨不住相布施。其福德不可思量。须菩提。于意云何。东方虚空可思量不。不也。世尊。须菩提。南西北方。四维上下虚空。可思量不。不也。世尊。须菩提。菩萨无住相布施。福德亦复如是不可思量。须菩提。菩萨但应如所教住。

【c 兼释伏疑】

须菩提。于意云何。可以身相见如来不。不也。世尊。不可以身相得见如来。何以故。

如来所说身相。即非身相。佛告须菩提。凡所有相。皆是虚妄。若见诸相非相。则见如来。

【(B)成就信心：a 显信具德】

须菩提白佛言。世尊。颇有众生。得闻如是言说章句。生实信不。

佛告须菩提。莫作是说。如来灭后。后五百岁。有持戒修福者。于此章句。能生信心。以此为实。当知是人。不于一佛二佛三四五佛而种善根。已于无量千万佛所。种诸善根。闻是章句。乃至一念生净信者。须菩提。如来悉知悉见。是诸众生。得如是无量福德。

【b 展转征释】

何以故。是诸众生。无复我相人相众生相寿者相。无法相。亦无非法相。何以故。是诸众生。若心取相。则为著我人众生寿者。若取法相。即著我人众生寿者。何以故。若取非法相。即著我人众生寿者。是故不应取法。不应取非法。

【c 结示进信】

以是义故。如来常说。汝等比丘。知我说法。如筏喻者。法尚应舍。何况非法。

【d 重释伏疑】

须菩提。于意云何。如来得阿耨多罗三藐三菩提耶。如来有所说法耶。

须菩提言。如我解佛所说义。无有定法名阿耨多罗三藐三菩提。亦无有定法如来可说。何以故。如来所说法。皆不可取。不可说。非法。非非法。所以者何。一切贤圣。皆以无法而有差别。

【(C)较量持福：a 能较量 b 所较量 c 释伏疑】

须菩提。于意云何。若人满三千大千世界七宝。以用布施。是人所得福德。宁为多不。须菩提言。甚多。世尊。何以故。是福德。即非福德性。是故如来说福德多。

若复有人。于此经中。受持乃至四句偈等。为他人说。其福胜彼。何以故。须菩提。一切诸佛。及诸佛阿耨多罗多三藐三菩提法。皆从此经出。须菩提。所谓佛法者。即非佛法。

【二、推广降住开解分】

【A、推广降住：(A)正与推广：a 推广降心之法】

须菩提。于意云何。须陀洹能作是念。我得须陀洹果不。须菩提言。不也。世尊。何以故。须陀洹名为入流。而无所入。不入色声香味触法。是名须陀洹。

须菩提。于意云何。斯陀含能作是念。我得斯陀含果不。须菩提言。不也。世尊。何以故。斯陀含名一往来。而实无往来。是名斯陀含。

须菩提。于意云何。阿那含能作是念。我得阿那含果不。须菩提言。不也。世尊。何以故。阿那含名为不来。而实无不来。是故名阿那含。

须菩提。于意云何。阿罗汉能作是念。我得阿罗汉道不。须菩提言。不也。世尊。何以故。实无有法。名阿罗汉。世尊。若阿罗汉作是念。我得阿罗汉道。即为著我人众生寿者。

世尊。佛说我得无诤三昧。人中最为第一。是第一离欲阿罗汉。世尊。我不作是念。我是离欲阿罗汉。世尊。我若作是念。我得阿罗汉道。世尊则不说须菩提是乐阿兰那行者。以须菩提实无所行。而名须菩提是乐阿兰那行。

【b推广住心之法：(a)修因无住 (b)得果无住】

佛告须菩提。于意云何。如来昔在然灯佛所。于法有所得不。不也。世尊。如来在然灯佛所。于法实无所得。

须菩提。于意云何。菩萨庄严佛土不。不也。世尊。何以故。庄严佛土者。即非庄严。是名庄严。

是故须菩提。诸菩萨摩訶萨。应如是生清净心。不应住色生心。不应住声香味触法生心。应无所住而生其心。

须菩提。譬如有人。身如须弥山王。于意云何。是身为大不。须菩提言。甚大。世尊。何以故。佛说非身。是名大身。

【(B)略示周足：a校量持福】

须菩提。如恒河中所有沙数。如是沙等恒河。于意云何。是诸恒河沙。宁为多不。须菩提言。甚多。世尊。但诸恒河。尚多无数。何况其沙。

须菩提。我今实言告汝。若有善男子善女人。以七宝满尔所恒河沙数三千大千世界。以用布施。得福多不。须菩提言。甚多。世尊。

佛告须菩提。若善男子善女人。于此经中。乃至受持四句偈等。为他人说。而此福德。胜前福德。

【b取劣况胜】

复次。须菩提。随说是经。乃至四句偈等。当知此处。一切世间天人阿修罗。皆应供养。如佛塔庙。何况有人。尽能受持读诵。须菩提。当知是人。成就最上第一希有之法。若是经典所在之处。即为有佛。若尊重弟子。

【c请示经名】

尔时须菩提白佛言。世尊。当何名此经。我等云何奉持。佛告须菩提。是经名为金刚般若波罗蜜。以是名字。汝当奉持。所以者何。须菩提。佛说般若波罗蜜。即非般若波罗蜜。

【(C)尽断余疑】

须菩提。于意云何。如来有所说法不。须菩提白佛言。世尊。如来无所说。

须菩提。于意云何。三千大千世界。所有微尘。是为多不。须菩提言。甚多。世尊。须菩提。诸微尘。如来说非微尘。是名微尘。如来说世界。非世界。是名世界。

须菩提。于意云何。可以三十二相见如来不。不也。世尊。不可以三十二相得见如来。何以故。如来说三十二相。即是非相。是名三十二相。

【B、成就解慧：(A)校量经功】

须菩提。若有善男子善女人。以恒河沙等身命布施。若复有人。于此经中。乃至受持四句偈等。为他人说。其福甚多。

【(B)信解感叹：a 当机闻解悲感 b 赞叹信解功德 c 如来印许证释】

尔时。须菩提闻说是经。深解义趣。涕泪悲泣。而白佛言。希有。世尊。佛说如是甚深经典。我从昔来所得慧眼。未曾得闻如是之经。

世尊。若复有人。得闻是经。信心清净。则生实相。当知是人成就第一希有功德。世尊。是实相者。则是非相。是故如来说名实相。

世尊。我今得闻如是经典。信解受持。不足为难。若当来世。后五百岁。其有众生得闻是经。信解受持。是人则为第一希有。何以故。此人无我相。人相。众生相。寿者相。所以者何。我相即是非相。人相众生相寿者相。即是非相。何以故。离一切诸相。则名诸佛。

佛告须菩提。如是如是。若复有人。得闻是经。不惊不怖不畏。当知是人。甚为希有。何以故。须菩提。如来说第一波罗蜜。即非第一波罗蜜。是名第一波罗蜜。

【(C)类明余度】

须菩提。忍辱波罗蜜。如来说非忍辱波罗蜜。何以故。须菩提。如我昔为歌利王割截身体。我于尔时。无我相。无人相。无众生相。无寿者相。何以故。我于往昔节节支解时。若有我相人相众生相寿者相。应生瞋恨。

须菩提。又念过去。于五百世作忍辱仙人。于尔所世。无我相。无人相。无众生相。无寿者相。

是故须菩提。菩萨应离一切相。发阿耨多罗三藐三菩提心。不应住色生心。不应住声香味触法生心。应生无所住心。若心有住。则为非住。

【(D)会合前语】

是故佛说。菩萨心不应住色布施。须菩提。菩萨为利益一切众生。应如是布施。如来说一切诸相。即是非相。又说一切众生。即非众生。

【(E)遮疑助解】

须菩提。如来是真语者。实语者。如语者。不诳语者。不异语者。须菩提。如来所得法。此法无实无虚。

须菩提。若菩萨心住于法而行布施。如人入闇。则无所见。若菩萨心不住法而行布施。如人有目。日光明照。见种种色。

【C、显示经功：(A)分门略显】

须菩提。当来之世。若有善男子善女人。能于此经受持读诵。则为如来以佛智慧。悉知是人。悉见是人。皆得成就无量无边功德。

须菩提。若有善男子善女人。初日分。以恒河沙等身布施。中日分。复以恒河沙等身布施。后日分。亦以恒河沙等身布施。如是无量百千万亿劫。以身布施。若复有人。闻此经典。信心不逆。其福胜彼。何况书写受持读诵。为人解说。

【(B)四义详示：a 约教理显德 b 约行果显德 c 约依处显德 d 约功用显德】

须菩提。以要言之。是经有不可思议。不可称量。无边功德。如来为发大乘者说。为发最上乘者说。若有人能受持读诵。广为人说。如来悉知是人。悉见是人。皆得成就不可量不可称无有边不可思议功德。如是人等。则为荷担如来阿耨多罗三藐三菩提。何以故。须菩提。

若乐小法者。著我见人见众生见寿者见。则于此经。不能听受读诵。为人解说。

须菩提。在在处处。若有此经。一切世间天人阿修罗。所应供养。当知此处。则为是塔。皆应恭敬作礼围绕。以诸华香而散其处。

复次。须菩提。若善男子善女人。受持读诵此经。若为人轻贱。是人先世罪业。应堕恶道。以今世人轻贱故。先世罪业。则为消灭。当得阿耨多罗三藐三菩提。

【(C)引因校量】

须菩提。我念过去无量阿僧祇劫。于然灯佛前。得值八百四千万亿那由他诸佛。悉皆供养承事。无空过者。若复有人。于后末世。能受持读诵此经。所得功德。于我所供养诸佛功德。百分不及一。千万亿分。乃至算数譬喻。所不能及。

【(D)总以结叹】

须菩提。若善男子善女人。于后末世。能受持读诵此经。所得功德。我若具说者。或有人闻。心则狂乱。狐疑不信。须菩提。当知是经。义不可思议。果报亦不可思议。

【三、究竟降住起修分】

【A、当机重问降住】

尔时须菩提白佛言。世尊。善男子善女人。发阿耨多罗三藐三菩提心。云何应住。云何降伏其心。

【B、如来原问发明：(A)降心离相】

佛告须菩提。善男子善女人。发阿耨多罗三藐三菩提心者。当生如是心。我应灭度一切众生。灭度一切众生已。而无有一众生实灭度者。何以故。须菩提。若菩萨有我相人相众生相寿者相。则非菩萨。所以者何。须菩提。实无有法。发阿耨多罗三藐三菩提心者。

【a 得记离相】

须菩提。于意云何。如来于然灯佛所。有法得阿耨多罗三藐三菩提不。不也。世尊。如我解佛所说义。佛于然灯佛所。无有法得阿耨多罗三藐三菩提。

佛言。如是如是。须菩提。实无有法。如来得阿耨多罗三藐三菩提。须菩提。若有法。如来得阿耨多罗三藐三菩提者。然灯佛则不与我授记。汝于来世。当得作佛。号释迦牟尼。以实无有法。得阿耨多罗三藐三菩提。是故然

灯佛与我授记。作是言。汝于来世。当得作佛。
号释迦牟尼。

何以故。如来者。即诸法如义。若有人言。
如来得阿耨多罗三藐三菩提。须菩提。实无有
法。佛得阿耨多罗三藐三菩提。

须菩提。如来所得阿耨多罗三藐三菩提。
于是中无实无虚。是故如来说一切法皆是佛
法。须菩提。所言一切法者。即非一切法。是
故名一切法。

【b 感报离相】

须菩提。譬如人身长大。须菩提言。世尊。
如来说人身长大。则为非大身。是名大身。

【c 修因离相】

须菩提。菩萨亦如是。若作是言。我当灭
度无量众生。则不名菩萨。何以故。须菩提。
实无有法。名为菩萨。是故佛说一切法。无我
无人无众生无寿者。

须菩提。若菩萨作是言。我当庄严佛土。
是不名菩萨。何以故。如来说庄严佛土者。即
非庄严。是名庄严。须菩提。若菩萨通达无我
法者。如来说名真是菩萨。

【d 知见离相】

须菩提。于意云何。如来有肉眼不。如是。世尊。如来有肉眼。须菩提。于意云何。如来有天眼不。如是。世尊。如来有天眼。须菩提。于意云何。如来有慧眼不。如是。世尊。如来有慧眼。须菩提。于意云何。如来有法眼不。如是。世尊。如来有法眼。须菩提。于意云何。如来有佛眼不。如是。世尊。如来有佛眼。

须菩提。于意云何。如恒河中所有沙。佛说是沙不。如是。世尊。如来说是沙。须菩提。于意云何。如一恒河中所有沙。有如是沙等恒河。是诸恒河所有沙数佛世界。如是宁为多不。甚多。世尊。佛告须菩提。尔所国土中。所有众生若干种心。如来悉知。何以故。如来说诸心。皆为非心。是名为心。所以者何。须菩提。过去心不可得。现在心不可得。未来心不可得。

【(B)住心无住】

须菩提。于意云何。若有人满三千大千世界七宝。以用布施。是人以是因缘。得福多不。如是。世尊。此人以是因缘。得福德甚多。须菩提。若福德有实。如来说得福德多。以福德无故。如来说得福德多。

【a 见佛无住：(a)见身无住 (b)见相无住】

须菩提。于意云何。佛可以具足色身见不。不也。世尊。如来不应以具足色身见。何以故。如来说具足色身。即非具足色身。是名具足色身。

须菩提。于意云何。如来可以具足诸相见不。不也。世尊。如来不应以具足诸相见。何以故。如来说诸相具足。即非具足。是名诸相具足。

【b闻法无住：(a)说者无住 (b)闻者无住】

须菩提。汝勿谓如来作是念。我当有所说法。莫作是念。何以故。若人言。如来有所说法。即为谤佛。不能解我所说故。须菩提。说法者。无法可说。是名说法。

尔时慧命须菩提白佛言。世尊。颇有众生。于未来世闻说是法。生信心不。佛言。须菩提。彼非众生。非不众生。何以故。须菩提。众生众生者。如来说非众生。是名众生。

【c得果无住】

须菩提白佛言。世尊。佛得阿耨多罗三藐三菩提。为无所得耶。佛言。如是如是。须菩

提。我于阿耨多罗三藐三菩提。乃至无有少法可得。是名阿耨多罗三藐三菩提。

【d修因无住】

复次。须菩提。是法平等。无有高下。是名阿耨多罗三藐三菩提。以无我无人无众生无寿者。修一切善法。则得阿耨多罗三藐三菩提。须菩提。所言善法者。如来说即非善法。是名善法。

【(C)校量持福】

须菩提。若三千大千世界中。所有诸须弥山王。如是等七宝聚。有人持用布施。若人以此般若波罗蜜经。乃至四句偈等。受持读诵。为他人说。于前福德。百分不及一。百千万亿分。乃至算数譬喻。所不能及。

【四、决定降住成证分】

【A、降心离相】

须菩提。于意云何。汝等勿谓如来作是念。我当度众生。须菩提。莫作是念。

何以故。实无有众生如来度者。若有众生如来度者。如来则有我人众生寿者。须菩提。如来说有我者。则非有我。而凡夫之人以为有我。须菩提。凡夫者。如来说则非凡夫。

【a观相离相】

须菩提。于意云何。可以三十二相观如来说。不。须菩提言。如是如是。以三十二相观如来。

佛言。须菩提。若以三十二相观如来者。转轮圣王。则是如来。须菩提白佛言。世尊。如我解佛所说义。不应以三十二相观如来。

尔时世尊而说偈言。

若以色见我。以音声求我。

是人行邪道。不能见如来。

【b离相亦离：(a)遮念离相 (b)明遮所以】

须菩提。汝若作是念。如来不以具足相故。得阿耨多罗三藐三菩提。须菩提。莫作是念。如来不以具足相故。得阿耨多罗三藐三菩提。

须菩提。汝若作是念。发阿耨多罗三藐三菩提心者。说诸法断灭。莫作是念。何以故。发阿耨多罗三藐三菩提心者。于法不说断灭相。

【B、住心无住】

须菩提。若菩萨以满恒河沙等世界七宝。持用布施。若复有人。知一切法无我。得成于忍。此菩萨胜前菩萨所得功德。

何以故。须菩提。以诸菩萨不受福德故。
须菩提白佛言。世尊。云何菩萨不受福德。须
菩提。菩萨所作福德。不应贪著。是故说不受
福德。

【a正报无住】

须菩提。若有人言。如来若来若去。若坐
若卧。是人解我所说义。何以故。如来者。
无所从来。亦无所去。故名如来。

【b依报无住：(a)微尘无住 (b)世界无住】

须菩提。若善男子善女人。以三千大千世
界。碎为微尘。于意云何。是微尘众。宁为多
不。甚多。世尊。何以故。若是微尘众实有者。
佛则不说是微尘众。所以者何。佛说微尘众。
则非微尘众。是名微尘众。

世尊。如来所说三千大千世界。则非世界。
是名世界。何以故。若世界实有者。则是一合
相。如来说一合相。则非一合相。是名一合相。
须菩提。一合相者。则是不可说。但凡夫之人
贪著其事。

【C、结归问意：a结归云何降心问】

须菩提。若人言。佛说我见人见众生见寿
者见。须菩提。于意云何。是人解我所说义不。

不也。世尊。是人不解如来所说义。何以故。世尊说我见人见众生见寿者见。即非我见人见众生见寿者见。是名我见人见众生见寿者见。

须菩提。发阿耨多罗三藐三菩提心者。于一切法。应如是知。如是见。如是信解。不生法相。须菩提。所言法相者。如来说即非法相。是名法相。

【b结归云何住心问】

须菩提。若有人以满无量阿僧祇世界七宝。持用布施。若有善男子善女人。发菩萨心者。持于此经。乃至四句偈等。受持读诵。为人演说。其福胜彼。云何为人演说。不取于相。如如不动。何以故。

一切有为法。如梦幻泡影。

如露亦如电。应作如是观。

【流通分】

佛说是经已。长老须菩提。及诸比丘。比丘尼。优婆塞。优婆夷。一切世间。天人阿修罗。闻佛所说。皆大欢喜。信受奉行。

般若无尽藏真言（三遍）

nà mó bó qié fá dì bō lì rě bō luó mì duō yè dá zhí tuō
纳谟薄伽伐帝。鉢唎若。波羅蜜多曳。怛姪他。
ān qì lǐ dì lǐ shì lǐ shù lū dì sān mì lì dì bì
唵。訖唎。地唎。室唎。戍嚧知。三蜜栗知。佛
shè yè suǒ hē
社曳莎訶。

金剛心真言（三遍）

ān wū lún ní suǒ pó hē
唵。烏倫尼。娑婆訶。

補闕真言（三遍）

ná mó hē là dá nà duō là yè yē qiè là qiè là jù zhù jù zhù
南無喝囉怛那。哆囉夜耶。佉囉佉囉。俱住俱住。
mó là mó là hū là hōng hè hè sū dá ná hōng pō mò ná
摩囉摩囉。虎囉吽。賀賀蘇怛拏。吽。潑抹拏。
suǒ pó hē
娑婆訶。

補闕圓滿真言（三遍）

ān hū lú hū lú shè yì mù qì suǒ hē
唵。呼嚧呼嚧。社曳穆契。娑訶。

普回向真言

ān suǒ mó là suǒ mó là mǐ mónán sà fú hē mó hē zhuó jiā
唵。娑摩囉娑摩囉。弭摩囊。薩縛訶。摩訶斫迦
là wāhōng
囉嚩吽。

金刚赞

断疑生信。绝相超宗。顿亡人法解真空。
般若味重重。四句融通。福德叹无穷。
南无祇园会上佛菩萨(三称)

回向偈

愿以此功德。普及于一切。
我等与众生。皆共成佛道。



药师琉璃光如来本愿功德经

唐三藏法师玄奘 译

科判节自于太虚大师《药师本愿经讲记》

【叙请分】

如是我闻：一时，薄伽梵游化诸国，至广严城，住乐音树下。与大苾刍众八千人俱，菩萨摩訶萨三万六千，及国王、大臣、婆罗门、居士、天龙药叉、人非人等，无量大众，恭敬围绕，而为说法。

尔时，曼殊室利法王子承佛威神，从座而起，偏袒一肩，右膝著地，向薄伽梵曲躬合掌，白言：世尊！惟愿演说如是相类诸佛名号，及本大愿殊胜功德，令诸闻者业障消除，为欲利乐像法转时诸有情故。

尔时，世尊赞曼殊室利童子言：善哉！善哉！曼殊室利！汝以大悲，劝请我说诸佛名号、本愿功德，为拔业障所缠有情，利益安乐像法转时诸有情故。汝今谛听，极善思惟，当为汝说。曼殊室利言：唯然！愿说，我等乐闻。

【示体相】

佛告曼殊室利：东方去此过十殑伽沙等佛土，有世界名净琉璃，佛号药师琉璃光如来、应、正等觉、明行圆满、善逝、世间解无上士、调御丈夫、天人师、佛、薄伽梵。

曼殊室利！彼世尊药师琉璃光如来，本行菩萨道时，发十二大愿，令诸有情，所求皆得。

【十二大愿：1.正报庄严 2.身光破暗 3.智慧资生 4.导入大乘 5.得戒清净 6.得身健美 7.安康乐道 8.转女成男 9.魔外归正 10.解脱忧苦 11.得妙饮食 12.得妙衣服】

第一大愿：愿我来世得阿耨多罗三藐三菩提时，自身光明炽然，照耀无量无数无边世界，以三十二大丈夫相、八十随好，庄严其身；令一切有情，如我无异。

第二大愿：愿我来世得菩提时，身如琉璃，内外明彻，净无瑕秽，光明广大，功德巍巍，身善安住，焰网庄严，过于日月；幽冥众生，悉蒙开晓，随意所趣，作诸事业。

第三大愿：愿我来世得菩提时，以无量无边智慧方便，令诸有情，皆得无尽所受用物，莫令众生有所乏少。

第四大愿：愿我来世得菩提时，若诸有情行邪道者，悉令安住菩提道中；若行声闻独觉乘者，皆以大乘而安立之。

第五大愿：愿我来世得菩提时，若有无量无边有情，于我法中修行梵行，一切皆令得不缺戒，具三聚戒。设有毁犯，闻我名已，还得清净，不堕恶趣。

第六大愿：愿我来世得菩提时，若诸有情，其身下劣，诸根不具，丑陋顽愚，盲聋喑哑，挛臂背傴，白癞癰狂，种种病苦；闻我名已，一切皆得端正黠慧。诸根完具，无诸疾苦。

第七大愿：愿我来世得菩提时，若诸有情，众病逼切，无救无归，无医无药，无亲无家，贫穷多苦，我之名号，一经其耳，众病悉除，身心安乐，家属资具，悉皆丰足，乃至证得无上菩提。

第八大愿：愿我来世得菩提时，若有女人，为女百恶之所逼恼，极生厌离，愿舍女身；闻我名已，一切皆得转女成男，具丈夫相，乃至证得无上菩提。

第九大愿：愿我来世得菩提时，令诸有情，出魔罟网，解脱一切外道缠缚；若堕种种恶见稠林，皆当引摄置于正见，渐令修习诸菩萨行，速证无上正等菩提。

第十大愿：愿我来世得菩提时，若诸有情，王法所录，绳缚鞭撻，系闭牢狱，或当刑戮，及余无量灾难凌辱，悲愁煎迫，身心受苦；若闻我名，以我福德威神力故，皆得解脱一切忧苦。

第十一大愿：愿我来世得菩提时，若诸有情，饥渴所恼，为求食故造诸恶业；得闻我名，专念受持，我当先以上妙饮食，饱足其身；后以法味，毕竟安乐而建立之。

第十二大愿：愿我来世得菩提时，若诸有情，贫无衣服，蚊虻寒热，昼夜逼恼；若闻我名，专念受持，如其所好，即得种种上妙衣服，亦得一切宝庄严具，华鬘涂香，鼓乐众伎，随心所玩，皆令满足。

曼殊室利！是为彼世尊药师琉璃光如来、应、正等觉，行菩萨道时，所发十二微妙上愿。

【果德】

复次，曼殊室利！彼世尊药师琉璃光如来，行菩萨道时所发大愿，及彼佛土功德庄严，我若一劫，若一劫余，说不能尽。然彼佛土，一向清净，无有女人，亦无恶趣，及苦音声。琉璃为地，金绳界道，城阙宫阁，轩窗罗网，皆七宝成。亦如西方极乐世界，功德庄严，等无差别。

于其国中，有二菩萨摩訶萨：一名日光遍照，二名月光遍照，是彼无量无数菩萨众之上首，悉能持彼世尊药师琉璃光如来正法宝藏。是故，曼殊室利！诸有信心善男子、善女人等，应当愿生彼佛世界。

【灭罪益：灭贪吝罪得能施益】

尔时，世尊复告曼殊室利童子言：曼殊室利！有诸众生，不识善恶，唯怀贪吝，不知布施及施果报，愚痴无智，阙于信根，多聚财宝，勤加守护；见乞者来，其心不喜，设不获已而行施时，如割身肉，深生痛惜。复有无量悭贪有情，积集资财，于其自身尚不受用，何况能与父母、妻子、奴婢、作使，及来乞者？彼诸有情，从此命终，生饿鬼界，或旁生趣。

音注：阙(quē) 旁(bàng)生

由昔人间，曾得暂闻药师琉璃光如来名故，今在恶趣，暂得忆念彼如来名，即于念时，从彼处没，还生人中，得宿命念，畏恶趣苦，不乐欲乐，好行惠施，赞叹施者，一切所有悉无贪惜，渐次尚能以头目手足，血肉身分，施来求者，况余财物。

【灭罪益：灭毁犯罪得持戒益】

复次，曼殊室利，若诸有情，虽于如来受诸学处，而破尸罗；有虽不破尸罗，而破轨则；有于尸罗轨则，虽得不坏，然毁正见；有虽不毁正见，而弃多闻，于佛所说契经深义不能解了；有虽多闻而增上慢，由增上慢覆蔽心故，自是非他，嫌谤正法，为魔伴党。如是愚人，自行邪见，复令无量俱胝有情，堕大险坑。此诸有情，应于地狱、旁生、鬼趣，流转无穷。

若得闻此药师琉璃光如来名号，便舍恶行，修诸善法，不堕恶趣，设有不能舍诸恶行，修行善法，堕恶趣者，以彼如来本愿威力，令其现前暂闻名号，从彼命终还生人趣，得正见精进，善调意乐，便能舍家趣于非家，如来法中，受持学处，无有毁犯；正见多闻，解甚深

义，离增上慢，不谤正法，为魔伴党，渐次修行诸菩萨行，速得圆满。

【灭罪益：灭妒碍罪得解脱益】

复次，曼殊室利！若诸有情，悭贪嫉妒，自赞毁他，当堕三恶趣中，无量千岁受诸剧苦；受剧苦已，从彼命终，来生人间，作牛马驼驴，恒被鞭挞，饥渴逼恼；又常负重，随路而行。或得为人，生居下贱，作人奴婢，受他驱役，恒不自在。

若昔人中，曾闻世尊药师琉璃光如来名号，由此善因，今复忆念，至心归依。以佛神力，众苦解脱，诸根聪利，智慧多闻，恒求胜法，常遇善友，永断魔罟，破无明轂，竭烦恼河，解脱一切生老病死，忧愁苦恼。

【灭罪益：灭恼害罪得安乐益】

复次，曼殊室利！若诸有情，好喜乖离，更相斗讼，恼乱自他，以身语意，造作增长种种恶业，展转常为不饶益事，互相谋害。告召山林树冢等神；杀诸众生，取其血肉，祭祀药叉罗刹婆等；书怨人名，作其形像，以恶咒术

而咒咀之；厌媚蛊道，咒起尸鬼，令断彼命，及坏其身。

是诸有情，若得闻此药师琉璃光如来名号，彼诸恶事，悉不能害。一切展转皆起慈心，利益安乐，无损恼意及嫌恨心；各各欢悦，于自所受生于喜足，不相侵凌，互为饶益。

【往生益：化生宝华益】

复次，曼殊室利！若有四众：苾刍、苾刍尼、邬波索迦、邬波斯迦，及余净信善男子、善女人等，有能受持八分斋戒，经一年，或复三月，受持学处，以此善根愿生西方极乐世界无量寿佛所，听闻正法而未定者。

若闻世尊药师琉璃光如来名号，临命终时，有八菩萨。「其名曰：文殊师利菩萨、观世音菩萨、得大势菩萨、无尽意菩萨、宝坛华菩萨、药王菩萨、药上菩萨、弥勒菩萨。」乘神通来，示其道路，即于彼界种种杂色众宝华中，自然化生。

【往生益：或生天人益】

或有因此生于天上，虽生天中，而本善根亦未穷尽，不复更生诸余恶趣。天上寿尽，还

注：「」内八大菩萨，依东晋西域三藏帛尸梨蜜多罗所译《佛说大灌顶神咒经》卷第十二中的八菩萨部分添入。

生人间，或为轮王，统摄四洲，威德自在，安立无量百千有情于十善道；或生刹帝利、婆罗门、居士大家，多饶财宝，仓库盈溢，形相端严，眷属具足，聪明智慧，勇健威猛，如大力士。

若是女人，得闻世尊药师如来名号，至心受持，于后不复更受女身。

【诵咒利益】

「复次，曼殊室利！彼药师琉璃光如来得菩提时，由本愿力，观诸有情，遇众病苦，瘦虐干消，黄热等病；或被魇魅蛊道所中，或复短命，或时横死，欲令是等病苦消除，所求愿满。

时彼世尊入三摩地，名曰灭除一切众生苦恼。既入定已，于肉髻中，出大光明，光中演说，大陀罗尼曰：

南谟薄伽伐帝。鞞杀社娑嚧。薜琉璃钵喇婆。喝啰闍也。怛他揭多也。阿啰喝帝。三藐三勃陀耶。怛侄他。唵。鞞杀逝鞞杀逝。鞞杀社。三没揭帝莎诃。

注：「」内文字，依唐三藏法师义净所译《药师琉璃光七佛本愿功德经》中的药师灌顶真言一段添入。

尔时光中说此咒已，大地震动，放大光明，一切众病苦恼皆除，受安隐乐。

曼殊室利！若见男子女人，有病苦者，应当一心为彼病人，清淨澡漱，或食或药或无虫水，咒一百八遍，与彼服食，所有病苦悉皆消灭。若有所求，至心念诵，皆得如意，无病延年，命终之后，生彼世界，得不退转，乃至菩提。

是故曼殊室利，若有男子女人，于彼药师琉璃光如来，至心殷重，恭敬供养者，常持此咒，勿令废忘。

【有情持奉益】

复次，曼殊室利！若有净信男子女人，得闻如上七佛如来，应正等觉，所有名号，闻已诵持；晨嚼齿木，澡漱清淨，以诸香华，末香烧香涂香，作众妓乐，供养形像；于此经典，若自书，若教人书，一心受持，听闻其义；于彼法师，应修供养，一切所有资身之具，悉皆施与，勿令乏少；如是便蒙诸佛护念，所求愿满，乃至菩提。」

尔时，曼殊室利童子白佛言：世尊！我当誓于像法转时，以种种方便，令诸净信善男子、善女人等，得闻世尊药师琉璃光如来名号，乃至睡中亦以佛名觉悟其耳。

世尊！若于此经受持读诵，或复为他演说开示；若自书，若教人书；恭敬尊重，以种种华香涂香，末香烧香，华鬘璎珞，幡盖伎乐，而为供养；以五色彩，作囊盛之；扫洒净处，敷设高座，而用安处。

尔时，四大天王与其眷属，及余无量百千天众，皆诣其所，供养守护。世尊！若此经宝流行之处，有能受持，以彼世尊药师琉璃光如来本愿功德，及闻名号，当知是处无复横死；亦复不为诸恶鬼神，夺其精气；设已夺者，还得如故，身心安乐。

【开示仪轨】

佛告曼殊室利：如是！如是！如汝所说。曼殊室利！若有净信善男子、善女人等，欲供养彼世尊药师琉璃光如来者，应先造立彼佛形像，敷清净座而安处之；散种种华，烧种种香，以种种幢幡庄严其处；七日七夜，受持八分斋

戒，食清净食，澡浴香洁，著新净衣，应生无垢浊心，无怒害心，于一切有情，起利益安乐，慈悲喜舍，平等之心，鼓乐歌赞，右绕佛像。

【获福益】

复应念彼如来本愿功德，赞诵此经，思惟其义，演说开示。随所乐愿，一切皆遂：求长寿得长寿，求富饶得富饶，求官位得官位，求男女得男女。

【免难益：1.百怪出现难 2.一切怖畏难 3.他国侵扰难 4.犯戒堕落难 5.妇女生产难】

若复有人，忽得恶梦，见诸恶相，或怪鸟来集，或于住处，百怪出现；此人若以众妙资具，恭敬供养彼世尊药师琉璃光如来者，恶梦恶相，诸不吉祥，皆悉隐没，不能为患。

或有水火刀毒，悬险恶象，狮子虎狼，熊黑毒蛇，恶蝎蜈蚣，蚰蜒蚊虻等怖；若能至心忆念彼佛，恭敬供养，一切怖畏皆得解脱。

若他国侵扰，盗贼反乱；忆念恭敬彼如来者，亦皆解脱。

复次，曼殊室利！若有净信善男子、善女人等，乃至尽形不事余天，惟当一心归佛、法、僧，受持禁戒，若五戒、十戒、菩萨四百戒、

苾刍二百五十戒、苾刍尼五百戒，于所受中或有毁犯，怖堕恶趣，若能专念彼佛名号，恭敬供养者，必定不受三恶趣生。

或有女人，临当产时，受于极苦；若能至心称名礼赞，恭敬供养彼如来者，众苦皆除。所生之子，身分具足，形色端正，见者欢喜，利根聪明，安隐少病，无有非人，夺其精气。

【阿难问增益】

尔时，世尊告阿难言：如我称扬彼世尊药师琉璃光如来所有功德，此是诸佛甚深行处，难可解了，汝为信不？

阿难白言：大德世尊！我于如来所说契经，不生疑惑；所以者何？一切如来身语意业，无不清净。世尊！此日月轮，可令堕落；妙高山王，可使倾动，诸佛所言，无有异也。

世尊！有诸众生，信根不具，闻说诸佛甚深行处，作是思惟：云何但念药师琉璃光如来一佛名号，便获尔所功德胜利？由此不信，反生诽谤；彼于长夜，失大利乐，堕诸恶趣，流转无穷。

佛告阿难：是诸有情，若闻世尊药师琉璃光如来名号，至心受持，不生疑惑，堕恶趣者，无有是处。

阿难！此是诸佛甚深所行，难可信解；汝今能受，当知皆是如来威力。阿难！一切声闻、独觉，及未登地诸菩萨等，皆悉不能如实信解；惟除一生所系菩萨。阿难！人身难得，于三宝中，信敬尊重，亦难可得；得闻世尊药师琉璃光如来名号，复难于是。

阿难！彼药师琉璃光如来，无量菩萨行；无量善巧方便；无量广大愿；我若一劫，若一劫余而广说者，劫可速尽，彼佛行愿，善巧方便，无有尽也。

【救脱示延寿法】

尔时，众中有一菩萨摩訶萨，名曰救脱，即从座起，偏袒一肩，右膝著地，曲躬合掌而白佛言：大德世尊！像法转时，有诸众生，为种种患之所困厄，长病羸瘦，不能饮食，喉唇乾燥，见诸方暗，死相现前；父母亲属，朋友知识，啼泣围绕。然彼自身，卧在本处，见琰魔使，引其神识，至于琰魔法王之前；然诸有

情，有俱生神，随其所作，若罪若福，皆具书之，尽持授与琰魔法王。

尔时，彼王推问其人，算计所作，随其罪福而处断之。

时，彼病人亲属知识，若能为彼归依世尊药师琉璃光如来，请诸众僧，转读此经，然七层之灯，悬五色续命神幡，或有是处，彼识得还。如在梦中，明了自见；或经七日，或二十一日，或三十五日，或四十九日，彼识还时，如从梦觉，皆自忆知善不善业所得果报。由自证见业果报故，乃至命难，亦不造作诸恶之业。

是故，净信善男子、善女人等，皆应受持药师琉璃光如来名号，随力所能，恭敬供养。

【阿难问仪轨：1.救身病以延身命】

尔时，阿难问救脱菩萨曰：善男子！应云何恭敬供养彼世尊药师琉璃光如来？续命幡灯，复云何造？

救脱菩萨言：大德！若有病人，欲脱病苦，当为其人，七日七夜，受持八分斋戒，应以饮食及余资具，随力所办，供养苾刍僧；昼夜六时，礼拜供养彼世尊药师琉璃光如来；读诵此

经四十九遍；然四十九灯；造彼如来形像七躯，一一像前各置七灯，一一灯量大如车轮，乃至四十九日，光明不绝；造五色彩幡，长四十九搩手，应放杂类众生至四十九；可得过度危厄之难，不为诸横恶鬼所持。

【阿难问仪轨：2.救国难以延身命】

复次，阿难！若刹帝利灌顶王等，灾难起时，所谓人众疾疫难，他国侵逼难，自界叛逆难，星宿变怪难，日月薄蚀难，非时风雨难，过时不雨难。

彼刹帝利灌顶王等，尔时应于一切有情起慈悲心，赦诸系闭；依前所说供养之法，供养彼世尊药师琉璃光如来。

由此善根，及彼如来本愿力故，令其国界即得安隐：风雨顺时，谷稼成熟；一切有情无病欢乐；于其国中，无有暴恶药叉等神恼有情者；一切恶相，皆即隐没；而刹帝利灌顶王等，寿命色力，无病自在，皆得增益。

【阿难问仪轨：3.救诸难以延诸命】

阿难！若帝后妃主，储君王子，大臣辅相，中宫嫔女，百官黎庶，为病所苦，及余厄难；

亦应造立五色神幡，然灯续明，放诸生命，散杂色华，烧众名香，病得除愈，众难解脱。

【答阿难问延寿】

尔时，阿难问救脱菩萨言：善男子！云何已尽之命而可增益？救脱菩萨言：大德！汝岂不闻如来说有九横死耶？是故劝造续命幡灯，修诸福德；以修福故，尽其寿命，不经苦患。

阿难问言：九横云何？救脱菩萨言：若诸有情，得病虽轻，然无医药及看病者，设复遇医，授以非药，实不应死而便横死。又信世间邪魔外道，妖孽之师，妄说祸福，便生恐动，心不自正，卜问觅祸，杀种种众生，解奏神明，呼诸魍魉，请乞福佑，欲冀延年，终不能得；愚痴迷惑，信邪倒见，遂令横死，入于地狱，无有出期，是名初横。

二者，横被王法之所诛戮。三者，畋猎嬉戏，耽淫嗜酒，放逸无度，横为非人夺其精气。四者，横为火焚。五者，横为水溺。

六者，横为种种恶兽所噉。七者，横堕山崖。八者，横为毒药，厌祷咒咀，起尸鬼等之所中害。九者，饥渴所困，不得饮食而便横死。

是为如来略说横死，有此九种。其余复有无量诸横，难可具说。

【救脱重劝修度】

复次，阿难！彼琰魔王主领世间名籍之记。若诸有情，不孝五逆，破辱三宝，坏君臣法，毁于信戒，琰魔法王随罪轻重，考而罚之。是故我今劝诸有情，然灯造幡，放生修福，令度苦厄，不遭众难。

【药叉誓护】

尔时，众中有十二药叉大将，俱在会坐，所谓：

宫毗罗大将。伐折罗大将。迷企罗大将。
安底罗大将。頞你罗大将。珊底罗大将。
因达罗大将。波夷罗大将。摩虎罗大将。
真达罗大将。招杜罗大将。毗羯罗大将。

此十二药叉大将，一一各有七千药叉以为眷属，同时举声白佛言：世尊！我等今者，蒙佛威力，得闻世尊药师琉璃光如来名号，不复更有恶趣之怖。我等相率，皆同一心，乃至尽形归佛法僧，誓当荷负一切有情，为作义利饶益安乐。随于何等村城国邑，空闲林中，若有

流布此经，或复受持药师琉璃光如来名号，恭敬供养者，我等眷属卫护是人，皆使解脱一切苦难；诸有愿求，悉令满足。或有疾厄求度脱者，亦应读诵此经，以五色缕，结我名字，得如愿已，然后解结。

尔时，世尊赞诸药叉大将言：善哉！善哉！大药叉将！汝等念报世尊药师琉璃光如来恩德者，常应如是利益安乐一切有情。

【流通分】

尔时，阿难白佛言：世尊！当何名此法门？我等云何奉持？

佛告阿难：此法门名说药师琉璃光如来本愿功德；亦名说十二神将饶益有情结愿神咒；亦名拔除一切业障；应如是持。

时薄伽梵说是语已，诸菩萨摩訶萨，及大声闻，国王、大臣、婆罗门、居士、天、龙、药叉、健达缚、阿素洛、揭路荼、紧捺洛、莫呼洛伽，人非人等，一切大众，闻佛所说，皆大欢喜，信受奉行。

赞

十二药叉大将。助佛宣弘。五色彩缕结其名。
随愿悉圆成。怨业冰清。福寿永康宁。
南无药师海会佛菩萨（三称）

药师赞

药师如来琉璃光。焰网庄严无等伦。
无边行愿利有情。各遂所求皆不退。
南无东方净琉璃世界 药师琉璃光如来。

解冤咒

解结解结解冤结。解了多生冤和业。
洗心涤虑发虔诚。今对佛前求解结。
药师佛。药师佛。
消灾延寿药师佛。随心满愿药师佛。

回向偈

愿消三障诸烦恼。愿得智慧真明了。
普愿罪障悉消除。世世常行菩萨道。

佛说阿弥陀经

姚秦三藏法师鸠摩罗什 译

科判节自于法界佛教总会《佛说阿弥陀经科判》

【序分】

如是我闻。一时，佛在舍卫国，祇树给孤独园。与大比丘僧，千二百五十人俱，皆是大阿罗汉，众所知识。

长老舍利弗。摩诃目犍连。摩诃迦叶。摩诃迦旃延。摩诃俱絺罗。离婆多。周利槃陀伽。难陀。阿难陀。罗睺罗。憍梵波提。宾头卢颇罗堕。迦留陀夷。摩诃劫宾那。薄拘罗。阿菟楼駄。如是等诸大弟子。并诸菩萨摩诃萨。文殊师利法王子。阿逸多菩萨。乾陀诃提菩萨，常精进菩萨。与如是等诸大菩萨。及释提桓因等，无量诸天大众俱。

【详释极乐依正庄严令生信乐】

尔时，佛告长老舍利弗：从是西方，过十万亿佛土，有世界名曰极乐；其土有佛，号阿弥陀，今现在说法。舍利弗，彼土何故名为极

乐？其国众生，无有众苦，但受诸乐，故名极乐。

又舍利弗！极乐国土，七重栏楯、七重罗网、七重行树，皆是四宝周匝围绕，是故彼国名曰极乐。

又舍利弗！极乐国土，有七宝池、八功德水，充满其中。池底纯以金沙布地，四边阶道，金、银、琉璃、玻瓈合成，上有楼阁亦以金、银、琉璃、玻瓈、砗磲、赤珠、玛瑙，而严饰之。池中莲华，大如车轮，青色青光，黄色黄光，赤色赤光，白色白光，微妙香洁。舍利弗，极乐国土，成就如是功德庄严。

又舍利弗！彼佛国土，常作天乐，黄金为地，昼夜六时，雨天曼陀罗华。其土众生，常以清旦，各以衣祴，盛众妙华。供养他方十万亿佛，即以食时，还到本国，饭食经行。舍利弗，极乐国土，成就如是功德庄严。

复次舍利弗！彼国常有种种奇妙杂色之鸟，白鹤、孔雀、鸚鵡、舍利、迦陵频伽、共命之鸟。是诸众鸟，昼夜六时，出和雅音，其音演畅五根、五力、七菩提分、八圣道分，如

是等法。其土众生，闻是音已，皆悉念佛、念法、念僧。

舍利弗！汝勿谓此鸟实是罪报所生。所以者何？彼佛国土无三恶道。舍利弗！其佛国土，尚无恶道之名，何况有实。是诸众鸟，皆是阿弥陀佛欲令法音宣流变化所作。

舍利弗！彼佛国土，微风吹动，诸宝行树，及宝罗网，出微妙音。譬如百千种乐，同时俱作，闻是音者，自然皆生念佛、念法、念僧之心。舍利弗！其佛国土成就如是功德庄严。

【特显正报功德】

舍利弗！于汝意云何？彼佛何故号阿弥陀。舍利弗！彼佛光明无量，照十方国，无所障碍，是故号为阿弥陀。又舍利弗！彼佛寿命及其人民，无量无边阿僧祇劫，故名阿弥陀。

舍利弗！阿弥陀佛成佛以来，于今十劫。又舍利弗！彼佛有无量无边声闻弟子，皆阿罗汉，非是算数之所能知。诸菩萨众，亦复如是。舍利弗！彼佛国土成就如是功德庄严。

【特明净土殊胜劝令发愿】

又舍利弗！极乐国土，众生生者，皆是阿鞞跋致。其中多有一生补处，其数甚多，非是算数所能知之，但可以无量无边阿僧祇说。舍利弗！众生闻者，应当发愿，愿生彼国。所以者何？得与如是诸上善人俱会一处。

【正示持名功德令知修证】

舍利弗！不可以少善根福德因缘，得生彼国。舍利弗！若有善男子、善女人，闻说阿弥陀佛，执持名号；若一日，若二日，若三日，若四日，若五日，若六日，若七日，一心不乱。其人临命终时，阿弥陀佛与诸圣众，现在其前。是人终时，心不颠倒，即得往生阿弥陀佛极乐国土。

舍利弗！我见是利，故说此言：若有众生，闻是说者，应当发愿生彼国土。

【广引诸佛称赞令断疑惑】

舍利弗！如我今者，赞叹阿弥陀佛不可思议功德之利。

东方亦有阿閼鞞佛、须弥相佛、大须弥佛、须弥光佛、妙音佛，如是等恒河沙数诸佛；各于其国，出广长舌相，遍覆三千大千世界，说

诚实言：汝等众生，当信是称赞不可思议功德，一切诸佛所护念经。

舍利弗！南方世界有日月灯佛、名闻光佛、大焰肩佛、须弥灯佛、无量精进佛，如是等恒河沙数诸佛；各于其国，出广长舌相，遍覆三千大千世界，说诚实言：汝等众生，当信是称赞不可思议功德，一切诸佛所护念经。

舍利弗！西方世界有无量寿佛、无量相佛、无量幢佛、大光佛、大明佛、宝相佛、净光佛，如是等恒河沙数诸佛；各于其国，出广长舌相，遍覆三千大千世界，说诚实言：汝等众生，当信是称赞不可思议功德，一切诸佛所护念经。

舍利弗！北方世界有焰肩佛、最胜音佛、难沮佛、日生佛、网明佛，如是等恒河沙数诸佛；各于其国，出广长舌相，遍覆三千大千世界，说诚实言：汝等众生，当信是称赞不可思议功德，一切诸佛所护念经。

舍利弗！下方世界有师子佛、名闻佛、名光佛、达摩佛、法幢佛、持法佛，如是等恒河沙数诸佛；各于其国，出广长舌相，遍覆三千

大千世界，说诚实言：汝等众生，当信是称赞不可思议功德，一切诸佛所护念经。

舍利弗！上方世界有梵音佛、宿王佛、香上佛、香光佛、大焰肩佛、杂色宝华严身佛、娑罗树王佛、宝华德佛、见一切义佛、如须弥山佛，如是等恒河沙数诸佛；各于其国，出广长舌相，遍覆三千大千世界，说诚实言：汝等众生，当信是称赞不可思议功德，一切诸佛所护念经。

【明经应赞】

舍利弗！于汝意云何？何故名为一切诸佛所护念经？舍利弗！若有善男子、善女人，闻是经受持者，及闻诸佛名者。是诸善男子、善女人，皆为一切实诸佛之所护念，皆得不退转于阿耨多罗三藐三菩提。是故舍利弗！汝等皆当信受我语，及诸佛所说。

舍利弗！若有人已发愿，今发愿，当发愿，欲生阿弥陀佛国者；是诸人等，皆得不退转于阿耨多罗三藐三菩提。于彼国土，若已生，若今生，若当生。是故舍利弗！诸善男子、善女人，若有信者，应当发愿，生彼国土。

【佛赞功德稀有令感佛恩】

舍利弗！如我今者，称赞诸佛不可思议功德。

彼诸佛等，亦称赞我不可思议功德，而作是言：释迦牟尼佛能为甚难稀有之事，能于娑婆国土，五浊恶世，劫浊、见浊、烦恼浊、众生浊、命浊中，得阿耨多罗三藐三菩提，为诸众生说是一切世间难信之法。

舍利弗！当知我于五浊恶世，行此难事，得阿耨多罗三藐三菩提，为一切世间说此难信之法，是为甚难。

【流通分】

佛说此经已，舍利弗及诸比丘，一切世间天人阿修罗等，闻佛所说，欢喜信受，作礼而去。

地藏菩萨本愿经

唐于阗国三藏沙门实叉难陀 译

奉三柱香（合掌念三遍）

恭请 南无大慈大悲地藏王菩萨 慈悲护持

觉林菩萨偈：

华严第四会。夜摩天宫。无量菩萨来集。说偈赞佛。尔时觉林菩萨。承佛威力。遍观十方。而说颂言：

譬如工画师	分布诸彩色	虚妄取异相	大种无差别
大种中无色	色中无大种	亦不离大种	而有色可得
心中无彩画	彩画中无心	然不离于心	有彩画可得
彼心恒不住	无量难思议	示现一切色	各各不相知
譬如工画师	不能知自心	而由心故画	诸法性如是
心如工画师	能画诸世间	五蕴悉丛生	无法而不造
如心佛亦尔	如佛众生然	应知佛与心	体性皆无尽
若人知心行	普造诸世间	是人则见佛	了佛真实性
心不住于身	身亦不住心	而能作佛事	自在未曾有
若人欲了知	三世一切佛	应观法界性	一切唯心造

赞

稽首本然净心地	无尽佛藏大慈尊
南方世界涌香云	香雨花云及花雨
宝雨宝云无数种	为祥为瑞遍庄严
天人问佛是何因	佛言地藏菩萨至
三世如来同赞叹	十方菩萨共皈依
我今宿植善因缘	称扬地藏真功德

慈因积善，誓救众生。手中金锡，振开地狱之门。掌上明珠，光摄大千世界。智慧音里，吉祥云中，为阎浮提苦众生，作大证明功德主。大悲大愿，大圣大慈，地藏菩萨摩诃萨。

南无本师释迦牟尼佛（三称）

南无大愿地藏菩萨摩诃萨（三称）

开经偈

无上甚深微妙法	百千万劫难遭遇
我今见闻得受持	愿解如来真实义

忉利天宫神通品第一

如是我闻。一时佛在忉利天，为母说法。尔时十方无量世界，不可说不可说一切诸佛及大菩萨摩訶萨，皆来集会。赞叹释迦牟尼佛能于五浊恶世，现不可思议大智慧神通之力，调伏刚强众生，知苦乐法。各遣侍者，问讯世尊。

是时如来含笑，放百千万亿大光明云。所谓大圆满光明云、大慈悲光明云、大智慧光明云、大般若光明云、大三昧光明云、大吉祥光明云、大福德光明云、大功德光明云、大归依光明云、大赞叹光明云。

放如是等不可说光明云已，又出种种微妙之音，所谓檀波罗蜜音、尸波罗蜜音、羼提波罗蜜音、毗离耶波罗蜜音、禅波罗蜜音、般若波罗蜜音、慈悲音、喜舍音、解脱音、无漏音、智慧音、大智慧音、狮子吼音、大狮子吼音、云雷音、大云雷音。

出如是等不可说不可说音已，娑婆世界及他方国土，有无量亿天龙鬼神，亦集到忉利天宫。所谓四天王天、忉利天、须焰摩天、兜率陀天、化乐天、他化自在天、梵众天、梵辅天、大梵天、

少光天、无量光天、光音天、少净天、无量净天、遍净天、福生天、福爱天、广果天、无想天、无烦天、无热天、善见天、善现天、色究竟天、摩醯首罗天，乃至非想非非想处天，一切天众、龙众、鬼神等众，悉来集会。

复有他方国土及娑婆世界海神、江神、河神、树神、山神、地神、川泽神、苗稼神、昼神、夜神、空神、天神、饮食神、草木神，如是等神，皆来集会。

复有他方国土及娑婆世界诸大鬼王，所谓恶目鬼王、啖血鬼王、啖精气鬼王、啖胎卵鬼王、行病鬼王、摄毒鬼王、慈心鬼王、福利鬼王、大爱敬鬼王，如是等鬼王，皆来集会。

尔时释迦牟尼佛，告文殊师利法王子菩萨摩訶萨：汝观是一切诸佛菩萨及天龙鬼神，此世界、他世界，此国土、他国土，如是今来集会到忉利天者，汝知数否？文殊师利白佛言：世尊，若以我神力，千劫测度，不能得知。佛告文殊师利：吾以佛眼观故，犹不尽数。此皆是地藏菩萨久远劫来，已度、当度、未度，已成就、当成就、未成就。

文殊师利白佛言：世尊，我已过去久修善根，证无碍智，闻佛所言，即当信受。小果声闻、天龙八部，及未来世诸众生等，虽闻如来诚实之语，必怀疑惑。设使顶受，未免兴谤。唯愿世尊，广说地藏菩萨摩诃萨，因地作何行、立何愿，而能成就不思议事。

佛告文殊师利：譬如三千大千世界所有草木丛林、稻麻竹苇、山石微尘，一物一数，作一恒河；一恒河沙，一沙一界；一界之内，一尘一劫；一劫之内，所积尘数，尽充为劫。地藏菩萨证十地果位以来，千倍多于上喻，何况地藏菩萨在声闻、辟支佛地。文殊师利，此菩萨威神誓愿，不可思议。若未来世，有善男子善女人，闻是菩萨名字，或赞叹，或瞻礼，或称名，或供养，乃至彩画刻镂、塑漆形像，是人当得百返生于三十三天，永不堕恶道。

文殊师利，是地藏菩萨摩诃萨，于过去久远不可说不可说劫前，身为大长者子。时世有佛，号曰狮子奋迅具足万行如来。时长者子，见佛相好，千福庄严。因问彼佛，作何行愿，而得此相？时狮子奋迅具足万行如来告长者子：欲证此身，

当须久远度脱一切受苦众生。

文殊师利，时长者子因发愿言：我今尽未来际，不可计劫，为是罪苦六道众生，广设方便，尽令解脱，而我自身方成佛道。以是于彼佛前立斯大愿，于今百千万亿那由他不可说劫，尚为菩萨。

又于过去不可思议阿僧祇劫，时世有佛，号曰觉华定自在王如来，彼佛寿命四百千万亿阿僧祇劫。像法之中，有一婆罗门女，宿福深厚，众所钦敬，行住坐卧，诸天卫护。其母信邪，常轻三宝。是时圣女广设方便，劝诱其母，令生正见。而此女母，未全生信，不久命终，魂神堕在无间地狱。时婆罗门女，知母在世不信因果，计当随业，必生恶趣。遂卖家宅，广求香华，及诸供具，于先佛塔寺，大兴供养。见觉华定自在王如来，其形像在一寺中，塑画威容，端严毕备。

时婆罗门女，瞻礼尊容，倍生敬仰。私自念言：佛名大觉，具一切智。若在世时，我母死后，倘来问佛，必知处所。时婆罗门女，垂泣良久，瞻恋如来。忽闻空中声曰：泣者圣女，勿至悲哀，我今示汝母之去处。

婆罗门女合掌向空，而白空曰：是何神德，宽我忧虑？我自失母已来，昼夜忆恋，无处可问，知母生界。时空中有声，再报女曰：我是汝所瞻礼者，过去觉华定自在王如来。见汝忆母，倍于常情众生之分，故来告示。婆罗门女闻此声已，举身自扑，肢节皆损。左右扶侍，良久方苏。而白空曰：愿佛慈愍，速说我母生界。我今身心，将死不久。时觉华定自在王如来，告圣女曰：汝供养毕，但早返舍，端坐思惟吾之名号，即当知母所生去处。

时婆罗门女，寻礼佛已，即归其舍。以忆母故，端坐念觉华定自在王如来，经一日一夜。忽见自身到一海边，其水涌沸，多诸恶兽，尽复铁身，飞走海上，东西驰逐。见诸男子女人，百千万数，出没海中，被诸恶兽争取食啖。又见夜叉，其形各异，或多手多眼，多足多头，口牙外出，利刃如剑。驱诸罪人，使近恶兽。复自搏攫，头足相就。其形万类，不敢久视。时婆罗门女，以念佛力故，自然无惧。

有一鬼王，名曰无毒，稽首来迎，白圣女曰：善哉菩萨，何缘来此？时婆罗门女问鬼王曰：此

是何处？无毒答曰：此是大铁围山西面第一重海。圣女问曰：我闻铁围之内，地狱在中，是事实否？无毒答曰：实有地狱。圣女问曰：我今云何得到狱所？无毒答曰：若非威神，即须业力。非此二事，终不能到。

圣女又问：此水何缘，而乃涌沸，多诸罪人，及以恶兽？无毒答曰：此是阎浮提造恶众生，新死之者。经四十九日后，无人继嗣，为作功德，救拔苦难；生时又无善因。当据本业所感地狱，自然先渡此海。海东十万由旬，又有一海，其苦倍此。彼海之东，又有一海，其苦复倍。三业恶因之所招感，共号业海，其处是也。

圣女又问鬼王无毒曰：地狱何在？无毒答曰：三海之内，是大地狱，其数百千，各各差别。所谓大者，具有十八。次有五百，苦毒无量。次有千百，亦无量苦。

圣女又问大鬼王曰：我母死来未久，不知魂神当至何趣？鬼王问圣女曰：菩萨之母，在生习何行业？圣女答曰：我母邪见，讥毁三宝。设或暂信，旋又不敬。死虽日浅，未知生处。无毒问曰：菩萨之母，姓氏何等？圣女答曰：我父我母，

俱婆罗门种。父号尸罗善现，母号悦帝利。无毒合掌启菩萨曰：愿圣者却返本处，无至忧忆悲恋。悦帝利罪女，生天以来，经今三日。云承孝顺之子，为母设供修福，布施觉华定自在王如来塔寺。非唯菩萨之母得脱地狱，应是无间罪人，此日悉得受乐，俱同生讫。鬼王言毕，合掌而退。

婆罗门女寻如梦归。悟此事已，便于觉华定自在王如来塔像之前，立弘誓愿：愿我尽未来劫，应有罪苦众生，广设方便，使令解脱。

佛告文殊师利：时鬼王无毒者，当今财首菩萨是。婆罗门女者，即地藏菩萨是。

分身集会品第二

尔时百千万亿不可思不可议不可量不可说无量阿僧祇世界，所有地狱处分身地藏菩萨，俱来集在忉利天宫。以如来神力故，各以方面，与诸得解脱从业道出者，亦各有千万亿那由他数，共持香华，来供养佛。彼诸同来等辈，皆因地藏菩萨教化，永不退转于阿耨多罗三藐三菩提。是诸众等，久远劫来，流浪生死，六道受苦，暂无休息。以地藏菩萨广大慈悲，深誓愿故，各获果证。既至忉利，心怀踊跃，瞻仰如来，目不暂舍。

尔时世尊舒金色臂，摩百千万亿不可思不可议不可量不可说无量阿僧祇世界诸分身地藏菩萨摩訶萨顶，而作是言：吾于五浊恶世，教化如是刚强众生，令心调伏，舍邪归正。十有一二，尚恶习在。吾亦分身千百亿，广设方便。或有利根，闻即信受。或有善果，勤劝成就。或有暗钝，久化方归。或有业重，不生敬仰。如是等辈众生，各各差别，分身度脱。或现男子身，或现女人身，或现天龙身，或现神鬼身，或现山林川原、河池泉井，利及于人，悉皆度脱。或现天帝身，或现梵王身，或现转轮王身，或现居士身，或现国王身，或现宰辅身，或现官属身，或现比丘、比丘尼、优婆塞、优婆夷身，乃至声闻、罗汉、辟支佛、菩萨等身，而以化度。非但佛身独现其前。

汝观吾累劫勤苦，度脱如是等难化刚强罪苦众生。其有未调伏者，随业报应，若堕恶趣，受大苦时，汝当忆念吾在忉利天宫殷勤付嘱，令娑婆世界至弥勒出世已来众生，悉使解脱，永离诸苦，遇佛授记。

尔时诸世界分身地藏菩萨，共复一形，涕泪哀恋，白其佛言：我从久远劫来，蒙佛接引，使

获不可思议神力，具大智慧。我所分身，遍满百千万亿恒河沙世界。每一世界，化百千万亿身。每一身，度百千万亿人。令归敬三宝，永离生死，至涅槃乐。但于佛法中所为善事，一毛一涕、一沙一尘，或毫发许，我渐度脱，使获大利。唯愿世尊，不以后世恶业众生为虑。如是三白佛言：唯愿世尊，不以后世恶业众生为虑。

尔时佛赞地藏菩萨言：善哉善哉！吾助汝喜，汝能成就久远劫来发弘誓愿，广度将毕即证菩提。

观众生业缘品第三

尔时佛母摩耶夫人，恭敬合掌，问地藏菩萨言：圣者，阎浮众生，造业差别，所受报应，其事云何？地藏答言：千万世界，乃及国土，或有地狱，或无地狱；或有女人，或无女人；或有佛法，或无佛法；乃至声闻、辟支佛，亦复如是。非但地狱罪报一等。摩耶夫人重白菩萨：且愿闻于阎浮罪报所感恶趣。地藏答言：圣母，唯愿听受，我粗说之。佛母白言：愿圣者说。

尔时地藏菩萨白圣母言：南阎浮提罪报名号如是：若有众生，不孝父母，或至杀害，当堕无间地狱，千万亿劫，求出无期。若有众生，出佛

身血，毁谤三宝，不敬尊经，亦当堕于无间地狱，千万亿劫，求出无期。若有众生，侵损常住，玷污僧尼，或伽蓝内恣行淫欲，或杀或害，如是等辈，当堕无间地狱，千万亿劫，求出无期。若有众生，伪作沙门，心非沙门，破用常住，欺诳白衣，违背戒律，种种造恶，如是等辈，当堕无间地狱，千万亿劫，求出无期。若有众生，偷窃常住财物、谷米、饮食、衣服，乃至一物不与取者，当堕无间地狱，千万亿劫，求出无期。地藏白言：圣母，若有众生作如是罪，当堕五无间地狱，求暂停苦一念不得。

摩耶夫人重白地藏菩萨言：云何名为无间地狱？地藏白言：圣母，诸有地狱，在大铁围山之内。其大地狱，有一十八所。次有五百，名号各别。次有千百，名字亦别。无间狱者，其狱城周匝八万余里，其城纯铁，高一万里，城上火聚，少有空缺。其狱城中，诸狱相连，名号各别。独有一狱，名曰无间。其狱周匝万八千里，狱墙高一千里，悉是铁为，上火彻下，下火彻上。铁蛇铁狗，吐火驰逐，狱墙之上，东西而走。狱中有床，遍满万里。一人受罪，自见其身遍卧满床。

千万人受罪，亦各自见身满床上。众业所感，获报如是。又诸罪人，备受众苦。千百夜叉，及以恶鬼，口牙如剑，眼如电光，手复铜爪，拖拽罪人。复有夜叉，执大铁戟，中罪人身，或中口鼻，或中腹背，抛空翻接，或置床上。复有铁鹰，啖罪人目。复有铁蛇，缴罪人颈。百肢节内，悉下长钉，拔舌耕犁，抽肠剉斩，烔铜灌口，热铁缠身。万死千生，业感如是。动经亿劫，求出无期。此界坏时，寄生他界。他界次坏，转寄他方。他方坏时，展转相寄。此界成后，还复而来。无间罪报，其事如是。

又五事业感，故称无间。何等为五？一者，日夜受罪，以至劫数，无时间绝，故称无间。二者，一人亦满，多人亦满，故称无间。三者，罪器叉棒，鹰蛇狼犬，碓磨锯凿，剉斫镬汤，铁网铁绳，铁驴铁马，生革络首，热铁浇身，饥吞铁丸，渴饮铁汁，从年竟劫，数那由他，苦楚相连，更无间断，故称无间。四者，不问男子女人、羌胡夷狄、老幼贵贱、或龙或神、或天或鬼，罪行业感，悉同受之，故称无间。五者，若堕此狱，从初入时，至百千劫，一日一夜，万死万生，求

一念间暂住不得，除非业尽，方得受生，以此连绵，故称无间。

地藏菩萨白圣母言：无间地狱，粗说如是。若广说地狱罪器等名及诸苦事，一劫之中，求说不尽。摩耶夫人闻已，愁忧合掌，顶礼而退。

阎浮众生业感品第四

尔时地藏菩萨摩诃萨白佛言：世尊，我承佛如来威神力故，遍百千万亿世界，分是身形，救拔一切业报众生。若非如来大慈力故，即不能作如是变化。我今又蒙佛付嘱，至阿逸多成佛已来，六道众生，遣令度脱。唯然世尊，愿不有虑。

尔时佛告地藏菩萨：一切众生未解脱者，性识无定。恶习结业，善习结果。为善为恶，逐境而生。轮转五道，暂无休息，动经尘劫，迷惑障难。如鱼游网，将是长流，脱入暂出，又复遭网。以是等辈，吾当忧念。汝既毕是往愿、累劫重誓，广度罪辈，吾复何虑！

说是语时，会中有一菩萨摩诃萨，名定自在王，白佛言：世尊，地藏菩萨累劫以来，各发何愿，今蒙世尊殷勤赞叹？唯愿世尊，略而说之。

尔时世尊告定自在王菩萨：谛听谛听，善思

念之，吾当为汝分别解说。乃往过去无量阿僧祇那由他不可说劫，尔时有佛，号一切智成就如来、应供、正遍知、明行足、善逝、世间解、无上士、调御丈夫、天人师、佛、世尊，其佛寿命六万劫。未出家时，为小国王，与一邻国王为友，同行十善，饶益众生。其邻国内，所有人民，多造众恶。二王议计，广设方便。一王发愿：早成佛道，当度是辈，令使无余。一王发愿：若不先度罪苦，令是安乐，得至菩提，我终未愿成佛。

佛告定自在王菩萨：一王发愿早成佛者，即一切智成就如来是。一王发愿永度罪苦众生，未愿成佛者，即地藏菩萨是。

复于过去无量阿僧祇劫，有佛出世，名清净莲华目如来，其佛寿命四十劫。像法之中，有一罗汉，福度众生。因次教化，遇一女人，字曰光目，设食供养。罗汉问之：欲愿何等？光目答言：我以母亡之日，资福救拔，未知我母生处何趣？罗汉愍之，为入定观，见光目女母，堕在恶趣，受极大苦。罗汉问光目言：汝母在生，作何行业？今在恶趣，受极大苦。光目答言：我母所习，唯好食啖鱼鳖之属。所食鱼鳖，多食其子，或炒或

煮，恣情食啖，计其命数，千万复倍。尊者慈愍，如何哀救？罗汉愍之，为作方便，劝光目言：汝可志诚念清净莲华目如来，兼塑画形像，存亡获报。光目闻已，即舍所爱，寻画佛像而供养之，复恭敬心，悲泣瞻礼。忽于夜后，梦见佛身，金色晃耀，如须弥山，放大光明，而告光目：汝母不久当生汝家，才觉饥寒，即当言说。

其后家内婢生一子，未满三日，而乃言说。稽首悲泣，告于光目：生死业缘，果报自受。吾是汝母，久处暗冥。自别汝来，累堕大地狱。蒙汝福力，方得受生，为下贱人，又复短命，寿年十三，更落恶道。汝有何计，令吾脱免？光目闻说，知母无疑，哽咽悲啼，而白婢子：既是我母，合知本罪，作何行业，堕于恶道？婢子答言：以杀害、毁骂二业受报。若非蒙福救拔吾难，以是业故，未合解脱。光目问言：地狱罪报，其事云何？婢子答言：罪苦之事，不忍称说。百千岁中，卒白难竟。

光目闻已，啼泪号泣，而白空界：愿我之母，永脱地狱。毕十三岁，更无重罪及历恶道。十方诸佛，慈哀愍我，听我为母所发广大誓愿：若得

我母永离三涂及斯下贱，乃至女人之身永劫不受者。愿我自今日后，对清净莲华目如来像前，却后百千万亿劫中，应有世界，所有地狱及三恶道诸罪苦众生，誓愿救拔，令离地狱恶趣、畜生、饿鬼等。如是罪报等人，尽成佛竟，我然后方成正觉！发誓愿已，具闻清净莲华目如来而告之曰：光目，汝大慈愍，善能为母发如是大愿。吾观汝母十三岁毕，舍此报已，生为梵志，寿年百岁。过是报后，当生无忧国土，寿命不可计劫。后成佛果，广度人天，数如恒河沙。

佛告定自在王：尔时罗汉，福度光目者，即无尽意菩萨是。光目母者，即解脱菩萨是。光目女者，即地藏菩萨是。过去久远劫中，如是慈愍，发恒河沙愿，广度众生。

未来世中，若有男子女人，不行善者、行恶者，乃至不信因果者、邪淫妄语者、两舌恶口者、毁谤大乘者，如是诸业众生，必堕恶趣。若遇善知识，劝令一弹指间归依地藏菩萨，是诸众生即得解脱三恶道报。若能志心归敬及瞻礼赞叹，香华、衣服、种种珍宝、或复饮食，如是奉事者，未来百千万亿劫中，常在诸天，受胜妙乐。若天

福尽，下生人间，犹百千劫常为帝王，能忆宿命因果本末。

定自在王，如是地藏菩萨有如此不可思议大威神力，广利众生。汝等诸菩萨，当记是经，广宣流布。

定自在王白佛言：世尊，愿不有虑。我等千万亿菩萨摩訶萨，必能承佛威神，广演是经，于阎浮提，利益众生。定自在王菩萨白世尊已，合掌恭敬，作礼而退。

尔时四方天王俱从座起，合掌恭敬，白佛言：世尊，地藏菩萨于久远劫来，发如是大愿，云何至今犹度未绝，更发广大誓言？唯愿世尊，为我等说。

佛告四天王：善哉善哉！吾今为汝及未来、现在天人众等广利益故，说地藏菩萨于娑婆世界阎浮提内，生死道中，慈悲救拔度脱一切罪苦众生，方便之事。四天王言：唯然世尊，愿乐欲闻。

佛告四天王：地藏菩萨久远劫来，迄至于今，度脱众生，犹未毕愿。慈愍此世罪苦众生，复观未来无量劫中，因蔓不断，以是之故，又发重愿。如是菩萨，于娑婆世界阎浮提中，百千万亿方便，

而为教化。

四天王，地藏菩萨若遇杀生者，说宿殃短命报。若遇窃盗者，说贫穷苦楚报。若遇邪淫者，说雀鸽鸳鸯报。若遇恶口者，说眷属斗争报。若遇毁谤者，说无舌疮口报。若遇瞋恚者，说丑陋癰残报。若遇悭吝者，说所求违愿报。若遇饮食无度者，说饥渴咽病报。若遇畋猎恣情者，说惊狂丧命报。若遇悖逆父母者，说天地灾杀报。若遇烧山林木者，说狂迷取死报。若遇前后父母恶毒者，说返生鞭挞现受报。若遇网捕生雏者，说骨肉分离报。若遇毁谤三宝者，说盲聋喑哑报。若遇轻法慢教者，说永处恶道报。若遇破用常住者，说亿劫轮回地狱报。若遇污梵诬僧者，说永在畜生报。若遇汤火斩斫伤生者，说轮回递偿报。若遇破戒犯斋者，说禽兽饥饿报。若遇非理毁用者，说所求阙绝报。若遇吾我贡高者，说卑使下贱报。若遇两舌斗乱者，说无舌百舌报。若遇邪见者，说边地受生报。

如是等阎浮提众生，身口意业，恶习结果，百千报应，今粗略说。如是等阎浮提众生业感差别，地藏菩萨百千方便而教化之。是诸众生，先

受如是等报，后堕地狱，动经劫数，无有出期。是故汝等护人护国，无令是诸众业迷惑众生。四天王闻已，涕泪悲叹，合掌而退。

地狱名号品第五

尔时普贤菩萨摩诃萨白地藏菩萨言：仁者，愿为天龙四众，及未来、现在一切众生，说娑婆世界及阎浮提罪苦众生，所受报处、地狱名号及恶报等事。使未来世末法众生，知是果报。

地藏答言：仁者，我今承佛威神及大士之力，略说地狱名号及罪报、恶报之事。仁者，阎浮提东方有山，号曰铁围，其山黑邃，无日月光。有大地狱，号极无间。又有地狱，名大阿鼻。复有地狱，名曰四角。复有地狱，名曰飞刀。复有地狱，名曰火箭。复有地狱，名曰夹山。复有地狱，名曰通枪。复有地狱，名曰铁车。复有地狱，名曰铁床。复有地狱，名曰铁牛。复有地狱，名曰铁衣。复有地狱，名曰千刃。复有地狱，名曰铁驴。复有地狱，名曰烱铜。复有地狱，名曰抱柱。复有地狱，名曰流火。复有地狱，名曰耕舌。复有地狱，名曰剉首。复有地狱，名曰烧脚。复有地狱，名曰啖眼。复有地狱，名曰铁丸。复有地

狱，名曰诤论。复有地狱，名曰铁鉢。复有地狱，名曰多瞋。

地藏白言：仁者，铁围之内，有如是等地狱，其数无限。更有叫唤地狱、拔舌地狱、粪尿地狱、铜锁地狱、火象地狱、火狗地狱、火马地狱、火牛地狱、火山地狱、火石地狱、火床地狱、火梁地狱、火鹰地狱、锯牙地狱、剥皮地狱、饮血地狱、烧手地狱、烧脚地狱、倒刺地狱、火屋地狱、铁屋地狱、火狼地狱，如是等地狱。其中各各复有诸小地狱，或一或二，或三或四，乃至百千，其中名号，各各不同。

地藏菩萨告普贤菩萨言：仁者，此者皆是南阎浮提行恶众生，业感如是。业力甚大，能敌须弥，能深巨海，能障圣道。是故众生，莫轻小恶，以为无罪。死后有报，纤毫受之。父子至亲，歧路各别，纵然相逢，无肯代受。我今承佛威力，略说地狱罪报之事，唯愿仁者暂听是言。

普贤答言：吾已久知三恶道报，望仁者说，令后世末法一切恶行众生，闻仁者说，使令归佛。

地藏白言：仁者，地狱罪报，其事如是：或有地狱，取罪人舌，使牛耕之。或有地狱，取罪

人心，夜叉食之。或有地狱，镬汤盛沸，煮罪人身。或有地狱，赤烧铜柱，使罪人抱。或有地狱，使诸火烧，趁及罪人。或有地狱，一向寒冰。或有地狱，无限粪尿。或有地狱，纯飞鏃鏃。或有地狱，多攒火枪。或有地狱，唯撞胸背。或有地狱，但烧手足。或有地狱，盘缴铁蛇。或有地狱，驱逐铁狗。或有地狱，尽驾铁骡。

仁者，如是等报，各各狱中，有百千种业道之器，无非是铜、是铁、是石、是火，此四种物，众业行感。若广说地狱罪报等事，一一狱中，更有百千种苦楚，何况多狱。我今承佛威神及仁者问，略说如是。若广解说，穷劫不尽。

如来赞叹品第六

尔时世尊举身放大光明，遍照百千万亿恒河沙等诸佛世界。出大音声，普告诸佛世界一切诸菩萨摩訶萨及天龙鬼神、人非人等：听吾今日称扬赞叹地藏菩萨摩訶萨，于十方世界，现大不可思议威神慈悲之力，救护一切罪苦之事。吾灭度后，汝等诸菩萨大士，及天龙鬼神等，广作方便，卫护是经，令一切众生证涅槃乐。

说是语已，会中有一菩萨，名曰普广，合掌

恭敬而白佛言：今见世尊赞叹地藏菩萨，有如是不可思议大威神德。唯愿世尊，为未来世末法众生，宣说地藏菩萨利益人天因果等事，使诸天龙八部，及未来世众生，顶受佛语。尔时世尊告普广菩萨及四众等：谛听谛听，吾当为汝略说地藏菩萨利益人天福德之事。普广白言：唯然世尊，愿乐欲闻。

佛告普广菩萨：未来世中，若有善男子善女人，闻是地藏菩萨摩訶萨名者，或合掌者、赞叹者、作礼者、恋慕者，是人超越三十劫罪。

普广，若有善男子善女人，或彩画形像，或土石胶漆、金银铜铁，作此菩萨，一瞻一礼者，是人百返生于三十三天，永不堕于恶道。假如天福尽故，下生人间，犹为国王，不失大利。若有女人，厌女人身，尽心供养地藏菩萨画像，及土石胶漆铜铁等像，如是日日不退，常以华香、饮食、衣服、缯彩、幢幡、钱宝物等供养。是善女人，尽此一报女身，百千万劫，更不生有女人世界，何况复受。除非慈愿力故，要受女身，度脱众生。承斯供养地藏力故，及功德力，百千万劫不受女身。

复次普广，若有女人，厌是丑陋多疾病者。但于地藏像前，志心瞻礼食顷之间，是人千万劫中，所受生身，相貌圆满。是丑陋女人，如不厌女身，即百千万亿生中，常为王女，乃及王妃，宰辅大姓、大长者女，端正受生，诸相圆满。由志心故，瞻礼地藏菩萨，获福如是。

复次普广，若有善男子善女人，能对菩萨像前，作诸伎乐及歌咏赞叹、香华供养，乃至劝于一人多人。如是等辈，现在世中，及未来世，常得百千鬼神日夜卫护，不令恶事辄闻其耳，何况亲受诸横。

复次普广，未来世中，若有恶人及恶神、恶鬼，见有善男子善女人归敬、供养、赞叹、瞻礼地藏菩萨形像，或妄生讥毁、谤无功德及利益事，或露齿笑，或背面非，或劝人共非，或一人非，或多人非，乃至一念生讥毁者。如是之人，贤劫千佛灭度，讥毁之报，尚在阿鼻地狱，受极重罪。过是劫已，方受饿鬼。又经千劫，复受畜生。又经千劫，方得人身。纵受人身，贫穷下贱，诸根不具，多被恶业来结其心，不久之间，复堕恶道。是故普广，讥毁他人供养，尚获此报，何况别生

恶见毁灭。

复次普广，若未来世，有男子女人，久处床枕，求生求死，了不可得。或夜梦恶鬼，乃及家亲，或游险道，或多魇寐，共鬼神游。日月岁深，转复尪瘵，眠中叫苦，惨凄不乐者。此皆是业道论对，未定轻重，或难舍寿，或不得愈。男女俗眼，不辨是事。但当对诸佛菩萨像前，高声转读此经一遍。或取病人可爱之物，或衣服、宝贝、庄园、舍宅，对病人前，高声唱言：我某甲等，为是病人，对经像前舍诸等物，或供养经像，或造佛菩萨形像，或造塔寺，或燃油灯，或施常住。如是三白病人，遣令闻知。假令诸识分散，至气尽者，乃至一日、二日、三日、四日至七日以来，但高声白、高声读经，是人命终之后，宿殃重罪，至于五无间罪，永得解脱；所受生处，常知宿命。何况善男子善女人，自书此经，或教人书，或自塑画菩萨形像，乃至教人塑画，所受果报，必获大利。是故普广，若见有人读诵是经乃至一念赞叹是经，或恭敬者。汝须百千万方便，劝是等人，勤心莫退，能得未来、现在千万亿不可思议功德。

复次普广，若未来世诸众生等，或梦或寐，

见诸鬼神乃及诸形，或悲或啼，或愁或叹，或恐或怖。此皆是一生、十生、百生、千生过去父母、男女、弟妹、夫妻、眷属，在于恶趣，未得出离，无处希望福力救拔，当告宿世骨肉，使作方便，愿离恶道。普广，汝以神力，遣是眷属，令对诸佛菩萨像前，志心自读此经，或请人读，其数三遍或七遍。如是恶道眷属，经声毕是遍数，当得解脱，乃至梦寐之中，永不复见。

复次普广，若未来世，有诸下贱等人，或奴或婢，乃至诸不自由之人，觉知宿业，要忏悔者，志心瞻礼地藏菩萨形像，乃至一七日中，念菩萨名，可满万遍。如是等人，尽此报后，千万生中，常生尊贵，更不经三恶道苦。

复次普广，若未来世中，阎浮提内，刹利、婆罗门、长者、居士、一切人等，及异姓种族，有新产者，或男或女。七日之中，早与读诵此不思議经典，更为念菩萨名，可满万遍。是新生子，或男或女，宿有殃报，便得解脱，安乐易养，寿命增长。若是承福生者，转增安乐，及与寿命。

复次普广，若未来世众生，于月一日、八日、十四日、十五日、十八日、二十三、二十四、二

十八、二十九日、乃至三十日，是诸日等，诸罪结集，定其轻重。南阎浮提众生，举止动念，无不是业，无不是罪。何况恣情杀害、窃盗、邪淫、妄语，百千罪状。能于是十斋日，对佛菩萨、诸贤圣像前，读是经一遍，东西南北百由旬内，无诸灾难。当此居家，若长若幼，现在未来百千岁中，永离恶趣。能于十斋日每转一遍，现世令此居家，无诸横病，衣食丰溢。

是故普广，当知地藏菩萨有如是等不可说百千万亿大威神力利益之事。阎浮众生，于此大士，有大因缘。是诸众生，闻菩萨名，见菩萨像，乃至闻是经三字五字，或一偈一句者，现在殊妙安乐，未来之世，百千万生，常得端正，生尊贵家。

尔时普广菩萨，闻佛如来称扬赞叹地藏菩萨已，胡跪合掌，复白佛言：世尊，我久知是大士有如此不可思议神力，及大誓愿力，为未来众生遣知利益，故问如来，唯然顶受。世尊，当何名此经？使我云何流布？

佛告普广：此经有三名，一名地藏本愿，亦名地藏本行，亦名地藏本誓力经。缘此菩萨久远劫来发大重愿，利益众生，是故汝等，依愿流布。

普广闻已，合掌恭敬，作礼而退。

利益存亡品第七

尔时地藏菩萨摩诃萨白佛言：世尊，我观是阎浮众生，举心动念，无非是罪。脱获善利，多退初心。若遇恶缘，念念增益。是等辈人，如履泥塗，负于重石，渐困渐重，足步深邃。若得遇知识，替与减负，或全与负。是知识有大力故，复相扶助，劝令牢脚，若达平地，须省恶路，无再经历。

世尊，习恶众生，从纤毫间，便至无量。是诸众生有如此习，临命终时，父母眷属宜为设福，以资前路。或悬幡盖及燃油灯；或转读尊经；或供养佛像及诸圣像；乃至念佛菩萨及辟支佛名字，一名一号，历临终人耳根，或闻在本识。是诸众生所造恶业，计其感果，必堕恶趣。缘是眷属为临终人修此圣因，如是众罪，悉皆消灭。若能更为身死之后，七七日内，广造众善，能便是诸众生永离恶趣，得生人天，受胜妙乐，现在眷属利益无量。

是故我今对佛世尊及天龙八部、人非人等，劝于阎浮提众生，临终之日，慎勿杀害，及造恶

缘，拜祭鬼神，求诸魍魉。何以故？尔所杀害，乃至拜祭，无纤毫之力利益亡人，但结罪缘，转增深重。假使来世，或现在生，得获圣分，生人天中，缘是临终被诸眷属造是恶因，亦令是命终人殃累对辩，晚生善处。

何况临命终人，在生未曾有少善根，各据本业，自受恶趣，何忍眷属更为增业？譬如有人从远地来，绝粮三日，所负担物，强过百斤，忽遇邻人，更附少物，以是之故，转复困重。世尊，我观阎浮众生，但能于诸佛教中，乃至善事，一毛一滴、一沙一尘，如是利益，悉皆自得。

说是语时，会中有一长者，名曰大辩，是长者久证无生，化度十方，现长者身，合掌恭敬，问地藏菩萨言：大士，是南阎浮提众生，命终之后，小大眷属为修功德，乃至设斋、造众善因，是命终人得大利益及解脱否？

地藏答言：长者，我今为未来现在一切众生，承佛威力，略说是事。长者，未来现在诸众生等，临命终日，得闻一佛名、一菩萨名、一辟支佛名，不问有罪无罪，悉得解脱。若有男子女人，在生不修善因，多造众罪。命终之后，眷属小大为造

福利、一切圣事，七分之一，而乃获一；六分功德，生者自利。以是之故，未来现在善男女等，闻健自修，分分已获。

无常大鬼，不期而到。冥冥游神，未知罪福。七七日内，如痴如聋。或在诸司，辩论业果，审定之后，据业受生。未测之间，千万愁苦，何况堕于诸恶趣等。是命终人，未得受生，在七七日内，念念之间，望诸骨肉眷属，与造福力救拔。过是日后，随业受报。若是罪人，动经千百岁中，无解脱日。若是五无间罪，堕大地狱，千劫万劫，永受众苦。

复次长者，如是罪业众生，命终之后，眷属骨肉为修营斋，资助业道。未斋食竟，及营斋之次，米泔菜叶，不弃于地；乃至诸食未献佛僧，勿得先食。如有违食及不精勤，是命终人，了不得力。如精勤护净，奉献佛僧，是命终人，七分获一。是故长者，阎浮众生，若能为其父母乃至眷属，命终之后，设斋供养，志心勤恳。如是之人，存亡获利。

说是语时，忉利天宫有千万亿那由他阎浮鬼神，悉发无量菩提之心。大辩长者，作礼而退。

阎罗王众赞叹品第八

尔时铁围山内有无量鬼王，与阎罗天子俱诣忉利，来到佛所。所谓恶毒鬼王、多恶鬼王、大诤鬼王、白虎鬼王、血虎鬼王、赤虎鬼王、散殃鬼王、飞身鬼王、电光鬼王、狼牙鬼王、千眼鬼王、啖兽鬼王、负石鬼王、主耗鬼王、主祸鬼王、主食鬼王、主财鬼王、主畜鬼王、主禽鬼王、主兽鬼王、主魅鬼王、主产鬼王、主命鬼王、主疾鬼王、主险鬼王、三目鬼王、四目鬼王、五目鬼王、祁利失王、大祁利失王、祁利叉王、大祁利叉王、阿那吒王、大阿那吒王。如是等大鬼王，各各与百千诸小鬼王，尽居阎浮提，各有所执，各有所主。

是诸鬼王与阎罗天子，承佛威神及地藏菩萨摩诃萨力，俱诣忉利，在一面立。

尔时阎罗天子胡跪合掌，白佛言：世尊，我等今者与诸鬼王，承佛威神及地藏菩萨摩诃萨力，方得诣此忉利大会，亦是我等获善利故。我今有小疑事，敢问世尊，唯愿世尊慈悲宣说。佛告阎罗天子：恣汝所问，吾为汝说。

是时阎罗天子瞻礼世尊，及回视地藏菩萨，

而白佛言：世尊，我观地藏菩萨，在六道中，百千方便而度罪苦众生，不辞疲倦，是大菩萨有如是不可思议神通之事。然诸众生，获脱罪报，未久之间，又堕恶道。世尊，是地藏菩萨既有如是不可思议神力，云何众生而不依止善道，永取解脱？唯愿世尊，为我解说。

佛告阎罗天子：南阎浮提众生，其性刚强，难调难伏。是大菩萨，于百千劫，头头救拔如是众生，早令解脱。是罪报人，乃至堕大恶趣，菩萨以方便力，拔出根本业缘，而遣悟宿世之事。自是阎浮众生结恶习重，旋出旋入。劳斯菩萨，久经劫数，而作度脱。

譬如有人，迷失本家，误入险道。其险道中，多诸夜叉及虎狼狮子、虺蛇蝮蝎。如是迷人，在险道中，须臾之间，即遭诸毒。有一知识，多解大术，善禁是毒，乃及夜叉诸恶毒等。忽逢迷人，欲进险道。而语之言：咄哉男子，为何事故，而入此路？有何异术，能制诸毒？是迷路者，忽闻是语，方知险道，即便退步，求出此路。是善知识提携接手，引出险道，免诸恶毒，至于好道，令得安乐。而语之言：咄哉迷人，自今以后，勿

履是道。此路入者，卒难得出，复损性命。是迷路人，亦生感重。临别之时，知识又言：若见亲知及诸路人，若男若女，言于此路多诸毒恶，丧失性命。无令是众自取其死。

是故地藏菩萨具大慈悲，救拔罪苦众生，生人天中，令受妙乐。是诸罪众，知业道苦，脱得出离，永不再历。如迷路人，误入险道，遇善知识，引接令出，永不复入。逢见他人，复劝莫入，自言因是迷故，得解脱竟，更不复入。若再履践，犹尚迷误，不觉旧曾所落险道，或致失命。如堕恶趣，地藏菩萨方便力故，使令解脱，生人天中，旋又再入。若业结重，永处地狱，无解脱时。

尔时恶毒鬼王合掌恭敬白佛言：世尊，我等诸鬼王，其数无量。在阎浮提，或利益人，或损害人，各各不同。然是业报，使我眷属，游行世界，多恶少善。过人家庭，或城邑聚落、庄园房舍，或有男子女人，修毛发善事，乃至悬一幡一盖，少香少华供养佛像及菩萨像；或转读尊经，烧香供养一句一偈。我等鬼王，敬礼是人，如过去现在未来诸佛。敕诸小鬼，各有大力及土地分，便令卫护，不令恶事横事、恶病横病乃至不如意

事，近于此舍等处，何况入门。

佛赞鬼王：善哉善哉！汝等及与阎罗，能如是拥护善男女等。吾亦告梵王帝释，令卫护汝。

说是语时，会中有一鬼王，名曰主命，白佛言：世尊，我本业缘，主阎浮人命，生时死时，我皆主之。在我本愿，甚欲利益。自是众生，不会我意，致令生死俱不得安。何以故？是阎浮提人初生之时，不问男女，或欲生时，但作善事，增益舍宅，自令土地无量欢喜，拥护子母，得大安乐，利益眷属。或已生下，慎勿杀害，取诸鲜味供给产母，及广聚眷属，饮酒食肉，歌乐弦管，能令子母不得安乐。

何以故？是产难时，有无数恶鬼及魍魉精魅，欲食腥血。是我早令舍宅土地灵祇，荷护子母，使令安乐，而得利益。如是之人，见安乐故，便合设福，答诸土地。翻为杀害，聚集眷属。以是之故，犯殃自受，子母俱损。

又阎浮提临命终人，不问善恶，我欲令是命终之人，不落恶道。何况自修善根，增我力故。是阎浮提行善之人，临命终时，亦有百千恶道鬼神，或变作父母乃至诸眷属，引接亡人，令落恶

道，何况本造恶者。

世尊，如是阎浮提男子女人，临命终时，神识昏昧，不辨善恶，乃至眼耳更无见闻。是诸眷属，当须设大供养，转读尊经，念佛菩萨名号。如是善缘，能令亡者离诸恶道，诸魔鬼神悉皆退散。世尊，一切众生临命终时，若得闻一佛名一菩萨名，或大乘经典一句一偈。我观如是辈人，除五无间杀害之罪，小小恶业，合堕恶趣者，寻即解脱。

佛告主命鬼王：汝大慈故，能发如是大愿，于生死中护诸众生。若未来世中，有男子女人，至生死时，汝莫退是愿，总令解脱，永得安乐。鬼王白佛言：愿不有虑。我毕是形，念念拥护阎浮众生，生时死时，俱得安乐。但愿诸众生，于生死时，信受我语，无不解脱，获大利益。

尔时佛告地藏菩萨：是大鬼王主命者，已曾经百千生作大鬼王，于生死中，拥护众生。是大士慈悲愿故，现大鬼身，实非鬼也。却后过一百七十劫，当得成佛，号曰无相如来，劫名安乐，世界名净住，其佛寿命不可计劫。地藏，是大鬼王，其事如是，不可思议。所度人天亦不可限量。

称佛名号品第九

尔时地藏菩萨摩诃萨白佛言：世尊，我今为未来众生演利益事，于生死中，得大利益。唯愿世尊，听我说之。佛告地藏菩萨：汝今欲兴慈悲，救拔一切罪苦六道众生，演不思議事。今正是时，唯当速说。吾即涅槃，使汝早毕是愿，吾亦无忧现在未来一切众生。

地藏菩萨白佛言：世尊，过去无量阿僧祇劫，有佛出世，号无边身如来。若有男子女人，闻是佛名，暂生恭敬，即得超越四十劫生死重罪。何况塑画形像，供养赞叹，其人获福无量无边。

又于过去恒河沙劫，有佛出世，号宝性如来。若有男子女人，闻是佛名，一弹指顷发心归依，是人于无上道永不退转。

又于过去，有佛出世，号波头摩胜如来。若有男子女人，闻是佛名，历于耳根，是人当得千返生于六欲天中，何况志心称念。

又于过去不可说不可说阿僧祇劫，有佛出世，号狮子吼如来。若有男子女人，闻是佛名，一念归依，是人得遇无量诸佛，摩顶授记。

又于过去，有佛出世，号拘留孙佛。若有男

子女人，闻是佛名，志心瞻礼，或复赞叹，是人于贤劫千佛会中，为大梵王，得授上记。

又于过去，有佛出世，号毗婆尸佛。若有男子女人，闻是佛名，永不堕恶道，常生人天，受胜妙乐。

又于过去无量无数恒河沙劫，有佛出世，号宝胜如来。若有男子女人，闻是佛名，毕竟不堕恶道，常在天上，受胜妙乐。

又于过去，有佛出世，号宝相如来。若有男子女人，闻是佛名，生恭敬心，是人不久得阿罗汉果。

又于过去无量阿僧祇劫，有佛出世，号袈裟幢如来。若有男子、女人，闻是佛名者，超一百大劫生死之罪。

又于过去，有佛出世，号大通山王如来。若有男子女人，闻是佛名者，是人得遇恒河沙佛，广为说法，必成菩提。

又于过去，有净月佛、山王佛、智胜佛、净名王佛、智成就佛、无上佛、妙声佛、满月佛、月面佛，有如是等不可说佛。

世尊，现在未来一切众生，若天若人，若男

若女，但念得一佛名号，功德无量，何况多名。是众生等，生时死时，自得天利，终不堕恶道。若有临命终人，家中眷属乃至一人，为是病人高声念一佛名。是命终人，除五无间罪，余业报等，悉得消灭。是五无间罪，虽至极重，动经亿劫，了不得出。承斯临命终时，他人为其称念佛名，于是罪中，亦渐消灭。何况众生自称自念，获福无量，灭无量罪。

校量布施功德缘品第十

尔时地藏菩萨摩訶萨，承佛威神，从座而起，胡跪合掌，白佛言：世尊，我观业道众生，校量布施，有轻有重。有一生受福，有十生受福，有百生、千生受大福利者。是事云何？唯愿世尊，为我说之。

尔时佛告地藏菩萨：吾今于忉利天宫一切众会，说阎浮提布施校量功德轻重。汝当谛听，吾为汝说。地藏白佛言：我疑是事，愿乐欲闻。

佛告地藏菩萨：南阎浮提，有诸国王、宰辅大臣、大长者、大刹利、大婆罗门等，若遇最下贫穷，乃至癡残喑哑、聋痴无目，如是种种不完具者。是大国王等，欲布施时，若能具大慈悲，

下心含笑，亲手遍布施，或使人施，软言慰谕。是国王等，所获福利，如布施百恒河沙佛功德之利。何以故？缘是国王等，于是最贫贱辈及不完具者，发大慈心，是故福利有如此报。百千生中，常得七宝具足，何况衣食受用。

复次地藏，若未来世，有诸国王至婆罗门等，遇佛塔寺，或佛形像，乃至菩萨、声闻、辟支佛像，躬自营办，供养布施。是国王等，当得三劫为帝释身，受胜妙乐。若能以此布施福利，回向法界，是大国王等，于十劫中，常为大梵天王。

复次地藏，若未来世，有诸国王至婆罗门等，遇先佛塔庙，或至经像，毁坏破落，乃能发心修补。是国王等，或自营办，或劝他人，乃至百千人等布施结缘。是国王等，百千生中，常为转轮王身。如是他人同布施者，百千生中，常为小国王身。更能于塔庙前，发回向心，如是国王，乃至诸人，尽成佛道。以此果报，无量无边。

复次地藏，未来世中，有诸国王及婆罗门等，见诸老病，及生产妇女，若一念间，具大慈心，布施医药、饮食、卧具，使令安乐。如是福利最不思议，一百劫中常为净居天主，二百劫中常为

六欲天主，毕竟成佛，永不堕恶道，乃至百千生中，耳不闻苦声。

复次地藏，若未来世中，有诸国王及婆罗门等，能作如是布施，获福无量。更能回向，不问多少，毕竟成佛，何况释梵转轮之报。是故地藏，普劝众生，当如是学。

复次地藏，未来世中，若善男子善女人，于佛法中种少善根，毛发沙尘等许，所受福利，不可为喻。

复次地藏，未来世中，若有善男子善女人，遇佛形像、菩萨形像、辟支佛形像、转轮王形像，布施供养，得无量福，常在人天，受胜妙乐。若能回向法界，是人福利，不可为喻。

复次地藏，未来世中，若有善男子善女人，遇大乘经典，或听闻一偈一句，发殷重心，赞叹恭敬，布施供养。是人获大果报，无量无边。若能回向法界，其福不可为喻。

复次地藏，若未来世中，有善男子善女人，遇佛塔寺、大乘经典。新者，布施供养，瞻礼赞叹，恭敬合掌。若遇故者，或毁坏者，修补营理，或独发心，或劝多人同共发心。如是等辈，三十

生中，常为诸小国王。檀越之人，常为轮王，还以善法教化诸小国王。

复次地藏，未来世中，若有善男子善女人，于佛法中所种善根，或布施供养，或修补塔寺，或装理经典，乃至一毛一尘、一沙一涕。如是善事，但能回向法界，是人功德，百千生中，受上妙乐。如但回向自家眷属，或自身利益，如是之果，即三生受乐，舍一得万报。是故地藏，布施因缘，其事如是。

地神护法品第十一

尔时坚牢地神白佛言：世尊，我从昔来，瞻视顶礼无量菩萨摩訶萨，皆是大不可思议神通智慧，广度众生。是地藏菩萨摩訶萨，于诸菩萨，誓愿深重。世尊，是地藏菩萨，于阎浮提有大因缘。如文殊、普贤、观音、弥勒，亦化百千身形，度于六道，其愿尚有毕竟。是地藏菩萨，教化六道一切众生，所发誓愿劫数，如千百亿恒河沙。

世尊，我观未来及现在众生，于所住处，于南方清洁之地，以土石竹木，作其龕室。是中能塑画，乃至金银铜铁，作地藏形像，烧香供养，瞻礼赞叹。是人居处，即得十种利益。

何等为十？一者、土地丰壤，二者、家宅永安，三者、先亡生天，四者、现存益寿，五者、所求遂意，六者、无水火灾，七者、虚耗辟除，八者、杜绝恶梦，九者、出入神护，十者、多遇圣因。世尊，未来世中，及现在众生，若能于所住处方面，作如是供养，得如是利益。

复白佛言：世尊，未来世中，若有善男子善女人，于所住处，有此经典及菩萨像，是人更能转读经典，供养菩萨。我常日夜以本神力，卫护是人，乃至水火盗贼、大横小横、一切恶事，悉皆消灭。

佛告坚牢地神：汝大神力，诸神少及。何以故？阎浮土地，悉蒙汝护。乃至草木沙石、稻麻竹苇、谷米宝贝，从地而有，皆因汝力。又当称扬地藏菩萨利益之事。汝之功德及以神通，百千倍于常分地神。

若未来世中，有善男子善女人，供养菩萨，及转读是经，但依地藏本愿经一事修行者，汝以本神力而拥护之，勿令一切灾害及不如意事，辄闻于耳，何况令受。非但汝独护是人故，亦有释梵眷属、诸天眷属，拥护是人。何故得如是圣贤

拥护？皆由瞻礼地藏形像及转读是本愿经故，自然毕竟出离苦海，证涅槃乐。以是之故，得大拥护。

见闻利益品第十二

尔时世尊从顶门上放百千万亿大毫相光，所谓白毫相光、大白毫相光、瑞毫相光、大瑞毫相光、玉毫相光、大玉毫相光、紫毫相光、大紫毫相光、青毫相光、大青毫相光、碧毫相光、大碧毫相光、红毫相光、大红毫相光、绿毫相光、大绿毫相光、金毫相光、大金毫相光、庆云毫相光、大庆云毫相光、千轮毫光、大千轮毫光、宝轮毫光、大宝轮毫光、日轮毫光、大日轮毫光、月轮毫光、大月轮毫光、宫殿毫光、大宫殿毫光、海云毫光、大海云毫光。

于顶门上放如是等毫相光已，出微妙音，告诸大众、天龙八部、人非人等：听吾今日于忉利天宫，称扬赞叹地藏菩萨于人天中利益等事、不思議事、超圣因事、证十地事、毕竟不退阿耨多罗三藐三菩提事。

说是语时，会中有一菩萨摩訶萨，名观世音，从座而起，胡跪合掌，白佛言：世尊，是地藏菩萨摩訶萨，具大慈悲，怜愍罪苦众生，于千万亿

世界，化千万亿身。所有功德及不思议威神之力，我闻世尊与十方无量诸佛，异口同音赞叹地藏菩萨云：正使过去现在未来诸佛，说其功德，犹不能尽。向者又蒙世尊普告大众，欲称扬地藏利益等事。唯愿世尊，为现在未来一切众生，称扬地藏不思議事，令天龙八部瞻礼获福。

佛告观世音菩萨：汝于娑婆世界，有大因缘。若天若龙，若男若女，若神若鬼，乃至六道罪苦众生，闻汝名者、见汝形者、恋慕汝者、赞叹汝者，是诸众生，于无上道，必不退转；常生人天，具受妙乐；因果将熟，遇佛授记。汝今具大慈悲，怜愍众生及天龙八部，听吾宣说地藏菩萨不思議利益之事。汝当谛听，吾今说之。观世音言：唯然世尊，愿乐欲闻。

佛告观世音菩萨：未来现在诸世界中，有天人受天福尽，有五衰相现，或有堕于恶道之者。如是人天，若男若女，当现相时，或见地藏菩萨形像，或闻地藏菩萨名，一瞻一礼，是诸天转增天福，受大快乐，永不堕三恶道报。何况见闻菩萨，以诸香华、衣服、饮食、宝贝、璎珞，布施供养，所获功德福利，无量无边。

复次观世音，若未来现在诸世界中，六道众生，临命终时，得闻地藏菩萨名，一声历耳根者，是诸众生，永不历三恶道苦。何况临命终时，父母眷属将是命终人舍宅、财物、宝贝、衣服，塑画地藏形像。或使病人未终之时，眼耳见闻，知道眷属将舍宅宝贝等，为其自身塑画地藏菩萨形像。是人若是业报合受重病者，承斯功德，寻即除愈，寿命增益。是人若是业报命尽，应有一切罪障业障，合堕恶趣者，承斯功德，命终之后，即生人天，受胜妙乐。一切罪障，悉皆消灭。

复次观世音菩萨，若未来世有男子女人，或乳哺时，或三岁、五岁、十岁以下，亡失父母乃至亡失兄弟、姊妹。是人年既长大，思忆父母及诸眷属，不知落在何趣，生何世界，生何天中。是人若能塑画地藏菩萨形像，乃至闻名、一瞻一礼。一日至七日，莫退初心。闻名见形，瞻礼供养。是人眷属，假因业故，堕恶趣者，计当劫数。承斯男女、兄弟、姊妹塑画地藏形像，瞻礼功德，寻即解脱，生人天中，受胜妙乐。是人眷属，如有福力，已生人天受胜妙乐者，即承斯功德，转增圣因，受无量乐。是人更能三七日中，一心瞻

注：「是人眷属，如有福力，已生人天受胜妙乐」，龙藏中无此句。

礼地藏形像，念其名字，满于万遍，当得菩萨现无边身，具告是人眷属生界；或于梦中，菩萨现大神力，亲领是人，于诸世界，见诸眷属。更能每日念菩萨名千遍，至于千日，是人当得菩萨遣所在土地鬼神，终身卫护，现世衣食丰溢，无诸疾苦，乃至横事不入其门，何况及身。是人毕竟得菩萨摩顶授记。

复次观世音菩萨，若未来世，有善男子善女人，欲发广大慈心救度一切众生者、欲修无上菩提者、欲出离三界者。是诸人等，见地藏形像及闻名者，至心归依，或以香华、衣服、宝贝、饮食供养瞻礼，是善男女等，所愿速成，永无障碍。

复次观世音，若未来世，有善男子善女人，欲求现在未来百千万亿等愿，百千万亿等事。但当归依瞻礼、供养赞叹地藏菩萨形像，如是所愿所求，悉皆成就。复愿地藏菩萨具大慈悲，永拥护我，是人于睡梦中，即得菩萨摩顶授记。

复次观世音菩萨，若未来世，善男子善女人，于大乘经典，深生珍重，发不思議心，欲读欲诵，纵遇明师教视令熟，旋得旋忘，动经年月，不能读诵。是善男子等，有宿业障，未得消除，故于

大乘经典无读诵性。如是之人，闻地藏菩萨名，见地藏菩萨像，具以本心恭敬陈白，更以香华、衣服、饮食、一切玩具，供养菩萨。以净水一盏，经一日一夜，安菩萨前，然后合掌请服，回首向南，临入口时，至心郑重。服水既毕，慎五辛、酒、肉、邪淫、妄语及诸杀害，一七日或三七日。是善男子善女人，于睡梦中，具见地藏菩萨现无边身，于是人处，授灌顶水。其人梦觉，即获聪明。应是经典，一历耳根，即当永记，更不忘失一句一偈。

复次观世音菩萨，若未来世，有诸人等，衣食不足，求者乖愿；或多病疾；或多凶衰，家宅不安，眷属分散；或诸横事，多来忤身；睡梦之间，多有惊怖。如是人等，闻地藏名，见地藏形，至心恭敬，念满万遍。是诸不如意事，渐渐消灭，即得安乐，衣食丰溢，乃至睡梦中悉皆安乐。

复次观世音菩萨，若未来世，有善男子善女人，或因治生，或因公私，或因生死，或因急事，入山林中，过渡河海，乃及大水，或经险道。是人先当念地藏菩萨名万遍，所过土地，鬼神卫护，行住坐卧，永保安乐。乃至逢于虎狼狮子、一切

毒害，不能损之。

佛告观世音菩萨：是地藏菩萨，于阎浮提，有大因缘。若说于诸众生见闻利益等事，百千劫中，说不能尽。是故观世音，汝以神力，流布是经，令娑婆世界众生，百千万劫，永受安乐。

尔时世尊而说偈言：

吾观地藏威神力，恒河沙劫说难尽，
见闻瞻礼一念间，利益人天无量事。
若男若女若龙神，报尽应当堕恶道，
至心归依大士身，寿命转增除罪障。
少失父母恩爱者，未知魂神在何趣，
兄弟姊妹及诸亲，生长以来皆不识，
或塑或画大士身，悲恋瞻礼不暂舍，
三七日中念其名，菩萨当现无边体，
示其眷属所生界，纵堕恶趣寻出离，
若能不退是初心，即获摩顶受圣记。
欲修无上菩提者，乃至出离三界苦，
是人既发大悲心，先当瞻礼大士像，
一切诸愿速成就，永无业障能遮止。
有人发心念经典，欲度群迷超彼岸，
虽立是愿不思議，旋读旋忘多废失，

斯人有业障惑故，于大乘经不能记，
供养地藏以香华，衣服饮食诸玩具，
以净水安大士前，一日一夜求服之，
发殷重心慎五辛，酒肉邪淫及妄语，
三七日内勿杀害，至心思念大士名，
即于梦中见无边，觉来便得利根耳，
应是经教历耳闻，千万生中永不忘，
以是大士不思议，能使斯人获此慧。

贫穷众生及疾病，家宅凶衰眷属离，
睡梦之中悉不安，求者乖违无称遂，
至心瞻礼地藏像，一切恶事皆消灭，
至于梦中尽得安，衣食丰饶神鬼护。

欲入山林及渡海，毒恶禽兽及恶人，
恶神恶鬼并恶风，一切诸难诸苦恼，
但当瞻礼及供养，地藏菩萨大士像，
如是山林大海中，应是诸恶皆消灭。

观音至心听吾说，地藏无尽不思议，
百千万劫说不周，广宣大士如是力。

地藏名字人若闻，乃至见像瞻礼者，
香华衣服饮食奉，供养百千受妙乐，
若能以此回法界，毕竟成佛超生死。

是故观音汝当知，普告恒沙诸国土。

嘱累人天品第十三

尔时世尊举金色臂，又摩地藏菩萨摩诃萨顶，而作是言：地藏！地藏！汝之神力不可思议，汝之慈悲不可思议，汝之智慧不可思议，汝之辩才不可思议。正使十方诸佛赞叹宣说汝之不思議事，千万劫中不能得尽。地藏！地藏！记吾今日在忉利天中，于百千万亿不可说不可说一切诸佛菩萨、天龙八部大会之中，再以人天诸众生等，未出三界，在火宅中者，付嘱于汝，无令是诸众生堕恶趣中一日一夜。何况更落五无间及阿鼻地狱，动经千万亿劫，无有出期。

地藏，是南阎浮提众生，志性无定，习恶者多。纵发善心，须臾即退。若遇恶缘，念念增长。以是之故，吾分是形百千亿化度，随其根性而度脱之。地藏，吾今殷勤以天人众，付嘱于汝。未来之世，若有天人，及善男子善女人，于佛法中，种少善根，一毛一尘、一沙一涕。汝以道力，拥护是人，渐修无上，勿令退失。

复次地藏，未来世中，若天若人，随业报应，落在恶趣。临堕趣中，或至门首，是诸众生，若能念得一佛名、一菩萨名、一句一偈大乘经典。

是诸众生，汝以神力，方便救拔，于是人所，现无边身，为碎地狱，遣令生天，受胜妙乐。

尔时世尊而说偈言：

现在未来天人众，吾今殷勤付嘱汝，
以大神通方便度，勿令堕在诸恶趣。

尔时地藏菩萨摩訶萨，胡跪合掌，白佛言：世尊！唯愿世尊，不以为虑！未来世中，若有善男子善女人，于佛法中，一念恭敬。我亦百千方便，度脱是人，于生死中，速得解脱。何况闻诸善事，念念修行，自然于无上道，永不退转。

说是语时，会中有一菩萨，名虚空藏，白佛言：世尊，我自至忉利，闻于如来赞叹地藏菩萨威神势力不可思议。未来世中，若有善男子善女人乃及一切天龙，闻此经典及地藏名字，或瞻礼形像，得几种福利？唯愿世尊，为未来、现在一切众等，略而说之。

佛告虚空藏菩萨：谛听谛听，吾当为汝分别说之。若未来世，有善男子善女人，见地藏形像，及闻此经乃至读诵，香华、饮食、衣服、珍宝布施供养，赞叹瞻礼，得二十八种利益：

一者、天龙护念，二者、善果日增，三者、

集圣上因，四者、菩提不退，五者、衣食丰足，六者、疾疫不临，七者、离水火灾，八者、无盗贼厄，九者、人见钦敬，十者、神鬼助持，十一者、女转男身，十二者、为王臣女，十三者、端正相好，十四者、多生天上，十五者、或为帝王，十六者、宿智命通，十七者、有求皆从，十八者、眷属欢乐，十九者、诸横消灭，二十者、业道永除，二十一者、去处尽通，二十二者、夜梦安乐，二十三、先亡离苦，二十四者、宿福受生，二十五者、诸圣赞叹，二十六者、聪明利根，二十七者、饶慈愍心，二十八者、毕竟成佛。

复次虚空藏菩萨，若现在、未来天龙鬼神，闻地藏名，礼地藏形，或闻地藏本愿事行，赞叹瞻礼，得七种利益：一者、速超圣地，二者、恶业消灭，三者、诸佛护临，四者、菩提不退，五者、增长本力，六者、宿命皆通，七者、毕竟成佛。

尔时十方一切诸来不可说不可说诸佛如来及大菩萨、天龙八部，闻释迦牟尼佛称扬赞叹地藏菩萨大威神力，不可思议，叹未曾有。是时忉利天雨无量香华、天衣、珠璣，供养释迦牟尼佛及地藏菩萨已。一切众会，俱复瞻礼，合掌而退。

七佛灭罪真言（三遍）

lí pó lí pó dì qiú hē qiú hē dì tuóluó ní dì ní hē là dì
离婆离婆帝。求诃求诃帝。陀罗尼帝。尼诃啰帝。

pí lí nǐ dì mó hē qié dì zhēnlíngqián dì suō pó hē
毗黎你帝。摩诃伽帝。真陵乾帝。娑婆诃。

地藏菩萨灭定业真言（七遍）

ān bō là mò lín tuóníng suō pó hē
唵。钵啰末邻陀宁。娑婆诃。

补阙真言（三遍）

ná mó hē là dá nà duō là yè yē qiè là qiè là jù zhù jù zhù
南无喝囉怛那。哆囉夜耶。佉囉佉囉。俱住俱住。

mó là mó là hǔ là hōng hè hè sū dá ná hōng pō mò ná
摩囉摩囉。虎囉吽。贺贺苏怛拏。吽。泼抹拏。

suō pó hē
娑婆诃。

补阙圆满真言（七遍）

ān hū lú hū lú shè yì mù qì suō hē
唵。呼嚧呼嚧。社曳穆契。娑诃。

往生咒（七遍）

nánmó ā mí duō pó yè duōtuóqiéduō yè duō de yè tuó ā mí
南无阿弥多婆夜。哆他伽多夜。哆地夜他。阿弥

lì dū pó pí ā mí lì duō xī dānpó pí ā mí lì duō pí
利都婆毗。阿弥利哆。悉耽婆毗。阿弥利哆。毗

jiā lán dì ā mí lì duō pí jiā lán duō qié mí nì qié qiénuó
迦兰帝。阿弥利哆。毗迦兰多。伽弥膩。伽伽那。

zhī duō jiā lì suō pó hē
枳多迦利。娑婆诃。

三皈依

自皈依佛 当愿众生 体解大道 发无上心
自皈依法 当愿众生 深入经藏 智慧如海
自皈依僧 当愿众生 统理大众 一切无碍
和南圣众

回向文（合掌）

弟子○○愿以此所诵《地藏经》之功德，回向给弟子○○累生累世的冤亲债主，过去故杀、错杀、误杀的一切生灵及十方法界一切众生。祈请南无大慈大悲地藏王菩萨慈悲做主，超拔他们，令业障消除，离苦得乐，往生净土，同圆种智。

弟子○○真心求忏悔。（念3遍）

南无大愿地藏菩萨摩訶萨（三称）

解冤咒

南无普光菩萨摩訶萨（三称）

唵，齿临。金吒金吒僧金吒，我今为汝解金吒，终不为汝结金吒。唵，强中强，吉中吉，波罗会有殊利，一切冤家离我身，摩訶般若波罗蜜。

般若波罗蜜多心经

唐三藏法师玄奘 译

观自在菩萨。行深般若波罗蜜多时。照见五蕴皆空。度一切苦厄。舍利子。色不异空。空不异色。色即是空。空即是色。受想行识。亦复如是。舍利子。是诸法空相。不生不灭。不垢不净。不增不减。是故空中无色。无受想行识。无眼耳鼻舌身意。无色声香味触法。无眼界。乃至无意识界。无无明。亦无无明尽。乃至无老死。亦无老死尽。无苦集灭道。无智亦无得。以无所得故。菩提萨埵。依般若波罗蜜多故。心无罣碍。无罣碍故。无有恐怖。远离颠倒梦想。究竟涅槃。三世诸佛。依般若波罗蜜多故。得阿耨多罗三藐三菩提。

故知般若波罗蜜多。是大神咒。是大明咒。是无上咒。是无等等咒。能除一切苦。真实不虚。故说般若波罗蜜多咒。即说咒曰。揭谛揭谛。波罗揭谛。波罗僧揭谛。菩提萨婆诃。

摩诃般若波罗蜜多（三称）

净行品

唐于阗国三藏沙门实叉难陀 译
科判节自于澄观法师《华严经疏》

【智首问举德征因：一百一十问 1.三业离过成德】

尔时，智首菩萨问文殊师利菩萨言：佛子，菩萨云何得无过失身语意业？云何得不害身语意业？云何得不可毁身语意业？云何得不可坏身语意业？云何得不退转身语意业？云何得不可动身语意业？云何得殊胜身语意业？云何得清净身语意业？云何得无染身语意业？云何得智为先导身语意业？

【2.得堪传法器】

云何得生处具足、种族具足、家具足、色具足、相具足、念具足、慧具足、行具足、无畏具足、觉悟具足？

【3.成就众慧】

云何得胜慧、第一慧、最上慧、最胜慧、无量慧、无数慧、不思議慧、无与等慧、不可量慧、不可说慧？

【4.具道因缘】

云何得因力、欲力、方便力、缘力、所缘力、根力、观察力、奢摩他力、毗钵舍那力、思惟力？

【5.于法善巧】

云何得蕴善巧、界善巧、处善巧、缘起善巧、欲界善巧、色界善巧、无色界善巧、过去善巧、未来善巧、现在善巧？

【6.修涅槃因】

云何善修习念觉分、择法觉分、精进觉分、喜觉分、猗觉分、定觉分、舍觉分、空、无相、无愿？

【7.满菩萨行】

云何得圆满檀波罗蜜、尸波罗蜜、羼提波罗蜜、毗黎耶波罗蜜、禅那波罗蜜、般若波罗蜜，及以圆满慈悲喜舍？

【8.得十力智】

云何得处非处智力、过未现在业报智力、根胜劣智力、种种界智力、种种解智力、一切至处道智力、禅解脱三昧染净智力、宿住念智力、无障碍天眼智力、断诸习智力？

【9.十王救护】

云何常得天王、龙王、夜叉王、乾闥婆王、

阿修罗王、迦楼罗王、紧那罗王、摩睺罗伽王、人王、梵王之所守护，恭敬供养？

【10.能为饶益】

云何得与一切众生为依、为救、为归、为趣、为炬、为明、为照、为导、为胜导、为普导？

【11.超胜尊贵】

云何于一切众生中，为第一、为大、为胜、为最胜、为妙、为极妙、为上、为无上、为无等、为无等等？

【文殊答标德显因：一百四十一愿】

尔时，文殊师利菩萨告智首菩萨言：善哉！佛子，汝今为欲多所饶益，多所安隐，哀愍世间，利乐天人，问如是义。

佛子，若诸菩萨善用其心，则获一切胜妙功德；于诸佛法，心无所碍，住去、来、今诸佛之道；随众生住，恒不舍离；如诸法相，悉能通达；断一切恶，具足众善；当如普贤，色像第一，一切行愿皆得具足；于一切法，无不自在，而为众生第二导师。

佛子，云何用心能获一切胜妙功德？佛子：

【1.十一愿：在家时愿】

菩萨在家，当愿众生：知家性空，免其逼迫。
 孝事父母，当愿众生：善事于佛，护养一切。
 妻子集会，当愿众生：冤亲平等，永离贪著。
 若得五欲，当愿众生：拔除欲箭，究竟安隐。
 妓乐聚会，当愿众生：以法自娱，了妓非实。
 若在宫室，当愿众生：入于圣地，永除秽欲。
 著璎珞时，当愿众生：舍诸伪饰，到真实处。
 上升楼阁，当愿众生：升正法楼，彻见一切。
 若有所施，当愿众生：一切能舍，心无爱著。
 众会聚集，当愿众生：舍众聚法，成一切智。
 若在厄难，当愿众生：随意自在，所行无碍。

【2.十五愿：出家戒时愿】

舍居家时，当愿众生：出家无碍，心得解脱。
 入僧伽蓝，当愿众生：演说种种，无乖诤法。
 诣大小师，当愿众生：巧事师长，习行善法。
 请求出家，当愿众生：得不退法，心无障碍。
 脱去俗服，当愿众生：勤修善根，舍诸罪轭。
 剃除须发，当愿众生：永离烦恼，究竟寂灭。
 著袈裟衣，当愿众生：心无所染，具大仙道。
 正出家时，当愿众生：同佛出家，救护一切。

自归于佛，当愿众生：绍隆佛种，发无上意。
自归于法，当愿众生：深入经藏，智慧如海。
自归于僧，当愿众生：统理大众，一切无碍。
受学戒时，当愿众生：善学于戒，不作众恶。
受闍黎教，当愿众生：具足威仪，所行真实。
受和尚教，当愿众生：入无生智，到无依处。
受具足戒，当愿众生：具诸方便，得最胜法。

【3.七愿：就坐禅观时愿】

若入堂宇，当愿众生：升无上堂，安住不动。
若敷床座，当愿众生：开敷善法，见真实相。
正身端坐，当愿众生：坐菩提座，心无所著。
结跏趺坐，当愿众生：善根坚固，得不动地。
修行于定，当愿众生：以定伏心，究竟无余。
若修于观，当愿众生：见如实理，永无乖诤。
舍跏趺坐，当愿众生：观诸行法，悉归散灭。

【4.六愿：将行披挂时愿】

下足住时，当愿众生：心得解脱，安住不动。
若举于足，当愿众生：出生死海，具众善法。
著下裙时，当愿众生：服诸善根，具足惭愧。
整衣束带，当愿众生：检束善根，不令散失。
若著上衣，当愿众生：获胜善根，至法彼岸。

著僧伽梨，当愿众生：入第一位，得不动法。

【5.七愿：澡漱盥洗时愿】

手执杨枝，当愿众生：皆得妙法，究竟清净。

嚼杨枝时，当愿众生：其心调净，噬诸烦恼。

大小便时，当愿众生：弃贪瞋痴，蠲除罪法。

事讫就水，当愿众生：出世法中，速疾而往。

洗涤形秽，当愿众生：清净调柔，毕竟无垢。

以水盥掌，当愿众生：得清净手，受持佛法。

以水洗面，当愿众生：得净法门，永无垢染。

【6.五十五愿：乞食行道时愿：(1)十二愿：游涉道路】

手执锡杖，当愿众生：设大施会，示如实道。

执持应器，当愿众生：成就法器，受天人供。

发趾向道，当愿众生：趣佛所行，入无依处。

若在于道，当愿众生：能行佛道，向无余法。

涉路而去，当愿众生：履净法界，心无障碍。

见升高路，当愿众生：永出三界，心无怯弱。

见趣下路，当愿众生：其心谦下，长佛善根。

见斜曲路，当愿众生：舍不正道，永除恶见。

若见直路，当愿众生：其心正直，无谄无诳。

见路多尘，当愿众生：远离尘坌，获清净法。

见路无尘，当愿众生：常行大悲，其心润泽。

若见险道，当愿众生：住正法界，离诸罪难。

【(2)十九愿：所睹事境】

若见众会，当愿众生：说甚深法，一切和合。

若见大柱，当愿众生：离我诤心，无有忿恨。

若见丛林，当愿众生：诸天及人，所应敬礼。

若见高山，当愿众生：善根超出，无能至顶。

见棘刺树，当愿众生：疾得翦除，三毒之刺。

见树叶茂，当愿众生：以定解脱，而为荫映。

若见华开，当愿众生：神通等法，如华开敷。

若见树华，当愿众生：众相如华，具三十二。

若见果实，当愿众生：获最胜法，证菩提道。

若见大河，当愿众生：得预法流，入佛智海。

若见陂泽，当愿众生：疾悟诸佛，一味之法。

若见池沼，当愿众生：语业满足，巧能演说。

若见汲井，当愿众生：具足辩才，演一切法。

若见涌泉，当愿众生：方便增长，善根无尽。

若见桥道，当愿众生：广度一切，犹如桥梁。

若见流水，当愿众生：得善意欲，洗除惑垢。

见修园圃，当愿众生：五欲圃中，耘除爱草。

见无忧林，当愿众生：永离贪爱，不生忧怖。

若见园苑，当愿众生：勤修诸行，趣佛菩提。

【(3)二十四愿：所遇人物】

见严饰人，当愿众生：三十二相，以为严好。
 见无严饰，当愿众生：舍诸饰好，具头陀行。
 见乐著人，当愿众生：以法自娱，欢爱不舍。
 见无乐著，当愿众生：有为事中，心无所乐。
 见欢乐人，当愿众生：常得安乐，乐供养佛。
 见苦恼人，当愿众生：获根本智，灭除众苦。
 见无病人，当愿众生：入真实慧，永无病恼。
 见疾病人，当愿众生：知身空寂，离乖诤法。
 见端正人，当愿众生：于佛菩萨，常生净信。
 见丑陋人，当愿众生：于不善事，不生乐著。
 见报恩人，当愿众生：于佛菩萨，能知恩德。
 见背恩人，当愿众生：于有恶人，不加其报。
 若见沙门，当愿众生：调柔寂静，毕竟第一。
 见婆罗门，当愿众生：永持梵行，离一切恶。
 见苦行人，当愿众生：依于苦行，至究竟处。
 见操行人，当愿众生：坚持志行，不舍佛道。
 见著甲冑，当愿众生：常服善铠，趣无师法。
 见无铠仗，当愿众生：永离一切，不善之业。
 见论议人，当愿众生：于诸异论，悉能摧伏。
 见正命人，当愿众生：得清净命，不矫威仪。

若见于王，当愿众生：得为法王，恒转正法。
若见王子，当愿众生：从法化生，而为佛子。
若见长者，当愿众生：善能明断，不行恶法。
若见大臣，当愿众生：恒守正念，习行众善。

【7.二十二愿：到城乞食时愿】

若见城郭，当愿众生：得坚固身，心无所屈。
若见王都，当愿众生：功德共聚，心恒喜乐。
见处林藪，当愿众生：应为天人，之所叹仰。
入里乞食，当愿众生：入深法界，心无障碍。
到人门户，当愿众生：入于一切，佛法之门。
入其家已，当愿众生：得入佛乘，三世平等。
见不舍人，当愿众生：常不舍离，胜功德法。
见能舍人，当愿众生：永得舍离，三恶道苦。
若见空钵，当愿众生：其心清净，空无烦恼。
若见满钵，当愿众生：具足成满，一切善法。
若得恭敬，当愿众生：恭敬修行，一切佛法。
不得恭敬，当愿众生：不行一切，不善之法。
见惭耻人，当愿众生：具惭耻行，藏护诸根。
见无惭耻，当愿众生：舍离无惭，住大慈道。
若得美食，当愿众生：满足其愿，心无美欲。
得不美食，当愿众生：莫不获得，诸三昧味。

得柔软食，当愿众生：大悲所熏，心意柔软。
得粗涩食，当愿众生：心无染著，绝世贪爱。
若饭食时，当愿众生：禅悦为食，法喜充满。
若受味时，当愿众生：得佛上味，甘露满足。
饭食已讫，当愿众生：所作皆办，具诸佛法。
若说法时，当愿众生：得无尽辩，广宣法要。

【8. 五愿：还归洗浴时愿】

从舍出时，当愿众生：深入佛智，永出三界。
若入水时，当愿众生：入一切智，知三世等。
洗浴身体，当愿众生：身心无垢，内外光洁。
盛暑炎毒，当愿众生：舍离众恼，一切皆尽。
暑退凉初，当愿众生：证无上法，究竟清凉。

【9. 十愿：习诵旋礼时愿】

讽诵经时，当愿众生：顺佛所说，总持不忘。
若得见佛，当愿众生：得无碍眼，见一切佛。
谛观佛时，当愿众生：皆如普贤，端正严好。
见佛塔时，当愿众生：尊重如塔，受天人供。
敬心观塔，当愿众生：诸天及人，所共瞻仰。
顶礼于塔，当愿众生：一切天人，无能见顶。
右绕于塔，当愿众生：所行无逆，成一切智。
绕塔三匝，当愿众生：勤求佛道，心无懈怠。

赞佛功德，当愿众生：众德悉具，称叹无尽。

赞佛相好，当愿众生：成就佛身，证无相法。

【10.三愿：寤寐安息时】

若洗足时，当愿众生：具神足力，所行无碍。

以时寢息，当愿众生：身得安隐，心无动乱。

睡眠始寢，当愿众生：一切智觉，周顾十方。

【总结】

佛子，若诸菩萨如是用心，则获一切胜妙功德；一切世间诸天魔梵、沙门、婆罗门、乾闥婆、阿修罗等，及以一切声闻缘觉，所不能动。



梵 行 品

唐于阗国三藏沙门实叉难陀 译
科判节自于澄观法师《华严经疏》

尔时，正念天子白法慧菩萨言：佛子，一切世界诸菩萨众，依如来教，染衣出家，云何而得梵行清净，从菩萨位逮于无上菩提之道？

法慧菩萨言：佛子，菩萨摩訶萨修梵行时，应以十法而为所缘，作意观察，所谓：身、身业、语、语业、意、意业、佛、法、僧、戒。应如是观：为身是梵行耶？乃至戒是梵行耶？

【答行净所因：自行净】

若身是梵行者，当知梵行则为非善、则为非法、则为浑浊、则为臭恶、则为不净、则为可厌、则为违逆、则为杂染、则为死尸、则为虫聚。若身业是梵行者，梵行则是行住坐卧、左右顾视、屈伸俯仰。

若语是梵行者，梵行则是音声风息、唇舌喉吻、吐纳抑纵、高低清浊。若语业是梵行者，

梵行则是起居问讯、略说、广说、喻说、直说、赞说、毁说、安立说、随俗说、显了说。

若意是梵行者，梵行则应是觉、是观、是分别、是种种分别、是忆念、是种种忆念、是思惟、是种种思惟、是幻术、是眠梦。若意业是梵行者，当知梵行则是思想、寒热、饥渴、苦乐、忧喜。

若佛是梵行者，为色是佛耶？受是佛耶？想是佛耶？行是佛耶？识是佛耶？为相是佛耶？好是佛耶？神通是佛耶？业行是佛耶？果报是佛耶？

若法是梵行者，为寂灭是法耶？涅槃是法耶？不生是法耶？不起是法耶？不可说是法耶？无分别是法耶？无所行是法耶？不合集是法耶？不随顺是法耶？无所得是法耶？

若僧是梵行者，为预流向是僧耶？预流果是僧耶？一来向是僧耶？一来果是僧耶？不还向是僧耶？不还果是僧耶？阿罗汉向是僧耶？阿罗汉果是僧耶？三明是僧耶？六通是僧耶？

若戒是梵行者，为坛场是戒耶？问清净是戒耶？教威仪是戒耶？三说羯磨是戒耶？和尚是戒耶？阿阇梨是戒耶？剃发是戒耶？著袈裟衣是戒耶？乞食是戒耶？正命是戒耶？

如是观已，于身无所取，于修无所著，于法无所住；过去已灭，未来未至，现在空寂；无作业者，无受报者；此世不移动，彼世不改变。此中何法名为梵行？梵行从何处来？谁之所有？体为是谁？由谁而作？为是有，为是无？为是色，为非色？为是受，为非受？为是想，为非想？为是行，为非行？为是识，为非识？

如是观察，梵行法不可得故，三世法皆空寂故，意无取著故，心无障碍故，所行无二故，方便自在故，受无相法故，观无相法故，知佛法平等故，具一切佛法故，如是名为清净梵行。

【答行净所因：利他之行净】

复应修习十种法。何者为十？所谓：处非处智、过现未来业报智、诸禅解脱三昧智、诸根胜劣智、种种解智、种种界智、一切至处道智、天眼无碍智、宿命无碍智、永断习气智。

于如来十力一一观察，一一力中无量义，悉应咨问；闻已，应起大慈悲心，观察众生而不舍离；思惟诸法，无有休息；行无上业，不求果报；了知境界如幻如梦，如影如响，亦如变化。

【答因所成果】

若诸菩萨能与如是观行相应，于诸法中不生二解，一切佛法疾得现前，初发心时即得阿耨多罗三藐三菩提，知一切法即心自性，成就慧身，不由他悟。



普贤行愿品

唐罽宾国三藏般若 译

科判节自于澄观法师《华严经疏》

【结前所说】

尔时，普贤菩萨摩訶萨，称叹如来胜功德已，告诸菩萨及善财言：善男子。如来功德，假使十方一切诸佛，经不可说不可说佛刹极微尘数劫，相续演说，不可穷尽。

【正显普因】

若欲成就此功德门，应修十种广大行愿。何等为十？一者、礼敬诸佛。二者、称赞如来。三者、广修供养。四者、忏悔业障。五者、随喜功德。六者、请转法轮。七者、请佛住世。八者、常随佛学。九者、恒顺众生。十者、普皆回向。

善财白言：大圣。云何礼敬乃至回向？

【1.礼敬诸佛】

普贤菩萨告善财言：善男子。言礼敬诸佛者，所有尽法界、虚空界，十方三世一切佛刹，极微尘数诸佛世尊。

我以普贤行愿力故，深心信解，如对目前，悉以清净身语意业，常修礼敬。一一佛所，皆现不可说不可说佛刹极微尘数身；一一身，遍礼不可说不可说佛刹极微尘数佛。

虚空界尽，我礼乃尽，以虚空界不可尽故，我此礼敬无有穷尽。如是乃至众生界尽，众生业尽，众生烦恼尽，我礼乃尽。而众生界乃至烦恼无有尽故，我此礼敬无有穷尽。念念相续，无有间断，身语意业，无有疲厌。

【2.称赞如来】

复次，善男子。言称赞如来者，所有尽法界、虚空界，十方三世一切刹土，所有极微一一尘中，皆有一切世间极微尘数佛；一一佛所，皆有菩萨海会围绕。

我当悉以甚深胜解，现前知见，各以出过辩才天女微妙舌根，一一舌根，出无尽音声海；一一音声，出一切言辞海，称扬赞叹一切如来诸功德海。穷未来际，相续不断，尽于法界，无不周遍。

如是虚空界尽，众生界尽，众生业尽，众生烦恼尽，我赞乃尽。而虚空界乃至烦恼，无

有尽故，我此赞叹无有穷尽。念念相续，无有间断，身语意业，无有疲厌。

【3.广修供养】

复次，善男子。言广修供养者，所有尽法界、虚空界，十方三世一切佛刹极微尘中，一一各有一切世界极微尘数佛，一一佛所，种种菩萨海会围绕。

我以普贤行愿力故，起深信解，现前知见，悉以上妙诸供养具而为供养。所谓华云、鬘云、天音乐云、天伞盖云、天衣服云、天种种香、涂香、烧香、末香，如是等云，一一量如须弥山王。然种种灯，酥灯、油灯，诸香油灯，一一灯炷如须弥山，一一灯油如大海水。以如是等诸供养具，常为供养。

善男子。诸供养中，法供养最。所谓如说修行供养，利益众生供养，摄受众生供养，代众生苦供养，勤修善根供养，不舍菩萨业供养，不离菩提心供养。善男子。如前供养无量功德，比法供养一念功德，百分不及一，千分不及一，百千俱胝那由他分、迦罗分、算分、数分、喻分、优波尼沙陀分，亦不及一。何以故？以诸

如来尊重法故。以如说行，出生诸佛故。若诸菩萨行法供养，则得成就供养如来。如是修行，是真供养故。

此广大最胜供养，虚空界尽，众生界尽，众生业尽，众生烦恼尽，我供乃尽，而虚空界乃至烦恼不可尽故，我此供养亦无有尽。念念相续，无有间断，身语意业，无有疲厌。

【4.忏悔业障】

复次，善男子。言忏悔业障者，菩萨自念：我于过去无始劫中，由贪瞋痴，发身口意，作诸恶业，无量无边。若此恶业有体相者，尽虚空界不能容受。我今悉以清净三业，遍于法界极微尘刹一切诸佛菩萨众前，诚心忏悔，后不复造，恒住净戒一切功德。

如是虚空界尽，众生界尽，众生业尽，众生烦恼尽，我忏乃尽，而虚空界乃至众生烦恼不可尽故，我此忏悔无有穷尽。念念相续，无有间断，身语意业，无有疲厌。

【5.随喜功德：1)随喜诸佛德 2)随喜六趣善 3)随喜二乘善 4)随喜菩萨德】

复次，善男子。言随喜功德者，所有尽法界、虚空界，十方三世一切佛刹极微尘数诸佛

如来，从初心，为一切智，勤修福聚，不惜身命，经不可说不可说佛刹极微尘数劫，一一劫中，舍不可说不可说佛刹极微尘数头目手足。如是一切难行苦行，圆满种种波罗蜜门，证入种种菩萨智地，成就诸佛无上菩提及般涅槃，分布舍利，所有善根，我皆随喜。及彼十方一切世界，六趣四生，一切种类，所有功德，乃至一尘，我皆随喜。十方三世一切声闻及辟支佛，有学无学，所有功德，我皆随喜。一切菩萨所修无量难行苦行，志求无上正等菩提，广大功德，我皆随喜。

如是虚空界尽，众生界尽，众生业尽，众生烦恼尽，我此随喜，无有穷尽。念念相续，无有间断，身语意业，无有疲厌。

【6.请转法轮】

复次，善男子。言请转法轮者，所有尽法界、虚空界，十方三世一切佛刹极微尘中，一一各有不可说不可说佛刹极微尘数广大佛刹。一一刹中，念念有不可说不可说佛刹极微尘数一切诸佛成等正觉，一切菩萨海会围绕。而我悉以身口意业，种种方便，殷勤劝请，转妙法

轮。

如是虚空界尽，众生界尽，众生业尽，众生烦恼尽，我常劝请一切诸佛，转正法轮，无有穷尽。念念相续，无有间断，身语意业，无有疲厌。

【7.请佛住世】

复次，善男子。言请佛住世者，所有尽法界、虚空界，十方三世一切佛刹极微尘数诸佛如来，将欲示现般涅槃者，及诸菩萨、声闻、缘觉，有学无学，乃至一切诸善知识，我悉劝请莫入涅槃。经于一切佛刹极微尘数劫，为欲利乐一切众生。

如是虚空界尽，众生界尽，众生业尽，众生烦恼尽，我此劝请，无有穷尽。念念相续，无有间断，身语意业，无有疲厌。

【8.常随佛学：1)随本师学 2)随诸佛学】

复次，善男子。言常随佛学者，如此娑婆世界毗卢遮那如来，从初发心，精进不退，以不可说不可说身命而为布施。剥皮为纸，析骨为笔，刺血为墨，书写经典，积如须弥。

为重法故，不惜身命，何况王位、城邑、

聚落、宫殿、园林，一切所有，及余种种难行苦行，乃至树下成大菩提，示种种神通，起种种变化，现种种佛身，处种种众会，或处一切诸大菩萨众会道场，或处声闻及辟支佛众会道场，或处转轮圣王、小王眷属众会道场，或处刹利及婆罗门、长者、居士众会道场，乃至或处天龙八部、人非人等众会道场。处于如是种种众会，以圆满音，如大雷震，随其乐欲，成熟众生，乃至示现入于涅槃，如是一切，我皆随学。

如今世尊毗卢遮那。如是尽法界、虚空界，十方三世一切佛刹所有尘中一切如来，皆亦如是，于念念中，我皆随学。

如是虚空界尽，众生界尽，众生业尽，众生烦恼尽，我此随学，无有穷尽。念念相续，无有间断，身语意业，无有疲厌。

【9.恒顺众生】

复次，善男子。言恒顺众生者，谓尽法界、虚空界，十方刹海所有众生，种种差别。所谓卵生、胎生、湿生、化生；或有依于地、水、火、风而生住者；或有依空及诸卉木而生住者，

种种生类，种种色身，种种形状，种种相貌，种种寿量，种种族类，种种名号，种种心性，种种知见，种种欲乐，种种意行，种种威仪，种种衣服，种种饮食，处于种种村营、聚落、城邑、宫殿。乃至一切天龙八部、人非人等，无足、二足、四足、多足、有色、无色、有想、无想、非有想、非无想，如是等类，我皆于彼，随顺而转。种种承事，种种供养。如敬父母，如奉师长及阿罗汉，乃至如来，等无有异。于诸病苦，为作良医。于失道者，示其正路。于暗夜中，为作光明。于贫穷者，令得伏藏。菩萨如是平等饶益一切众生。

何以故？菩萨若能随顺众生，则为随顺供养诸佛。若于众生尊重承事，则为尊重承事如来。若令众生生欢喜者，则令一切如来欢喜。

何以故？诸佛如来以大悲心而为体故。因于众生，而起大悲；因于大悲，生菩提心；因菩提心，成等正觉。譬如旷野砂磧之中，有大树王，若根得水，枝叶华果悉皆繁茂。生死旷野菩提树王，亦复如是。一切众生而为树根，诸佛菩萨而为华果，以大悲水饶益众生，则能

成就诸佛菩萨智慧华果。

何以故？若诸菩萨以大悲水饶益众生，则能成就阿耨多罗三藐三菩提故。是故菩提属于众生。若无众生，一切菩萨终不能成无上正觉。

善男子。汝于此义，应如是解。以于众心平等故，则能成就圆满大悲。以大悲心随众生故，则能成就供养如来。

菩萨如是随顺众生，虚空界尽，众生界尽，众生业尽，众生烦恼尽，我此随顺无有穷尽。念念相续，无有间断，身语意业，无有疲厌。

【10.普皆回向：1)回自向他 2)回事向理 3)回因向果】

复次，善男子。言普皆回向者，从初礼拜乃至随顺所有功德，皆悉回向，尽法界、虚空界一切众生。愿令众生，常得安乐，无诸病苦。欲行恶法，皆悉不成。所修善业，皆速成就。关闭一切诸恶趣门，开示人天涅槃正路。若诸众生，因其积集诸恶业故，所感一切极重苦果，我皆代受，令彼众生，悉得解脱，究竟成就无上菩提。

菩萨如是所修回向，虚空界尽，众生界尽，众生业尽，众生烦恼尽，我此回向，无有穷尽。

念念相续，无有间断，身语意业，无有疲厌。

【结益令知】

善男子。是为菩萨摩訶萨十种大愿，具足圆满。若诸菩萨，于此大愿，随顺趣入，则能成熟一切众生，则能随顺阿耨多罗三藐三菩提，则能成满普贤菩萨诸行愿海。是故善男子。汝于此义，应如是知。

【校量闻经德】

若有善男子、善女子，以满十方无量无边不可说不可说佛刹极微尘数一切世界，上妙七宝，及诸人天最胜安乐，布施尔所一切世界所有众生，供养尔所一切世界诸佛菩萨，经尔所佛刹极微尘数劫，相续不断，所得功德；若复有人，闻此愿王，一经于耳，所有功德，比前功德，百分不及一，千分不及一，乃至优波尼沙陀分亦不及一。

【显余众行德】

或复有人，以深信心，于此大愿，受持读诵，乃至书写一四句偈，速能除灭五无间业。所有世间身心等病，种种苦恼，乃至佛刹极微尘数一切恶业，皆得销除。

一切魔军、夜叉、罗刹、若鳩槃荼、若毗

舍阍、若部多等，饮血啖肉诸恶鬼神，皆悉远离。或时发心，亲近守护。

【通明五果】

是故若人诵此愿者，行于世间，无有障碍。如空中月，出于云翳。诸佛菩萨之所称赞，一切人天皆应礼敬，一切众生悉应供养。

此善男子，善得人身，圆满普贤所有功德。不久当如普贤菩萨，速得成就微妙色身，具三十二大丈夫相。若生人天，所在之处，常居胜族，悉能破坏一切恶趣，悉能远离一切恶友，悉能制伏一切外道，悉能解脱一切烦恼。如师子王摧伏群兽，堪受一切众生供养。

【别明净土】

又复是人临命终时，最后刹那，一切诸根悉皆散坏；一切亲属悉皆舍离；一切威势悉皆退失；辅相大臣、宫城内外、象马车乘、珍宝伏藏，如是一切无复相随。唯此愿王，不相舍离，于一切时，引导其前。一刹那中，即得往生极乐世界。

到已，即见阿弥陀佛、文殊师利菩萨、普贤菩萨、观自在菩萨、弥勒菩萨等。此诸菩萨，

色相端严，功德具足，所共围绕。其人自见生莲华中，蒙佛授记。得授记已，经于无数百千万亿那由他劫，普于十方不可说不可说世界，以智慧力，随众生心而为利益。

【究竟成佛】

不久当坐菩提道场，降伏魔军，成等正觉，转妙法轮。能令佛刹极微尘数世界众生，发菩提心，随其根性，教化成熟，乃至尽于未来劫海，广能利益一切众生。

【结劝受持分】

善男子，彼诸众生，若闻、若信，此大愿王受持读诵，广为人说，所有功德，除佛世尊，余无知者。

是故汝等，闻此愿王，莫生疑念，应当谛受。受已能读，读已能诵，诵已能持，乃至书写，广为人说。是诸人等，于一念中，所有行愿，皆得成就；所获福聚，无量无边。能于烦恼大苦海中，拔济众生，令其出离，皆得往生阿弥陀佛极乐世界。

尔时，普贤菩萨摩訶萨，欲重宣此义，普观十方，而说偈言：

【1. 颂礼敬诸佛】

所有十方世界中	三世一切人师子
我以清净身语意	一切遍礼尽无余
普贤行愿威神力	普现一切如来前
一身复现刹尘身	一一遍礼刹尘佛

【2. 颂称赞如来】

于一尘中尘数佛	各处菩萨众会中
无尽法界尘亦然	深信诸佛皆充满
各以一切音声海	普出无尽妙言辞
尽于未来一切劫	赞佛甚深功德海

【3. 颂广修供养】

以诸最胜妙华鬘	伎乐涂香及伞盖
如是最胜庄严具	我以供养诸如来
最胜衣服最胜香	末香烧香与灯烛
一一皆如妙高聚	我悉供养诸如来
我以广大胜解心	深信一切三世佛
悉以普贤行愿力	普遍供养诸如来

【4. 颂忏悔业障】

我昔所造诸恶业	皆由无始贪瞋痴
从身语意之所生	一切我今皆忏悔

【5. 颂随喜功德】

十方一切诸众生	二乘有学及无学
---------	---------

一切如来与菩萨 所有功德皆随喜

【6.颂请转法轮】

十方所有世间灯 最初成就菩提者
我今一切皆劝请 转于无上妙法轮

【7.颂请佛住世】

诸佛若欲示涅槃 我悉至诚而劝请
唯愿久住刹尘劫 利乐一切诸众生
所有礼赞供养佛 请佛住世转法轮
随喜忏悔诸善根 回向众生及佛道

【8.颂随如来学】

我随一切如来学 修习普贤圆满行
供养过去诸如来 及与现在十方佛
未来一切天人师 一切意乐皆圆满
我愿普随三世学 速得成就大菩提

【9.颂恒顺众生】

所有十方一切刹 广大清净妙庄严
众会围绕诸如来 悉在菩提树王下
十方所有诸众生 愿离忧患常安乐
获得甚深正法利 灭除烦恼尽无余

【10.颂普皆回向：1)受持愿】

我为菩提修行时 一切趣中成宿命
常得出家修净戒 无垢无破无穿漏

天龙夜叉鸠槃荼 乃至人与非人等
所有一切众生语 悉以诸音而说法

【2】修行二利愿】

勤修清净波罗蜜 恒不忘失菩提心
灭除障垢无有余 一切妙行皆成就
于诸惑业及魔境 世间道中得解脱
犹如莲华不著水 亦如日月不住空

【3】成熟众生愿】

悉除一切恶道苦 等与一切群生乐
如是经于刹尘劫 十方利益恒无尽
我常随顺诸众生 尽于未来一切劫
恒修普贤广大行 圆满无上大菩提

【4】不离愿】

所有与我同行者 于一切处同集会
身口意业皆同等 一切行愿同修学
所有益我善知识 为我显示普贤行
常愿与我同集会 于我常生欢喜心

【5】供养愿】

愿常面见诸如来 及诸佛子众围绕
于彼皆兴广大供 尽未来劫无疲厌
愿持诸佛微妙法 光显一切菩提行
究竟清净普贤道 尽未来劫常修习

【6)利益愿】

我于一切诸有中	所修福智恒无尽
定慧方便及解脱	获诸无尽功德藏
一尘中有尘数刹	一一刹有难思佛
一一佛处众会中	我见恒演菩提行

【7)转法轮愿】

普尽十方诸刹海	一一毛端三世海
佛海及与国土海	我遍修行经劫海
一切如来语清净	一言具众音声海
随诸众生意乐音	一一流佛辩才海
三世一切诸如来	于彼无尽语言海
恒转理趣妙法轮	我深智力普能入

【8)净土愿】

我能深入于未来	尽一切劫为一念
三世所有一切劫	为一念际我皆入
我于一念见三世	所有一切人师子
亦常入佛境界中	如幻解脱及威力

【9)承事愿】

于一毛端极微中	出现三世庄严刹
十方尘刹诸毛端	我皆深入而严净
所有未来照世灯	成道转法悟群有
究竟佛事示涅槃	我皆往诣而亲近

【10)成正觉愿】

速疾周遍神通力	普门遍入大乘力
智行普修功德力	威神普覆大慈力
遍净庄严胜福力	无著无依智慧力
定慧方便威神力	普能积集菩提力
清净一切善业力	摧灭一切烦恼力
降伏一切诸魔力	圆满普贤诸行力

【总结十愿】

普能严净诸刹海	解脱一切众生海
善能分别诸法海	能甚深入智慧海
普能清净诸行海	圆满一切诸愿海
亲近供养诸佛海	修行无倦经劫海
三世一切诸如来	最胜菩提诸行愿
我皆供养圆满修	以普贤行悟菩提

【结归二圣：1.徧同普贤】

一切如来有长子	彼名号曰普贤尊
我今回向诸善根	愿诸智行悉同彼
愿身口意恒清净	诸行刹土亦复然
如是智慧号普贤	愿我与彼皆同等

【结归二圣：2.双齐二圣】

我为遍净普贤行	文殊师利诸大愿
满彼事业尽无余	未来际劫恒无倦

我所修行无有量	获得无量诸功德
安住无量诸行中	了达一切神通力
文殊师利勇猛智	普贤慧行亦复然
我今回向诸善根	随彼一切常修学

【结归二圣：3.结归回向】

三世诸佛所称叹	如是最胜诸大愿
我今回向诸善根	为得普贤殊胜行

【愿生净土】

愿我临欲命终时	尽除一切诸障碍
面见彼佛阿弥陀	即得往生安乐刹
我既往生彼国已	现前成就此大愿
一切圆满尽无余	利乐一切众生界
彼佛众会咸清净	我时于胜莲华生
亲睹如来无量光	现前授我菩提记
蒙彼如来授记已	化身无数百俱胝
智力广大遍十方	普利一切众生界

【总颂无尽】

乃至虚空世界尽	众生及业烦恼尽
如是一切无尽时	我愿究竟恒无尽

【颂前校量闻益】

十方所有无边刹	庄严众宝供如来
最胜安乐施天人	经一切刹微尘劫

若人于此胜愿王 一经于耳能生信
求胜菩提心渴仰 获胜功德过于彼

【颂通显诸行益：1.颂通显五果 2.颂究竟果】

即常远离恶知识 永离一切诸恶道
速见如来无量光 具此普贤最胜愿
此人善得胜寿命 此人善来人中生
此人不久当成就 如彼普贤菩萨行
往昔由无智慧力 所造极恶五无间
诵此普贤大愿王 一念速疾皆消灭
族姓种类及容色 相好智慧咸圆满
诸魔外道不能摧 堪为三界所应供
速诣菩提大树王 坐已降伏诸魔众
成等正觉转法轮 普利一切诸含识

【颂结劝受持】

若人于此普贤愿 读诵受持及演说
果报唯佛能证知 决定获胜菩提道
若人诵此普贤愿 我说少分之善根
一念一切悉皆圆 成就众生清净愿
我此普贤殊胜行 无边胜福皆回向
普愿沉溺诸众生 速往无量光佛刹

【结归：1.结说赞善 2.时众受持】

尔时，普贤菩萨摩诃萨，于如来前，说此普贤广大愿王清净偈已。善财童子，踊跃无量，一切菩萨，皆大欢喜。如来赞言：善哉。善哉。

尔时，世尊与诸圣者菩萨摩诃萨，演说如是不可思议解脱境界胜法门时，文殊师利菩萨而为上首。诸大菩萨及所成熟六千比丘，弥勒菩萨而为上首。贤劫一切诸大菩萨，无垢普贤菩萨而为上首。一生补处住灌顶位诸大菩萨及余十方种种世界，普来集会。一切刹海极微尘数菩萨摩诃萨众、大智舍利弗、摩诃目犍连等而为上首。

诸大声闻并诸人天一切世主、天、龙、夜叉、乾闥婆、阿修罗、迦楼罗、紧那罗、摩睺罗伽、人非人等一切大众，闻佛所说，皆大欢喜，信受奉行。

药王菩萨本事品

姚秦三藏法师鸠摩罗什 译

科判节自于法界佛教总会《妙法莲华经科文表解》

【宿王请问】

尔时，宿王华菩萨白佛言：世尊，药王菩萨云何游于娑婆世界？世尊，是药王菩萨，有若干百千万亿那由他难行苦行？善哉！世尊，愿少解说。诸天、龙、神、夜叉、乾闥婆、阿修罗、迦楼罗、紧那罗、摩睺罗伽、人、非人等，又他国土诸来菩萨，及此声闻众，闻皆欢喜。

【明事本】

尔时，佛告宿王华菩萨：乃往过去无量恒河沙劫，有佛号日月净明德如来、应供、正徧知、明行足、善逝、世间解无上士、调御丈夫、天人师、佛、世尊。其佛有八十亿大菩萨摩訶萨，七十二恒河沙大声闻众。佛寿四万二千劫，菩萨寿命亦等。

彼国无有女人、地狱、饿鬼、畜生、阿修罗等及以诸难。地平如掌，琉璃所成，宝树庄

严，宝帐覆上，垂宝华幡，宝瓶香炉，周徧国界。七宝为台，一树一台，其树去台，尽一箭道。此诸宝树，皆有菩萨声闻而坐其下。诸宝台上，各有百亿诸天，作天伎乐，歌叹于佛，以为供养。

【现身供养】

尔时，彼佛为一切众生喜见菩萨，及众菩萨、诸声闻众，说法华经。是一切众生喜见菩萨，乐习苦行，于日月净明德佛法中，精进经行，一心求佛，满万二千岁已，得现一切色身三昧。得此三昧已，心大欢喜，即作念言：我得现一切色身三昧，皆是得闻法华经力，我今当供养日月净明德佛及法华经。即时入是三昧，于虚空中，雨曼陀罗华、摩诃曼陀罗华、细末坚黑栴檀，满虚空中，如云而下。又雨海此岸栴檀之香，此香六铢，价直娑婆世界，以供养佛。

作是供养已，从三昧起，而自念言：我虽以神力供养于佛，不如以身供养。即服诸香、栴檀、熏陆、兜楼婆、毕力迦、沈水、胶香，又饮薝蔔诸华香油，满千二百岁已，香油涂身，

于日月净明德佛前，以天宝衣而自缠身，灌诸香油，以神通力愿而自然身，光明徧照八十亿恒河沙世界。

其中诸佛同时赞言：善哉！善哉！善男子，是真精进，是名真法供养如来。若以华香、璎珞、烧香、末香、涂香、天缯、幡盖及海彼岸栴檀之香，如是等种种诸物供养，所不能及。假使国城妻子布施，亦所不及。善男子，是名第一之施，于诸施中，最尊最上，以法供养诸如来故。作是语已，而各默然。其身火然千二百岁，过是已后，其身乃尽。

【次生供养】

一切众生喜见菩萨作如是法供养已，命终之后，复生日月净明德佛国中，于净德王家，结跏趺坐，忽然化生，即为其父而说偈言：

大王今当知。我经行彼处。

即时得一切。现诸身三昧。

勤行大精进。舍所爱之身。

供养于世尊。为求无上慧。

说是偈已，而白父言：日月净明德佛，今故现在。我先供养佛已，得解一切众生语言陀

罗尼，复闻是法华经八百千万亿那由他甄迦罗、频婆罗、阿閼婆等偈。大王，我今当还供养此佛。白已，即坐七宝之台，上升虚空，高七多罗树，往到佛所，头面礼足，合十指爪，以偈赞佛：

容颜甚奇妙。光明照十方。

我适曾供养。今复还亲觐。

尔时，一切众生喜见菩萨说是偈已，而白佛言：世尊，世尊，犹故在世。

尔时，日月净明德佛告一切众生喜见菩萨：善男子，我涅槃时到，灭尽时至，汝可安施床座，我于今夜，当般涅槃。又敕一切众生喜见菩萨：善男子，我以佛法，嘱累于汝，及诸菩萨、大弟子，并阿耨多罗三藐三菩提法，亦以三千大千七宝世界，诸宝树宝台及给侍诸天，悉付于汝。我灭度后，所有舍利，亦付嘱汝，当令流布，广设供养，应起若干千塔。如是日月净明德佛，敕一切众生喜见菩萨已，于夜后分，入于涅槃。

尔时，一切众生喜见菩萨见佛灭度，悲感懊恼，恋慕于佛，即以海此岸栴檀为藟，供养

佛身，而以烧之。火灭已后，收取舍利，作八万四千宝瓶，以起八万四千塔，高三世界，表刹庄严，垂诸幡盖，悬众宝铃。

尔时，一切众生喜见菩萨复自念言：我虽作是供养，心犹未足，我今当更供养舍利。便语诸菩萨、大弟子，及天龙夜叉等一切大众：汝等当一心念，我今供养日月净明德佛舍利。作是语已，即于八万四千塔前，然百福庄严臂，七万二千岁而以供养。令无数求声闻众、无量阿僧祇人，发阿耨多罗三藐三菩提心，皆使得住现一切色身三昧。

尔时，诸菩萨、天、人、阿修罗等，见其无臂，忧恼悲哀，而作是言：此一切众生喜见菩萨，是我等师，教化我者，而今烧臂，身不具足。

于时，一切众生喜见菩萨于大众中，立此誓言：我舍两臂，必当得佛金色之身。若实不虚，令我两臂还复如故。作是誓已，自然还复，由斯菩萨福德智慧淳厚所致。当尔之时，三千大千世界六种震动，天雨宝华，一切人天得未曾有。

【结会古今】

佛告宿王华菩萨：于汝意云何？一切众生喜见菩萨，岂异人乎？今药王菩萨是也。其所舍身布施，如是无量百千万亿那由他数。

【叹能持经人】

宿王华，若有发心欲得阿耨多罗三藐三菩提者，能燃手指，乃至足一指，供养佛塔，胜以国城妻子，及三千大千国土，山林河池、诸珍宝物，而供养者。若复有人，以七宝满三千大千世界，供养于佛及大菩萨、辟支佛、阿罗汉，是人所得功德，不如受持此法华经，乃至一四句偈，其福最多！

【叹所持经法：十种譬喻】

宿王华，譬如一切川流江河诸水之中，海为第一，此法华经亦复如是，于诸如来所说经中，最为深大。又如土山、黑山、小铁围山、大铁围山，及十宝山，众山之中，须弥山为第一，此法华经亦复如是，于诸经中最为其上。又如众星之中，月天子最为第一，此法华经亦复如是，于千万亿种诸经法中，最为照明。又如日天子，能除诸闇，此经亦复如是，能破一

切不善之闇。又如诸小王中，转轮圣王最为第一，此经亦复如是，于众经中，最为其尊。

又如帝释，于三十三天中王，此经亦复如是，诸经中王。又如大梵天王，一切众生之父，此经亦复如是，一切贤圣学无学，及发菩萨心者之父。又如一切凡夫人中，须陀洹、斯陀含、阿那含、阿罗汉、辟支佛为第一，此经亦复如是，一切如来所说，若菩萨所说，若声闻所说，诸经法中，最为第一。有能受持是经典者，亦复如是，于一切众生中，亦为第一。一切声闻、辟支佛中，菩萨为第一，此经亦复如是，于一切诸经法中，最为第一。如佛为诸法王，此经亦复如是，诸经中王。

宿王华，此经能救一切众生者，此经能令一切众生离诸苦恼，此经能大饶益一切众生，充满其愿。如清凉池，能满一切诸渴乏者，如寒者得火，如裸者得衣，如商人得主，如子得母，如渡得船，如病得医，如闇得灯，如贫得宝，如民得王，如贾客得海，如炬除闇；此法华经亦复如是，能令众生离一切苦、一切病痛，能解一切生死之缚。

【持经福德：1.持全经福 2.持此品福】

若人得闻此法华经，若自书，若使人书，所得功德，以佛智慧，筹量多少，不得其边。若书是经卷，华香璎珞，烧香末香涂香，幡盖衣服，种种之灯，酥灯油灯、诸香油灯、薝蔔油灯、须曼那油灯、波罗罗油灯、婆利师迦油灯、那婆摩利油灯供养，所得功德，亦复无量。

宿王华，若有人闻是药王菩萨本事品者，亦得无量无边功德。若有女人，闻是药王菩萨本事品，能受持者，尽是女身，后不复受。

若如来灭后，后五百岁中，若有女人，闻是经典，如说修行，于此命终，即往安乐世界，阿弥陀佛、大菩萨众，围绕住处，生莲华中，宝座之上，不复为贪欲所恼，亦复不为瞋恚愚痴所恼，亦复不为憍慢嫉妬诸垢所恼，得菩萨神通，无生法忍。得是忍已，眼根清净，以是清净眼根，见七百万二千亿那由他恒河沙等诸佛如来。

是时诸佛遥共赞言：善哉！善哉！善男子，汝能于释迦牟尼佛法中，受持读诵、思惟是经，为他人说，所得福德，无量无边，火不能焚，

水不能漂，汝之功德，千佛共说，不能令尽。汝今已能破诸魔贼，坏生死军，诸余怨敌，皆悉摧灭。善男子，百千诸佛，以神通力，共守护汝，于一切世间，天人之中，无如汝者，唯除如来，其诸声闻、辟支佛，乃至菩萨智慧禅定，无有与汝等者。

宿王华，此菩萨成就如是功德智慧之力。若有人闻是药王菩萨本事品，能随喜赞善者，是人现世口中，常出青莲华香，身毛孔中，常出牛头栴檀之香，所得功德，如上所说。

【嘱累】

是故，宿王华，以此药王菩萨本事品，嘱累于汝。我灭度后，后五百岁中，广宣流布于阎浮提，无令断绝，恶魔魔民，诸天龙夜叉，鸠槃荼等，得其便也。

宿王华，汝当以神通之力守护是经。所以者何？此经则为阎浮提人病之良药，若人有病，得闻是经，病即消灭，不老不死。宿王华，汝若见有受持是经者，应以青莲华盛满末香，供散其上，散已，作是念言：此人不久必当取草坐于道场，破诸魔军，当吹法螺，击大法鼓，

度脱一切众生老病死海。是故求佛道者，见有受持是经典人，应当如是生恭敬心。

说是药王菩萨本事品时，八万四千菩萨，得解一切众生语言陀罗尼。多宝如来于宝塔中，赞宿王华菩萨言：善哉！善哉！宿王华，汝成就不可思议功德，乃能问释迦牟尼佛如此之事，利益无量一切众生。



观世音菩萨普门品

姚秦三藏法师鸠摩罗什 译

科判节自于法界佛教总会《妙法莲华经科文表解》

【初番问答：得名所以】

尔时，无尽意菩萨即从座起，偏袒右肩，合掌向佛，而作是言：世尊，观世音菩萨以何因缘，名观世音？

佛告无尽意菩萨：善男子，若有无量百千万亿众生，受诸苦恼，闻是观世音菩萨，一心称名，观世音菩萨即时观其音声，皆得解脱。

【救七难：1.火难 2.水难 3.罗刹难 4.刀杖难 5.恶鬼难 6.枷锁难 7.怨贼难】

若有持是观世音菩萨名者，设入大火，火不能烧，由是菩萨威神力故。若为大水所漂，称其名号，即得浅处。若有百千万亿众生，为求金、银、琉璃、砗磲、码瑙、珊瑚、琥珀、真珠等宝，入于大海，假使黑风吹其船舫，飘堕罗刹鬼国，其中若有乃至一人，称观世音菩萨名者，是诸人等，皆得解脱罗刹之难。以是因缘，名观世音。

音注：砗磲(chē qú)

若复有人，临当被害，称观世音菩萨名者，彼所执刀杖，寻段段坏，而得解脱。若三千大千国土，满中夜叉罗刹，欲来恼人，闻其称观世音菩萨名者，是诸恶鬼尚不能以恶眼视之，况复加害。设复有人，若有罪，若无罪，枷械枷锁检系其身，称观世音菩萨名者，皆悉断坏，即得解脱。

若三千大千国土，满中冤贼，有一商主，将诸商人，赍持重宝，经过险路，其中一人作是唱言：诸善男子，勿得恐怖！汝等应当一心称观世音菩萨名号，是菩萨能以无畏施于众生；汝等若称名者，于此冤贼当得解脱。众商人闻，俱发声言：南无观世音菩萨！称其名故即得解脱。无尽意，观世音菩萨摩訶萨威神之力，巍巍如是。

【解三毒】

若有众生多于淫欲，常念恭敬观世音菩萨，便得离欲；若多瞋恚，常念恭敬观世音菩萨，便得离瞋；若多愚痴，常念恭敬观世音菩萨，便得离痴。无尽意，观世音菩萨有如是等大威神力，多所饶益，是故众生常应心念。

【应二求】

若有女人，设欲求男，礼拜供养观世音菩萨，便生福德智慧之男；设欲求女，便生端正有相之女，宿植德本，众人爱敬。无尽意，观世音菩萨有如是力。若有众生，恭敬礼拜观世音菩萨，福不唐捐。

【劝持名答】

是故众生，皆应受持观世音菩萨名号。无尽意，若有人受持六十二亿恒河沙菩萨名字，复尽形供养饮食、衣服、卧具、医药，于汝意云何？是善男子善女人功德多不？无尽意言：甚多！世尊。佛言：若复有人，受持观世音菩萨名号，乃至一时礼拜供养，是二人福，正等无异，于百千万亿劫不可穷尽。无尽意，受持观世音菩萨名号，得如是无量无边福德之利。

【次番问答：游化方便】

无尽意菩萨白佛言：世尊，观世音菩萨，云何游此娑婆世界？云何而为众生说法？方便之力，其事云何？

【三十二应身】

佛告无尽意菩萨：善男子，若有国土众生应以佛身得度者，观世音菩萨即现佛身而为说

法；应以辟支佛身得度者，即现辟支佛身而为说法；应以声闻身得度者，即现声闻身而为说法；应以梵王身得度者，即现梵王身而为说法；应以帝释身得度者，即现帝释身而为说法；应以自在天身得度者，即现自在天身而为说法；应以大自在天身得度者，即现大自在天身而为说法；应以天大将军身得度者，即现天大将军身而为说法；应以毗沙门身得度者，即现毗沙门身而为说法。

应以小王身得度者，即现小王身而为说法；应以长者身得度者，即现长者身而为说法；应以居士身得度者，即现居士身而为说法；应以宰官身得度者，即现宰官身而为说法；应以婆罗门身得度者，即现婆罗门身而为说法；应以比丘、比丘尼、优婆塞、优婆夷身得度者，即现比丘、比丘尼、优婆塞、优婆夷身而为说法；应以长者、居士、宰官、婆罗门妇女身得度者，即现妇女身而为说法；应以童男童女身得度者，即现童男童女身而为说法；应以天、龙、夜叉、乾闥婆、阿修罗、迦楼罗、紧那罗、摩睺罗伽、人、非人等身得度者，即皆现之而

为说法；应以执金刚神得度者，即现执金刚神而为说法。

无尽意，是观世音菩萨成就如是功德，以种种形，游诸国土，度脱众生。

【劝供养】

是故汝等应当一心供养观世音菩萨，是观世音菩萨摩訶萨，于怖畏急难之中，能施无畏，是故此娑婆世界皆号之为施无畏者。

无尽意菩萨白佛言：世尊，我今当供养观世音菩萨。即解颈众宝珠璎珞，价直百千两金而以与之，作是言：仁者，受此法施珍宝璎珞。时观世音菩萨不肯受之。无尽意复白观世音菩萨言：仁者，愍我等故，受此璎珞。

尔时，佛告观世音菩萨：当愍此无尽意菩萨，及四众、天龙、夜叉、乾闥婆、阿修罗、迦楼罗、紧那罗、摩睺罗伽、人非人等故，受是璎珞。即时观世音菩萨愍诸四众，及于天龙人非人等，受其璎珞，分作二分，一分奉释迦牟尼佛，一分奉多宝佛塔。

无尽意，观世音菩萨，有如是自在神力，游于娑婆世界。

尔时，无尽意菩萨以偈问曰：

世尊妙相具 我今重问彼 佛子何因缘 名为观世音
具足妙相尊 偈答无尽意 汝听观音行 善应诸方所
弘誓深如海 历劫不思议 侍多千亿佛 发大清净愿
我为汝略说 闻名及见身 心念不空过 能灭诸有苦

【颂别答：1.颂七难 2.颂三毒二求】

假使兴害意 推落大火坑 念彼观音力 火坑变成池
或漂流巨海 龙鱼诸鬼难 念彼观音力 波浪不能没
或在须弥峯 为人所推堕 念彼观音力 如日虚空住
或被恶人逐 堕落金刚山 念彼观音力 不能损一毛
或值冤贼绕 各执刀加害 念彼观音力 咸即起慈心
或遭王难苦 临刑欲寿终 念彼观音力 刀寻段段坏
或囚禁枷锁 手足被杻械 念彼观音力 释然得解脱
咒诅诸毒药 所欲害身者 念彼观音力 还著于本人
或遇恶罗刹 毒龙诸鬼等 念彼观音力 时悉不敢害
若恶兽围绕 利牙爪可怖 念彼观音力 疾走无边方
蚺蛇及蝮蝎 气毒烟火然 念彼观音力 寻声自回去
云雷鼓掣电 降雹澍大雨 念彼观音力 应时得消散
众生被困厄 无量苦逼身 观音妙智力 能救世间苦

【颂后答：1.普门示现 2.显机显应】

具足神通力 广修智方便 十方诸国土 无刹不现身
种种诸恶趣 地狱鬼畜生 生老病死苦 以渐悉令灭

音注：须弥峯(fēng 同"峰") 蚺(yuán)蛇 掣(chè) 澍(shù)大雨护

真观清净观 广大智慧观 悲观及慈观 常愿常瞻仰
无垢清净光 慧日破诸闇 能伏灾风火 普明照世间
悲体戒雷震 慈意妙大云 澍甘露法雨 灭除烦恼焰
诤讼经官处 怖畏军阵中 念彼观音力 众冤悉退散

【二劝：1.劝持名 2.劝供养】

妙音观世音 梵音海潮音 胜彼世间音 是故须常念
念念勿生疑 观世音净圣 于苦恼死厄 能为作依怙
具一切功德 慈眼视众生 福聚海无量 是故应顶礼

尔时，持地菩萨即从座起，前白佛言：世尊，若有众生，闻是观世音菩萨品自在之业、普门示现神通力者，当知是人功德不少。佛说是普门品时，众中八万四千众生，皆发无等等阿耨多罗三藐三菩提心。

四种清净明诲

唐中天竺沙门般刺密谛 译
科判节自于法界佛教总会《大佛顶首楞严经科判》

【阿难请】

阿难整衣服，于大众中合掌顶礼，心迹圆明，悲欣交集。欲益未来诸众生故，稽首白佛：大悲世尊！我今已悟成佛法门，是中修行得无疑惑。常闻如来说如是言：自未得度先度人者，菩萨发心；自觉已圆能觉他者，如来应世。我虽未度，愿度末劫一切众生。

世尊！此诸众生去佛渐远，邪师说法如恒河沙，欲摄其心入三摩地，云何令其安立道场，远诸魔事，于菩提心得无退屈？

【如来说】

尔时世尊，于大众中称赞阿难：善哉善哉！如汝所问安立道场，救护众生末劫沈溺。汝今谛听，当为汝说！阿难大众，唯然奉教。

佛告阿难：汝常闻我毗奈耶中，宣说修行三决定义：所谓摄心为戒，因戒生定，因定发慧，是则名为三无漏学。阿难！云何摄心，我名为戒？

【断淫】

若诸世界六道众生，其心不淫，则不随其生死相续。

汝修三昧，本出生劳，淫心不除，尘不可出。纵有多智，禅定现前，如不断淫，必落魔道；上品魔王，中品魔民，下品魔女。彼等诸魔，亦有徒众，各各自谓成无上道。

我灭度后，末法之中，多此魔民炽盛世间，广行贪淫，为善知识；令诸众生落爱见坑，失菩提路。汝教世人修三摩地，先断心淫，是名如来、先佛世尊，第一决定清净明诲。

是故阿难！若不断淫修禅定者，如蒸砂石，欲其成饭，经百千劫，只名热砂。何以故？此非饭本，砂石成故。汝以淫身求佛妙果，纵得妙悟，皆是淫根；根本成淫，轮转三途，必不能出。如来涅槃，何路修证？必使淫机身心俱断，断性亦无，于佛菩提斯可希冀。

如我此说，名为佛说；不如此说，即波旬说。

【断杀】

阿难！又诸世界六道众生，其心不杀，则

不随其生死相续。

汝修三昧，本出生劳，杀心不除，尘不可出。纵有多智，禅定现前，如不断杀，必落神道；上品之人为大力鬼，中品则为飞行夜叉、诸鬼帅等，下品当为地行罗刹。彼诸鬼神，亦有徒众，各各自谓成无上道。

我灭度后，末法之中，多此鬼神炽盛世间，自言食肉得菩提路。阿难！我令比丘食五净肉，此肉皆我神力化生，本无命根。汝婆罗门地多蒸湿，加以砂石，草菜不生。我以大悲神力所加，因大慈悲，假名为肉，汝得其味。奈何如来灭度之后，食众生肉，名为释子？汝等当知：是食肉人，纵得心开，似三摩地；皆大罗刹，报终必沈生死苦海，非佛弟子。如是之人，相杀相吞，相食未已，云何是人得出三界？汝教世人修三摩地，次断杀生。是名如来、先佛世尊，第二决定清净明诲。

是故阿难！若不断杀修禅定者，譬如有人，自塞其耳，高声大叫，求人不得，此等名为欲隐弥露。清净比丘，及诸菩萨，于岐路行，不蹋生草，况以手拔？云何大悲，取诸众生血肉

充食？

若诸比丘不服东方丝绵绢帛，及是此土靴履裘毳、乳酪醍醐；如是比丘，于世真脱，酬还宿债，不游三界。何以故？服其身分，皆为彼缘；如人食其地中百谷，足不离地。必使身心，于诸众生，若身身分，身心二涂，不服不食，我说是人真解脱者。

如我此说，名为佛说；不如此说，即波旬说。

【断盗】

阿难！又复世界六道众生，其心不偷，则不随其生死相续。

汝修三昧，本出生劳，偷心不除，尘不可出。纵有多智，禅定现前，如不断偷，必落邪道；上品精灵，中品妖魅，下品邪人，诸魅所著。彼等群邪，亦有徒众，各各自谓成无上道。

我灭度后，末法之中，多此妖邪炽盛世间，潜匿奸欺，称善知识。各自谓已得上人法，诳惑无识，恐令失心；所过之处，其家耗散。我教比丘，循方乞食，令其舍贪，成菩提道。诸比丘等，不自熟食，寄于残生，旅泊三界，示一往还，去已无返。云何贼人假我衣服，裨贩

如来，造种种业，皆言佛法？却非出家具戒比丘，为小乘道。由是疑误无量众生，堕无间狱。

若我灭后，其有比丘，发心决定修三摩地；能于如来形像之前，身然一灯，烧一指节，及于身上爇一香炷。我说是人无始宿债，一时酬毕，长揖世间，永脱诸漏；虽未即明无上觉路，是人于法已决定心。若不为此，舍身微因，纵成无为，必还生人，酬其宿债，如我马麦，正等无异。汝教世人修三摩地，后断偷盗，是名如来、先佛世尊，第三决定清净明诲。

是故阿难，若不断偷修禅定者，譬如有人，水灌漏卮，欲求其满，纵经尘劫，终无平复。若诸比丘，衣钵之余，分寸不畜，乞食余分，施饿众生。于大集会，合掌礼众；有人捶詈，同于称赞。必使身心二俱捐舍，身肉骨血与众生共；不将如来不了义说，回为己解，以误初学。佛印是人得真三昧。

如我所说，名为佛说；不如此说，即波旬说。

【断妄】

阿难！如是世界六道众生，虽则身心无杀盗淫，三行已圆，若大妄语，即三摩提不得清

净，成爱见魔，失如来种。

所谓未得谓得，未证言证。或求世间尊胜第一，谓前人言：我今已得须陀洹果、斯陀含果、阿那含果、阿罗汉道、辟支佛乘、十地、地前诸位菩萨。求彼礼忏，贪其供养。是一颠迦，销灭佛种，如人以刀断多罗木。佛记是人，永殒善根，无复知见，沈三苦海，不成三昧。

我灭度后，勅诸菩萨及阿罗汉，应身生彼末法之中，作种种形，度诸轮转。或作沙门，白衣居士，人王宰官，童男童女，如是乃至淫女寡妇，奸偷屠贩。与其同事，称赞佛乘，令其身心入三摩地。终不自言：我真菩萨、真阿罗汉，泄佛密因，轻言未学。唯除命终，阴有遗付，云何是人惑乱众生，成大妄语？汝教世人修三摩地，后复断除诸大妄语，是名如来、先佛世尊，第四决定清淨明海。

是故阿难，若不断其大妄语者，如刻人粪为栴檀形，欲求香气，无有是处。我教比丘直心道场，于四威仪一切行中，尚无虚假，云何自称得上人法？譬如穷人妄号帝王，自取诛灭。况复法王，如何妄窃？因地不真，果招纡

曲；求佛菩提，如噬脐人，欲谁成就？若诸比丘，心如直弦，一切真实，入三摩提，永无魔事。我印是人，成就菩萨无上知觉。

如我所说，名为佛说；不如此说，即波旬说。

【总结远魔】

阿难！汝问摄心，我今先说，入三摩地修学妙门。求菩萨道，要先持此四种律仪，皎如冰霜，自不能生一切枝叶；心三口四，生必无因。阿难！如是四事若不遗失，心尚不缘色香味触，一切魔事云何发生？

观世音菩萨耳根圆通章

唐中天竺沙门般刺密谛 译

《大佛顶如来密因修证了义诸菩萨万行首楞严经》

尔时观世音菩萨，即从座起，顶礼佛足，而白佛言：世尊！忆念我昔无数恒河沙劫，于时有佛出现于世，名观世音。

我于彼佛发菩提心，彼佛教我从闻思修，入三摩地。初于闻中，入流亡所，所入既寂，动静二相，了然不生。如是渐增，闻所闻尽，尽闻不住，觉所觉空，空觉极圆，空所空灭，生灭既灭，寂灭现前。

忽然超越世出世间，十方圆明，获二殊胜：一者，上合十方诸佛本妙觉心，与佛如来同一慈力。二者，下合十方一切六道众生，与诸众生同一悲仰。

大勢至菩薩念佛圓通章

唐中天竺沙门般刺密谛 译

《大佛顶如来密因修证了义诸菩萨万行首楞严经》

大勢至法王子，与其同伦五十二菩萨，即从座起，顶礼佛足，而白佛言：我忆往昔恒河沙劫，有佛出世，名无量光，十二如来相继一劫，其最后佛名超日月光，彼佛教我念佛三昧。

譬如有人，一专为忆，一人专忘，如是二人，若逢不逢，或见非见。二人相忆，二忆念深，如是乃至从生至生，同于形影，不相乖异。十方如来怜念众生，如母忆子，若子逃逝，虽忆何为？子若忆母，如母忆时，母子历生不相违远。若众生心忆佛念佛，现前当来必定见佛。去佛不远，不假方便，自得心开。如染香人身有香气，此则名曰：香光庄严。

我本因地，以念佛心入无生忍。今于此界，摄念佛人归于净土。佛问圆通，我无选择，都摄六根，净念相继，得三摩地，斯为第一。

大佛顶首楞严咒 启请

大兴善寺三藏沙门大广智不空 译

出自 房山石刻

启 讽放光大佛顶
开无相门圆寂宗
瑜伽妙旨传心印
说此秘密悉怛多
菩提力大虚空量
不持斋者是持斋
八万四千金刚众
十方法界诸如来
念满一万八千遍
号称坚固金刚幢
纵使骂詈不为过
神通变化不思议
大圣放光佛顶力
唯闻念者薝蔔香
僧破二百五十戒
闻念佛顶陀罗尼
我今依经述偈赞
听者念者得加持

如来万行首楞严
字字观照金刚定
摩诃衍行总持门
解脱法身金刚句
三昧智印果无边
不持戒者名持戒
行住坐卧每随身
护念皈命受持者
遍遍入于无想定
自在得名人中佛
诸天常闻梵语声
陀罗尼门最第一
掩恶扬善证菩提
不嗅一切余香气
比丘尼犯八波罗
便得具足声闻戒
无量功德普庄严
同获涅槃寂灭乐

佛顶光明摩诃萨怛多般怛啰无上神咒

南无本师释迦牟尼佛！（三称）

南无楞严会上佛菩萨！（三称）

妙湛总持不动尊，首楞严王世希有。

销我亿劫颠倒想，不历僧祇获法身。

愿今得果成宝王，还度如是恒沙众。

将此深心奉尘刹，是则名为报佛恩。

伏请世尊为证明，五浊恶世誓先入。

如一众生未成佛，终不於此取泥洹。

大雄大力大慈悲，希更审除微细惑。

令我早登无上觉，於十方界坐道场。

舜若多性可销亡，烁迦罗心无动转。

南无常住十方佛。南无常住十方法。南无常住十

方僧。南无释迦牟尼佛。南无佛顶首楞严。南无

观世音菩萨。南无金刚藏菩萨。

尔时世尊，从肉髻中，涌百宝光。光中涌出，千叶

宝莲。有化如来，坐宝华中。顶放十道，百宝光明。

一一光明，皆徧示现，十恒河沙，金刚密迹，擎山

持杵，徧虚空界。大众仰观，畏爱兼抱。求佛哀祐，

一心听佛，无见顶相，放光如来，宣说神咒。

◆ 第一会 ◆

<1>

南無薩怛他 蘇伽多耶 阿羅訶帝 三藐三菩陀寫。

南無薩怛他 佛陀俱胝 瑟尼釤。

南無薩婆 勃陀勃地 薩跢鞞弊。

南無薩多南 三藐三菩陀 俱知南。娑舍囉婆迦僧伽喃。

南無盧雞阿羅漢跢喃。南無蘇盧多波那喃。南無娑羯唎陀伽彌喃。南無盧雞三藐伽跢喃。三藐伽波囉 底波多那喃。

南無提婆离瑟赦。南無悉陀耶 毗地耶 陀囉离瑟赦。舍波奴 揭囉訶 娑訶娑囉摩他喃。南無跋囉訶摩泥。南無因陀囉耶。

<2>

南無婆伽婆帝。嚧陀囉耶。烏摩般帝。娑醯夜耶。

南無婆伽婆帝。那囉野 拏耶。槃遮摩訶三慕陀囉。南無悉羯唎多耶。

南無婆伽婆帝。摩訶迦羅耶。地唎般剌那 伽囉。毗陀囉 波拏迦囉耶。阿地目帝。尸摩舍那泥 婆悉泥。摩怛唎伽拏。南無悉羯唎多耶。

南無婆伽婆帝。多他伽跢俱囉耶。南無般頭摩俱

注：第二句“南無薩怛他 佛陀俱胝 瑟尼釤”：此处依宣化上人、清朝续法大师《楞严咒疏》，加“南无”二字。（南无，即皈命敬投之意，亦即信从、敬礼之意。）持咒者可自行决定添加与否。

囉耶。南無跋闍囉俱囉耶。南無摩尼俱囉耶。南無伽闍俱囉耶。

南無婆伽婆帝。帝唎茶 輸囉西那。波囉訶囉拏囉闍耶。跢他伽多耶。

<3>

南無婆伽婆帝。南無阿彌多婆耶。哆他伽多耶。阿囉訶帝。三藐三菩陀耶。

南無婆伽婆帝。阿芻鞞耶。跢他伽多耶。阿囉訶帝。三藐三菩陀耶。

南無婆伽婆帝。鞞沙闍耶 俱盧吠柱唎耶。般囉婆囉闍耶。跢他伽多耶。

南無婆伽婆帝。三補師毖多。薩憐捺囉刺闍耶。跢他伽多耶。阿囉訶帝。三藐三菩陀耶。

南無婆伽婆帝。舍雞野母那曳。跢他伽多耶。阿囉訶帝。三藐三菩陀耶。

南無婆伽婆帝。刺怛那雞都囉闍耶。跢他伽多耶。阿囉訶帝。三藐三菩陀耶。

<4>

帝瓢 南無薩羯唎多。翳曇婆伽婆多。薩怛他伽都 瑟尼釤。薩怛多般怛藍。

南無阿婆囉視耽。般囉帝 揚歧囉。薩囉婆 部

多揭囉訶。尼羯囉訶 揭迦囉訶尼。跋囉毖地耶
叱陀你。阿迦囉 蜜唎柱。般唎怛囉耶 儻揭唎。
薩囉婆 槃陀那 目叉尼。薩囉婆 突瑟吒。突悉
乏 般那你 伐囉尼。赭都囉 失帝南。

<5>

羯囉訶 娑訶薩囉若闍。毗多崩娑那羯唎。阿瑟
吒冰舍帝南。

那叉刹怛囉若闍。波囉薩陀那羯唎。阿瑟吒南。

摩訶揭囉訶若闍。毗多崩薩那羯唎。

薩婆舍都嚧 你婆囉若闍。呼藍突悉乏 難遮那
舍尼。毖沙舍 悉怛囉。

阿吉尼 烏陀迦囉若闍。

阿般囉 視多具囉。

摩訶般囉 戰持。摩訶疊多。摩訶帝闍。摩訶稅
多 闍婆囉。摩訶跋囉 槃陀囉 婆悉你。阿唎耶
多囉。毗唎俱知。誓婆毗闍耶。

<6>

跋闍囉摩禮底。毗舍嚧多。勃騰罔迦。

跋闍囉制喝那阿遮。摩囉制婆 般囉質多。

跋闍囉擅持。毗舍囉遮。扇多舍 鞞提婆 補視
多。蘇摩嚧波。摩訶稅多。阿唎耶多囉。摩訶

娑囉 阿般囉。

跋闍囉商羯囉制婆。

跋闍囉俱摩唎。俱藍陀唎。

跋闍囉喝薩多遮。毗地耶 乾遮那 摩唎迦。囉
蘇母 娑羯囉路那。鞞嚧遮那 俱唎耶。夜囉菟
瑟尼釤。毗折藍婆 摩尼遮。

跋闍囉迦那迦 波囉婆。嚧闍那

跋闍囉頓稚遮。稅多遮 迦摩囉。刹奢尸 波囉
婆。翳帝夷帝。母陀囉羯拏。娑鞞囉懺。掘梵
都。印兔那 麼麼寫。

◆第二會◆

<7>

烏鉢。唎瑟揭拏。般刺舍悉多。薩怛他 伽都瑟
尼釤。

虎鉢。都嚧雍。瞻婆那。

虎鉢。都嚧雍。悉耽婆那。

虎鉢。都嚧雍。波囉瑟地耶 三般叉 拏羯囉。

虎鉢。都嚧雍。薩婆藥叉 喝囉刹娑。揭囉訶若
闍。毗騰崩薩那羯囉。

虎鉢。都嚧雍。者都囉 尸底南。揭囉訶 娑訶
薩囉南。毗騰崩薩那囉。

虎𤙖。都嚧雍。囉叉。婆伽梵。薩怛他 伽都瑟
尼釤。

波囉點 闍吉唎。摩訶娑訶薩囉。勃樹娑訶薩囉
室唎沙。俱知娑訶薩泥 帝隸。阿弊提視婆唎
多。吒吒嚧迦。摩訶跋闍嚧陀囉。帝唎菩婆那。
曼荼囉。

烏𤙖。莎悉帝 薄婆都。麼麼。印兔那 麼麼寫。

◆第三会◆

<8>

囉闍婆夜。主囉跋夜。阿祇尼婆夜。烏陀迦婆
夜。毗沙婆夜。舍薩多囉婆夜。婆囉斫羯囉婆
夜。突瑟叉婆夜。阿舍你婆夜。阿迦囉 蜜唎柱
婆夜。陀囉尼 部彌劒 波伽波陀婆夜。烏囉迦
婆多婆夜。刺闍壇荼婆夜。那伽婆夜。毗條怛
婆夜。蘇波囉拏婆夜。

<9>

藥叉揭囉訶。囉叉私揭囉訶。畢唎多揭囉訶。
毗舍遮揭囉訶。部多揭囉訶。鳩槃荼揭囉訶。
補丹那揭囉訶。迦吒補丹那揭囉訶。悉乾度揭
囉訶。阿播悉摩囉揭囉訶。烏檀摩陀揭囉訶。
車夜揭囉訶。醯唎婆帝揭囉訶。

<10>

社多訶唎南。揭婆訶唎南。嚧地囉訶唎南。忙
娑訶唎南。謎陀訶唎南。摩闍訶唎南。闍多訶
唎女。視比多訶唎南。毗多訶唎南。婆多訶唎
南。阿輸遮訶唎女。質多訶唎女。帝釤薩鞞釤。
薩婆揭囉訶南。

<11>

毗陀耶闍 瞋陀夜彌。雞囉夜彌。波唎跋囉者迦
訖唎擔。

毗陀夜闍 瞋陀夜彌。雞囉夜彌。茶演尼訖唎擔。

毗陀夜闍 瞋陀夜彌。雞囉夜彌。摩訶般輸般怛
夜。嚧陀囉訖唎擔。

毗陀夜闍 瞋陀夜彌。雞囉夜彌。那囉夜拏訖唎擔。

毗陀夜闍 瞋陀夜彌。雞囉夜彌。怛埵伽嚧茶西
訖唎擔。

<12>

毗陀夜闍 瞋陀夜彌。雞囉夜彌。摩訶迦囉 摩
怛唎伽拏訖唎擔。

毗陀夜闍 瞋陀夜彌。雞囉夜彌。迦波唎迦訖唎擔。

毗陀夜闍 瞋陀夜彌。雞囉夜彌。闍耶羯囉摩度
羯囉。薩婆囉他娑達那訖唎擔。

毗陀夜闍 瞋陀夜彌。雞囉夜彌。赭咄囉婆耆你
訖唎擔。

毗陀夜闍 瞋陀夜彌。雞囉夜彌。毗唎羊訖唎
知。難陀雞沙囉伽拏般帝。索醯夜訖唎擔。

<13>

毗陀夜闍 瞋陀夜彌。雞囉夜彌。那揭那舍囉婆
拏訖唎擔。

毗陀夜闍 瞋陀夜彌。雞囉夜彌。阿羅漢訖唎擔。

毗陀夜闍 瞋陀夜彌。雞囉夜彌。毗多囉伽訖唎擔。

毗陀夜闍 瞋陀夜彌。雞囉夜彌 跋闍囉波你。

具醯夜具醯夜。迦地般帝訖唎擔。

毗陀夜闍 瞋陀夜彌。雞囉夜彌。囉叉罔。婆伽
梵。印兔那 麼麼寫。

◆第四会◆

<14>

婆伽梵。薩怛多般怛囉。南無粹都帝。阿悉多那
囉剌迦。波囉婆 悉普吒。毗迦薩怛多鉢帝唎。什
佛囉什佛囉。陀囉陀囉。頻陀囉頻陀囉 瞋陀瞋
陀。虎𤙖虎𤙖。泮吒。泮吒泮吒泮吒泮吒。娑訶。
醯醯泮。阿牟迦耶泮。阿波囉提訶多泮。婆囉
波囉陀泮。阿素囉 毗陀囉 波迦泮。

<15>

薩婆提鞞弊泮。薩婆那伽弊泮。薩婆藥叉弊泮。
薩婆乾闥婆弊泮。薩婆補丹那弊泮。迦吒補丹
那弊泮。

薩婆突狼枳帝弊泮。薩婆突澀比嚩訖瑟帝弊
泮。薩婆什婆唎弊泮。薩婆阿播悉摩嚩弊泮。
薩婆舍囉婆拏弊泮。薩婆地帝雞弊泮。薩婆怛
摩陀繼弊泮。薩婆毗陀耶 囉誓遮嚩弊泮。

闍夜羯囉 摩度羯囉。薩婆囉他娑陀雞弊泮。毗
地夜遮唎弊泮。耆都囉 縛耆你弊泮。跋闍囉 俱
摩唎。毗陀夜囉誓弊泮。摩訶波囉丁羊 叉耆唎
弊泮。

跋闍囉 商羯囉夜。波囉丈耆 囉闍耶泮。摩訶
迦囉夜。摩訶 末怛唎迦拏。

<16>

南無娑羯唎多夜泮。毖瑟拏婢曳泮。勃囉訶牟
尼曳泮。阿耆尼曳泮。摩訶羯唎曳泮。羯囉檀
遲曳泮。蔑怛唎曳泮。嚩怛唎曳泮。遮文茶曳
泮。羯邏囉怛唎曳泮。迦般唎曳泮。阿地目質
多 迦尸摩舍那。婆私你曳泮。演吉質。薩埵婆
寫。麼麼 印兔那 麼麼寫。

◆第五会◆

<17>

突瑟吒質多。阿末怛唎質多。烏闍訶囉。伽婆訶囉。嚧地囉訶囉。娑娑訶囉。摩闍訶囉。闍多訶囉。視毖多訶囉。跋略夜訶囉。乾陀訶囉。布史波訶囉。頗囉訶囉。婆寫訶囉。般波質多。突瑟吒質多。嚧陀囉質多。

<18>

藥叉揭囉訶。囉刹娑揭囉訶。闭隸多揭囉訶。毗舍遮揭囉訶。部多揭囉訶。鳩槃荼揭囉訶。悉乾陀揭囉訶。烏怛摩陀揭囉訶。車夜揭囉訶。阿播薩摩囉揭囉訶。宅祛革荼耆尼揭囉訶。唎佛帝揭囉訶。闍彌迦揭囉訶。舍俱尼揭囉訶。姥陀囉難地迦揭囉訶。阿藍婆揭囉訶。乾度波尼揭囉訶。

<19>

什伐囉 堙迦醯迦。墜帝藥迦。怛隸帝藥迦。耆突託迦。昵提什伐囉 毖釤摩什伐囉。薄底迦。鼻底迦。室隸瑟蜜迦。娑你般帝迦。薩婆什伐囉。室嚧吉帝。末陀鞞達嚧制劒。阿綺嚧鉗。目佉嚧鉗。羯唎突嚧鉗。

揭囉訶揭藍。羯拏輸藍。憚多輸藍。迄唎夜輸藍。末麼輸藍。跋唎室婆輸藍。毖栗瑟吒輸藍。烏陀囉輸藍。羯知輸藍。跋悉帝輸藍。鄔嚧輸藍。常伽輸藍。喝悉多輸藍。跋陀輸藍。娑房盎伽 般囉丈伽輸藍。

<20>

部多毖路茶。茶耆尼 什婆囉。陀突嚧迦 建咄嚧吉知 婆路多毗。薩般嚧 訶凌伽。輸沙怛囉娑那羯囉。毗沙喻迦。阿耆尼 烏陀迦。

末囉鞞囉建路囉。阿迦囉 蜜唎咄 怛斂部迦。地栗刺吒。毖唎瑟質迦。薩婆那俱囉。肆引伽弊 揭囉唎藥叉 怛囉芻。末囉視 吠帝釤 娑鞞釤。悉怛多鉢怛囉。摩訶跋闍嚧 瑟尼釤。摩訶般賴丈耆藍。夜波突陀 舍喻闍那。辯怛隸拏。毗陀耶槃曇迦嚧彌。帝殊槃曇迦嚧彌。般囉毗陀槃曇迦嚧彌。

路姪他。唵。阿那隸。毗舍提。鞞囉跋闍囉陀唎。槃陀槃陀你。跋闍囉謗尼泮。虎舁都嚧甕泮。莎婆訶。

注：每天背一段。背熟了再背下一段。

大佛顶首楞严咒 回向

大兴善寺三藏沙门大广智不空 译

如来顶髻无上善	回向教主释迦尊
大悲毗卢遮那佛	十方一切诸如来
金刚藏王诸大士	一字金轮八佛顶
哀愍摄受愿海中	消除业障证三昧
日日持念一七遍	极重烦恼皆消灭
金刚密迹诸眷属	每日每夜常守护
二类诸天悉欢喜	二类权实皆随喜
琰魔法王能覆护	一切冥道恒加护
一切善神常守护	一切恶神慈悲护
一切天女能护念	一切神女善护念
随顺一切鬼神众	恭敬供养佛心咒
修行佛子无障难	菩提行愿不退转
生生值遇白伞盖	世世持诵不忘念
恒修普贤菩萨行	尽于未来心意愿
慈悲哀愍为加护	阿字法门悉皆悟
四恩法界诸众生	平等利益证妙果
回向无上大菩提	

大 悲 咒

称念圣号：

南无本师释迦牟尼佛（三称）

南无千手千眼大慈大悲观世音菩萨（三称）

南无阿弥陀佛（三称）

南无日光菩萨（三称）

南无月光菩萨（三称）

发愿：

稽首观音大悲主，愿力洪深相好身。

千臂庄严普护持，千眼光明遍观照。

真实语中宣密语，无为心内起悲心。

速令满足诸希求，永使灭除诸罪业。

龙天圣众同慈护，百千三昧顿熏修。

受持身是光明幢，受持心是神通藏。

洗涤尘劳愿济海，超证菩提方便门。

我今称诵誓皈依，所愿从心悉圆满。

南无大悲观世音，愿我速知一切法。
南无大悲观世音，愿我早得智慧眼。
南无大悲观世音，愿我速度一切众。
南无大悲观世音，愿我早得善方便。
南无大悲观世音，愿我速乘般若船。
南无大悲观世音，愿我早得越苦海。
南无大悲观世音，愿我速得戒定道。
南无大悲观世音，愿我早登涅槃山。
南无大悲观世音，愿我速会无为舍。
南无大悲观世音，愿我早同法性身。

我若向刀山，刀山自摧折。
我若向火汤，火汤自枯竭。
我若向地狱，地狱自消灭。
我若向饿鬼，饿鬼自饱满。
我若向修罗，恶心自调伏。
我若向畜生，自得大智慧。

南无观世音菩萨（十称）

南无阿弥陀佛（十称）

大悲咒（五遍）

南无喝啰怛那 哆啰夜耶。南无阿唎耶。
娑卢羯帝 烁钵啰耶。菩提萨埵婆耶。摩诃萨
埵婆耶。摩诃迦卢尼迦耶。

唵。萨皤啰罚曳。数怛那怛写。

南无悉吉利埵 伊蒙阿唎耶。娑卢吉帝 室
佛啰嚧驮婆。南无那啰谨墀。酰唎摩诃 皤哆
沙咤。萨婆阿他豆输朋。阿逝孕。萨婆萨哆 那
摩婆萨哆 那摩婆伽。摩罚特豆。

怛侄他。唵。阿婆卢酰。卢迦帝。迦罗帝。
夷酰唎。摩诃菩提萨埵。

萨婆萨婆。摩罗摩罗。摩酰摩酰 唎驮孕。
俱卢俱卢羯蒙。度卢度卢 罚闍耶帝。摩诃罚
闍耶帝。陀罗陀罗。地利尼。室佛啰耶。遮罗
遮罗。摩摩罚摩啰。穆帝嚧。伊酰移酰。室那
室那。阿啰嚧 佛啰舍利。罚沙罚嚧。佛罗舍
耶。呼嚧呼嚧摩啰。呼嚧呼嚧酰利。娑啰娑啰。
悉利悉利。苏嚧苏嚧。菩提夜菩提夜。菩驮夜
菩驮夜。弥帝利夜。那啰谨墀。地唎瑟尼那。

波夜摩那。娑婆诃。悉陀夜。娑婆诃。摩
诃悉陀夜。娑婆诃。悉陀喻艺。室幡啰耶。娑
婆诃。那啰谨墀。娑婆诃。摩啰那啰。娑婆诃。
悉啰僧阿穆佉耶。娑婆诃。娑婆摩诃阿悉陀夜。
娑婆诃。者吉啰阿悉陀夜。娑婆诃。波陀摩羯
悉陀夜。娑婆诃。那啰谨墀幡伽啰耶。娑婆诃。
摩婆利胜羯啰夜。娑婆诃。

南无喝啰怛那 哆啰夜耶。南无阿唎耶。
婆嚧吉帝。烁皤啰夜。娑婆诃。唵。悉殿都。
曼哆啰。钵陀耶。娑婆诃。

金刚胜庄严娑婆诃。声闻胜庄严娑婆诃。
摩羯胜庄严娑婆诃。唵。跋闍啰悉哩曳娑婆诃。

日光菩萨陀罗尼（五遍）

南无勃陀瞿那迷。南无达摩莫诃低。南无
僧伽多夜泥。底哩部毕萨咄檐纳摩。

月光菩萨陀罗尼（五遍）

深低帝屠苏吒。阿若蜜帝乌都吒。深耆吒。
波赖帝。耶弥若吒乌都吒。拘罗帝吒耆摩吒。
沙婆诃。

十 小 咒

一、如意宝轮王陀罗尼

南无佛驮耶。南无达摩耶。南无僧迦耶。南无
观自在菩萨摩訶萨。具大悲心者。怛侄他。
唵。斫羯啰伐底。震多末尼。摩訶钵蹬谜。噜噜
噜噜。底瑟吒。篥啰阿羯利。沙夜吽。娑莎訶。
唵。钵跢摩。震多末尼。篥啰吽。唵。跋喇陀。
钵亶谜吽。

二、消灾吉祥神咒

曩谟三满哆。母驮喃。阿钵啰底。贺多舍。娑
曩喃。怛侄他。
唵。佉佉。佉吡。佉吡。吽吽。入嚩啰。入嚩啰。
钵啰入嚩啰。钵啰入嚩啰。底瑟姪。底瑟姪。
瑟致哩。瑟致哩。娑婆吒。娑婆吒。扇底迦。
室哩曳。娑嚩訶。

三、功德宝山神咒

南无佛驮耶。南无达摩耶。南无僧伽耶。
唵。悉帝护噜噜。悉都噜。只利波。吉利婆。
悉达哩。布噜哩。娑嚩訶。

四、准提神咒

稽首皈依苏悉帝 头面顶礼七俱胝
我今称赞大准提 唯愿慈悲垂加护
南无飒哆喃。三藐三菩陀。俱胝喃。怛侄他。
唵。折戾主戾。准提娑婆诃。

五、圣无量寿决定光明王陀罗尼

唵。捺摩巴葛瓦帝。阿巴啰密沓。阿优哩阿纳。
苏必你。实执沓。牒左啰宰也。怛塔唎达也。
阿啰诃帝。三药三不达也。怛你也塔。
唵。萨哩巴。桑斯葛哩。叭哩述沓。达啰马帝。
唎唎捺。桑马兀唎帝。莎巴瓦比述帝。马喝捺
也。叭哩瓦哩娑喝。

六、药师灌顶真言

南谟薄伽伐帝。鞞杀社。娑嚧。薜琉璃。钵唎
娑。喝啰闍也。怛他揭多也。阿啰喝帝。三藐
三勃陀耶。怛侄他。
唵。鞞杀逝。鞞杀逝。鞞杀社。三没揭帝。莎诃。

七、观音灵感真言

唵嘛呢叭弥吽。麻曷倪牙纳。积都特巴达。积
特些纳。微达哩葛。萨而鞞而塔。卜哩悉塔葛。
纳补啰纳。纳卜哩。丢忒班纳。捺麻嚧吉。说
啰耶莎诃。

八、七佛灭罪真言

离婆离婆帝。求诃求诃帝。陀罗尼帝。尼诃啰帝。
毗黎你帝。摩诃伽帝。真陵乾帝。莎婆诃。

九、往生净土神咒

南无阿弥多婆夜。哆他伽多夜。哆地夜他。阿
弥利都婆毗。阿弥唎哆。悉耽婆毗。阿弥唎多。
毗迦兰帝。阿弥唎哆。毗迦兰多。伽弥膩。伽
伽那。枳多迦利。娑婆诃。

十、大吉祥天女咒

南无佛陀。南无达摩。南无僧伽。南无室利。
摩诃提鼻耶。怛你也他。
波利富楼那。遮利三曼陀。达舍尼。摩诃毗诃罗
伽帝。三曼陀。毗尼伽帝。摩诃迦利野。波祢。
波啰。波祢。萨利嚩栗他。三曼陀。修钵犁帝。
富隶那。阿利那。达摩帝。摩诃毗鼓毕帝。摩诃
弥勒帝。娄簸僧祇帝。酰帝徒。僧祇酰帝。三曼
陀。阿他阿菟。婆罗尼。

虚空藏菩萨咒：南无虚空藏菩萨摩诃萨(三称)

阿祢，逌闍鞞。铃浮娑闍鞞。耶婆奈闍鞞。博厕，
娑迷。波吒逌闍鞞。他奈婆逌鞞。萨多逌伽逌泥。
休磨休磨。摩诃，伽楼尼迦。娑婆诃。

佛顶尊胜加句灵验陀罗尼启请

出自 敦煌遗书

稽首千叶莲华座。摩尼殿上尊胜王。
广长舌相遍三千。恒沙功德皆圆满。
灌顶闻持妙章句。九十九亿世尊宣。
憍尸迦为善住天。能灭七返傍生路。
稀有总持秘法藏。能发圆满广大心。
我今具足是凡夫。赞叹总持萨婆若。
愿我心眼常开悟。所有功德施群生。
十方刹土诸如来。他方此界诸菩萨。
八部龙天诸眷属。散脂大将药叉王。
冥司地主焰摩罗。善恶簿官二童子。
以上圣贤诸众等。愿闻启请悉降临。
拥护佛法使长存。各各勤行世尊教。
所有听徒来至此。或居地上或居空。
一闻佛顶尊胜言。蠢动含灵皆作佛。

佛顶尊胜陀罗尼

唐闍宾国沙门佛陀波利 译

nà mó bó qié bá dì tí lì lù jiā bō là dī pí shī sè zhà
那謨薄伽跋帝。啼隸路迦鉢囉底毗失瑟咤
yē bó tuó yē bó qié bá dī dá zhī tuō
耶勃陀耶。薄伽跋底。怛姪他。

ān pí shū tuó yē suō mó sān màn duō pō pō suō suō pò là
唵。毗輸陀耶娑摩三漫多皤娑娑。娑破囉
ná jiē dī qié hē nà suō pō pō shū shú dì ā bí shēn zhě sū jiē
拏揭底伽訶那。娑娑皤輸秫地阿鼻訖者蘇揭
duō fá zhé nuó ā mì lì duō pí shài jī
多伐折那。阿嚩唎多毗曬鷄。

ā hē là ā hē là ā yú sǎn tuó luō ní shū tuó yē
阿訶囉阿訶囉。阿瑜散陀羅尼。輸陀耶
shū tuó yē qié qié nuó pí shú tí wū sè ní shā pí shì yē shú
輸陀耶。伽伽那毗秫提。烏瑟尼沙毗逝耶秫
tí suō hē suō là hē là shī mǐ shān zhū dì dì sà pō dá tuō
提。娑訶娑囉喝囉濕弭珊珠地帝。薩婆怛他
jiē duō dì sè zhà nà è dì sè chí dì
揭多地瑟咤那額地瑟恥帝。

mù zhì lì bá zhé là jiā yē sēng hē duō nuó shú tí sà pō
慕唎隸。跋折囉迦耶僧訶多那秫提。薩婆
fá luō ná pí shú tí bō là dī nǐ fá dá yē ā yú shú tí
伐羅拏毗秫提。鉢囉底你伐怛耶阿瑜秫提。
sà mò nuó ā dì sè chí dì
薩末那阿地瑟恥帝。

mò nǐ mò nǐ dá tà duō bù duō jù zhī bō lì shú tí
末禰末禰。怛闍多部多俱胝鉢唎秫提。

pí sà pǔ zhā bó dì shú tí shè yē shè yē pí shè yē pí shè
毗薩普吒 勃地秫提。社耶社耶。毗社耶 毗社
yē sà mò là sà mò là bó tuó è dì sè chǐ duō shú tí
耶。薩末囉 薩末囉 勃陀 額地瑟恥多 秫提。

bá zhé lí bá zhé là jiē pí bá zhé lán pó fá dū me
跋折梨 跋折囉揭鞞。跋折濫 婆伐都。麼

me
麼。

sà pó sà duǒ xiē jiā yē pí shú tí sà pó jiē dǐ bō lì
薩婆薩埵 嚧迦耶毗秫提。薩婆揭底鉢唎
shú tí sà pó dá tuō jiē duō sān mó shī pó suǒ è dì sè chǐ dì
秫提。薩婆怛他揭多 三摩濕婆娑遏地瑟恥帝。

bó tuó bó tuó pú tuó yē pú tuó yē sān màn duō bō lì shú
勃陀勃陀 蒲駄耶蒲駄耶 三漫多鉢唎秫
tí sà pó dá tuō jiē duō dì sè zhàn uó è dì sè chǐ dì suǒ
提。薩婆怛他揭多 地瑟訶那 額地瑟恥帝。娑
pó hē
婆訶。



佛顶尊胜陀罗尼

梵音加字具足版

拿摩 拔嚧乏得。得籁罗割牙 钵喇底 维希
世打牙 菩达牙。拔嚧乏得 打笛牙他。

嗡。维旭达牙 维旭达牙。洒嘛洒嘛。三蛮
打 乏拔洒。司怕喇拿 嚧底 嚧哈拿。司乏拔乏
维须迭 啊毗胜佳 靺曼 苏嚧打 乏喇 乏佳拿。
啊弥里打 毗晒盖。

嘛哈蛮得喇 叭台。啊哈喇 啊哈喇。啊瑜 三
达喇尼。旭达牙 旭达牙。嚧嚧拿 维须迭。乌失
尼啥 维戛牙 维须迭。洒哈司喇 喇吸弥 三举题
得。

洒尔乏 打他嚧打 乏罗嘎你 啥得叭喇蜜打
叭里 布喇尼。

洒尔乏 打他嚧打 赫里达牙。提世打拿 提
世帝得。嘛哈 母德咧。乏及喇 嘎牙 三哈打拿
维须迭。

洒尔乏 乏喇拿 拔牙 徒尔嚧底 叭里 维须
迭 钵喇底你 乏尔打牙 啊瑜须迭。三嘛牙 提世

帝得。嘛尼嘛尼。嘛哈嘛尼 打他打 蒲打戈帝。
叭里须迭。维司普打 菩提须迭 戛牙戛牙。维戛
牙 维戛牙。司嘛喇 司嘛喇

洒尔乏 菩达 提世帝打 须迭。乏及里 乏及
喇 噶尔别。乏及览 拔乏覩。嘛嘛 夏里览

洒尔乏 洒得乏难 佳嘎牙。叭里 维须迭。

洒尔乏 嘎底 叭里须迭。

洒尔乏 打他噶打 吸佳美。三嘛吸乏洒 牙
姆多。

洒尔乏 打他噶打 三嘛吸乏洒 提世帝得。
菩提牙 菩提牙。维菩提牙 维菩提牙。箔达牙 箔
达牙。维箔达牙 维箔达牙。三蛮打 叭里须迭。

洒尔乏 打他噶打 赫里达牙。提世打拿 提
世帝得。嘛哈 母德咧 司乏哈。



一切如来心秘密全身舍利 宝篋印陀罗尼

唐三藏沙门大广智不空 译

nà mò xī dá lǐ yě dì wěi jiā nán sà pó dá tuó bì duō
娜莫悉怛哩也 地尾迦南。萨婆怛佉多
nán ān bù wěi pó wā nà wā lí wā zhě lí wā zhě zhāi
南。唵。部尾婆嚩娜嚩唎。嚩者唎。嚩者𩇛。
zǔ lǔ zǔ lǔ tuó là
祖鲁祖鲁驮囉。

sà wā dá tuó bì duō tuó dū tuó lí bō nà mǎn pó wā dī
萨嚩怛佉多。驮都驮唎 钵娜𩇛婆𩇛底。
rě yě wā lí mǔ zǔ lí sà me là dá tuó bì duō dá mó zhuó
惹也嚩梨。畝祖犁 萨麼囉。怛佉多 達摩斫
qì là bō là mò lì duō nà wā rì là mào dì mǎn ná lèng jiā
訖囉。鉢囉𩇛唎哆娜 嚩日囉冒地滿拏。楞迦
là lèng qì lí dì
囉。楞訖唎諦。

sà wā dá tuó bì duō dì sè chí dì mào duò yě mào duò
萨嚩怛佉多 地瑟耻諦。冒驮野 冒驮
yě mào dì mào dì méi diè méi diè sān mào tuó nǐ sān mào tuó
野。冒地冒地。沒𩇛沒𩇛。叁冒驮你 叁冒驮
yě zhě lǔ zhě lǔ zhě lǎn dū
野。者𩇛者𩇛。者𩇛𩇛。

sà wā wā là ná nǐ sà mó bò bō wěi bì dì hù lū hù
萨嚩嚩囉拏你。萨摩播波尾𩇛諦。户嚩户
lū sà wā shù jiā mǐ bì dì sà wā dá tuó bì duō hé lí nà
嚩。萨嚩戍迦弭𩇛帝。萨嚩怛佉多。訖哩那

yě wā rì lǐ nǐ sān pó là sān pó là
野 嚩日哩拏。叁婆囉 叁婆囉。

sà wā dá tuó bì duō yǔ xì yě tuó là nǐ mǔ niè lí méi
薩嚩怛佉藥多 廌呬野馱囉 拏畝涅梨。沒
悌蘇沒悌。薩嚩怛佉藥多 地瑟恥多。馱覩藥陞
suō wā hē sān mó yē dì sè chǐ dì suō wā hē
娑嚩訶。叁摩耶 地瑟恥帝 娑嚩訶。

sà wā dá tuó bì duō hé lǐ nà yě tuó dū mǔ nà lí suō
薩嚩怛佉藥多 訖哩那野 馱都畝捺嚩 娑
wā hē sū bō là dǐ sè chǐ duō bì dū bì dá tuó bì duō dì
嚩訶。蘇鉢囉 底瑟恥多 藥覩閉 怛佉藥多 地
sè chǐ dì hù lū hù lū hōnghōngsuō wā hē
瑟恥帝 戶嚕戶嚕 吽吽娑嚩訶。

ān sà wā dá tuó bì duō wǔ sè nǐ shā tuó dū mǔ nà là
唵 薩嚩怛佉藥多。塢瑟拏沙 馱都畝捺囉
ní sà wā dá tuó bì dān suō tuó dū wěi bù shǐ duō dì sè chǐ dì
尼 薩嚩怛佉藥單 娑馱都尾部使多 地瑟恥帝。
hōnghōngsuō wā hē
吽吽娑嚩訶。

一切如来心秘密全身舍利 宝篋印陀罗尼

梵音版

拿莫 悉地哩呀 地尾嚧南

① 萨瓦 达他嚧达南 奥母 部尾吧 瓦达瓦利
瓦者利 瓦者泰 苏鲁苏鲁 达拉达拉

② 萨瓦 达他嚧达 达睹达利 巴得吗 巴瓦地
者呀瓦利 母得利 思吗拉
达他嚧达 达吗扎卡拉 波拉瓦达那 巴者利
包地班那 楞卡拉 楞给哩地

③ 萨瓦 达他嚧达 地思提地 包达呀 包达呀
包地 包地 布达呀 布达呀 三布达你 三布
达呀 者拉 者拉 者懒都


④ 萨瓦 瓦拉那你

⑤ 萨瓦 巴巴尾嚧地 户鲁户鲁

⑥ 萨瓦 苏卡尾嚧地

⑦ 萨瓦 达他嚧达 和利达呀 巴者拉你 三巴拉
三巴拉

- ⑧ 萨瓦 达他嚩达 苏哈呀 达拉你 母得利 布地
苏布地
- ⑨ 萨瓦 达他嚩达 地思提达 达睹嚩比 斯瓦哈
三吗呀 地思提地 斯瓦哈
- ⑩ 萨瓦 达他嚩达 和利达呀 达睹母得利 斯瓦哈
苏布拉 地思提达 思度比 达他嚩达 地思提地
户鲁户鲁 轰轰 斯瓦哈
- ⑪ 奥母 萨瓦 达他嚩达 乌思你沙 达睹 母得
拉你
- ⑫ 萨瓦 达他嚩单 萨达 睹尾部西达 地思提地
轰轰 斯瓦哈



普 庵 咒

出自《禅门日诵》

南无佛驮耶。南无达摩耶。南无僧伽耶。

南无本师释迦牟尼佛。

南无大悲观世音菩萨。

南无普庵祖师菩萨。

南无百万火首金刚王菩萨。

唵。迦迦迦研界。遮遮遮神惹。吒吒吒怛那。
多多多檀那。波波波梵摩。

摩梵波波波。那檀多多多。那怛吒吒吒。
惹神遮遮遮。界研迦迦迦。迦迦迦研界。

迦迦鸡鸡俱俱鸡。俱鸡俱。兼乔鸡。乔鸡兼。
界研迦迦迦。迦迦迦研界。

遮遮支支朱朱支。朱支朱。占昭支。昭支占。
惹神遮遮遮。遮遮遮神惹。

吒吒知知都都知。都知都。担多知。多知担。
那怛吒吒吒。吒吒吒怛那。

多多谛谛多多谛。多谛多。谈多谛。多谛谈。
那檀多多多。多多多檀那。

波波悲悲波波悲。波悲波。梵波悲。波悲梵。
摩梵波波波。波波波梵摩。

摩梵波波波。那檀多多多。那怛吒吒吒。
惹神遮遮遮。界研迦迦迦。迦迦迦研界。

迦迦鸡鸡俱俱鸡乔兼。兼兼兼兼兼。验尧倪。
尧倪验。界研迦迦迦。迦迦迦研界。

遮遮支支朱朱支昭占。占占占占占。验尧倪。
尧倪验。惹神遮遮遮。遮遮遮神惹。

吒吒知知都都知多担。担担担担担。喃那呢。
那呢喃。那怛吒吒吒。吒吒吒怛那。

多多谛谛多多谛多谈。谈谈谈谈谈。喃那呢。
那呢喃。那檀多多多。多多多檀那。

波波悲悲波波悲波梵。梵梵梵梵梵。梵摩迷。
摩迷梵。摩梵波波波。波波波梵摩。

摩梵波波波。那檀多多多。那怛吒吒吒。
惹神遮遮遮。界研迦迦迦。迦迦迦研界。

迦迦鸡鸡俱俱耶。喻喻 喻喻 喻喻 喻喻喻。
界研迦迦迦。迦迦迦研界。

遮遮支支朱朱耶。喻喻 喻喻 喻喻 喻喻喻。
惹神遮遮遮。遮遮遮神惹。

吒吒知知都都耶。奴奴 奴奴 奴奴 奴奴奴。
那怛吒吒吒。吒吒吒怛那。

多多谛谛多多耶。奴奴 奴奴 奴奴 奴奴奴。
那檀多多多。多多多檀那。

波波悲悲波波耶。母母 母母 母母 母母母。
摩梵波波波。波波波梵摩。

摩梵波波波。那檀多多多。那怛吒吒吒。
惹神遮遮遮。界研迦迦迦。迦迦迦研界。

唵。波多吒。遮迦耶。夜兰诃。阿瑟吒。
萨海吒。漏嚧漏嚧吒。遮迦耶。娑诃。

无数天龙八部。百万火首金刚。昨日方隅。
今日佛地。普庵到此。百无禁忌。

南无普庵祖师菩萨摩诃萨（三称）

摩诃般若波罗蜜（三称）

ॐ 嘛 呢 叭 彌 吽

唵 嘛 呢 叭 彌 吽

OM MANI PADME HUM

华 严 字 母

《大方广佛华严经入法界品四十二字观》

法界佛教总会《华严字母》曲谱

南无华严教主卢舍那佛（三称）

华严字母赞

华严字母 众艺亲宣 善财童子得真传
秘密义幽玄 功德无边 唱诵利人天

起梵腔

遮那妙体。遍法界以为身。华藏庄严等太虚
而为量。维此法会。不异寂场。极依正以常融。
在圣凡而靡间。初成正觉。现神变于菩提场中。
再转法轮。震圆音于普光明殿。偏七处而恒演。
历九会以同宣。敷万行之因华严一乘之道果。谨
遵教典。大启法筵。

仰祝：民途巩固。国道遐昌。佛日增辉。法
轮常转。十方施主。增益福田。法界众生。同圆
种智。

引

1、唱阿字时。入「由菩萨威德入无差别境界」般若波罗蜜门。悟一切法本不生故。

a ang eng ong wu ao ai yi yin an yin an
阿 俠 鞞 翁 烏 爇 哀 醫 因 安 音 諳

ou a
謳 阿

唱阿字时 普愿法界众生 入般若波罗蜜门

𠂇

2、唱囉（多）字时。入「无边际差别」般若波罗蜜门。悟一切法离尘垢故。

da dang deng dong du dao dai di din dan
多 當 登 東 都 刀 𡵓 低 顛 單

din dan dou da
顛 耽 兜 多

唱多字时 普愿法界众生 入般若波罗蜜门

𠂇

3、唱跋（波）字时。入「法界际」般若波罗蜜门。悟一切法胜义谛不可得故。

ba bang beng bong bu bao bai bi bin ban
波 幫 崩 閉 逋 褒 頊 卑 賓 般

bin ban bou ba
斌 般 褒 波

唱波字时 普愿法界众生 入般若波罗蜜门

𑖀

4、唱左（者）字时。入「普轮断差别」般若波罗蜜门。悟一切法无诸行故。

za zang zeng zong zu zao zai ji jin zan
左 臧 增 宗 租 遭 災 賁 津 籤

jin zan zou za
浸 簪 陬 左

唱左字时 普愿法界众生 入般若波罗蜜门

𑖁

5、唱囊（那）字时。入「无阿赖耶际」般若波罗蜜门。悟一切法性相不可得故。

na nang neng nong nu nao nai ni nin nan
那 囊 能 濃 奴 猯 病 泥 年 難

nin nan nou na
訖 南 寗 那

唱那字时 普愿法界众生 入般若波罗蜜门

𑖂

6、唱改（邏）字时。入「无垢」般若波罗蜜门。悟一切法出世间故。爱支因缘永不现故。

la lang leng long lu lao lai li lin lan lin
邏 郎 楞 籠 盧 勞 來 黎 隣 闌 林

lan lou la
藍 婁 邏

唱邏字时 普愿法界众生 入般若波罗蜜门

ㄙ

7、唱娜（施）字时。入「不退转加行」般若波罗蜜门。
悟一切法调伏寂静真如平等无分别故。

ta tang teng tong tu tao tai ti tin tan tin
施 唐 騰 同 徒 陶 臺 啼 田 檀 田
tan tou ta
覃 頭 施

唱施字时 普愿法界众生 入般若波罗蜜门

ㄆ

8、唱摩（婆）字时。入「金刚场」般若波罗蜜门。
悟一切法离缚解故。

pa pang peng pong pu pao pai pi pin pan
婆 傍 朋 蓬 蒲 袍 牌 毗 頻 槃
pin pan pou pa
穷 薨 衰 婆

唱婆字时 普愿法界众生 入般若波罗蜜门

ㄊ

9、唱拏（茶）字时。入「普遍轮」般若波罗蜜门。悟
一切法离热烧得清凉故。

cha chang cheng chong chu chao chai qi qin chan
茶 長 澄 重 除 桃 媼 池 陳 獮
qin chan chou cha
沉 減 儔 茶

喝茶字时 普愿法界众生 入般若波罗蜜门

ㄉ

10、唱沙（灑）字时。入「海藏」般若波罗蜜门。悟一切法无挂碍故。

sha shang sheng shong shu shao shai xi xin shan
沙 霜 生 春 疏 稍 颯 詩 申 山

xin shan shou sha
深 衫 搜 沙

唱沙字时 普愿法界众生 入般若波罗蜜门

ㄊ

11、唱嚩字时。入「普遍生安住」般若波罗蜜门。悟一切法言语道断故。

wa wang weng wong wu wao wai wi win wan win
嚩 忘 馮 無 聲 惛 微 文 梏 芟

wan wou wa
嚩 嚩

唱嚩字时 普愿法界众生 入般若波罗蜜门

ㄋ

12、唱多（哆）字时。入「照曜尘垢」般若波罗蜜门。悟一切法真如不动故。

da dang deng dong du dao dai di din dan
哆 鐺 燈 冬 都 啁 慆 堤 顛 殫

din dan dou da
顛 擔 佻 哆

唱哆字时 普愿法界众生 入般若波罗蜜门

ㄢ

13、唱野（也）字时。入「差别积聚」般若波罗蜜门。悟一切法如实不生故。

ya yang yeng yong yu yáo yai yi yin yan
也 陽 蠅 容 余 遙 哇 移 寅 延

yin yan you ya
淫 鹽 由 也

唱也字时 普愿法界众生 入般若波罗蜜门

ㄣ

14、唱瑟吒字时。入「普遍光明息除热恼」般若波罗蜜门。悟一切法制伏任持相不可得故。

shizha shizhang shizheng shuzhong shuzhu shizhao
瑟吒 尸張 尸徵 書中 書朱 尸朝

shizhai shi ji shijin shizhan shijin shizhan
師裡 尸知 尸珍 師檀 尸砧 師詒

shizhou shizha
師輶 瑟吒

唱瑟吒字时 普愿法界众生 入般若波罗蜜门

ㄤ

15、唱迦字时。入「差别种类」般若波罗蜜门。悟一切法作者不可得故。

ga gang geng gong gu gao gai gi gin gan
迦 岡 揔 公 孤 高 該 雞 斤 干

gin gan gou ga
金 甘 鈎 迦

唱迦字时 普愿法界众生 入般若波罗蜜门

𑖀

16、唱娑字时。入「现前降雹大雨」般若波罗蜜门。
悟一切法时平等性不可得故。

sa sang seng song su sao sai xi xin san xin san
娑 桑 僧 捻 甦 騷 腮 西 新 珊 心 三

sou sa
洩 娑

唱娑字时 普愿法界众生 入般若波罗蜜门

𑖁

17、唱莽（麼）字时。入「大迅疾众峯」般若波罗蜜门。
悟一切法我所执性不可得故。

ma mang meng mong mu mao mai mi min man
麼 茫 瞢 蒙 模 毛 埋 彌 民 瞞

min man mou ma
旻 姍 姆 麼

唱麼字时 普愿法界众生 入般若波罗蜜门

𑖂

18、唱伽（誡）字时。入「普遍轮长养」般若波罗蜜门。
悟一切法行取性不可得故。

qia qiang qieng qiong qu qiao qiai qi qin
伽 强 殄 窮 渠 喬 揩 奇 勤

qian qin qian qiu qia
虔 琴 鉗 求 伽

唱伽字时 普愿法界众生 入般若波罗蜜门



19、唱佗（他）字时。入「真如无差别」般若波罗蜜门。悟一切法处所不可得故。

ta tang teng tong tu tao tai ti tin tan
 他 湯 鑿 通 琰 叨 胎 梯 天 灘
 tin tan tou ta
 澹 貪 偷 他

唱他字时 普愿法界众生 入般若波罗蜜门



20、唱惹（社）字时。入「世间流转穷源清净」般若波罗蜜门。悟一切法能所生起不可得故。

cha chang cheng chong chu chao chai qi qin chan
 社 常 成 慵 蜎 韶 恣 时 辰 禪
 qin chan chou cha
 諫 蟾 酬 社

唱社字时 普愿法界众生 入般若波罗蜜门



21、唱娑嚩（鎖）字时。入「念一切佛庄严」般若波罗蜜门。悟一切法安隱性不可得故。

sa sang seng song su sao sai xi xin san
 鎖 顙 僧 敞 蘇 掃 認 洗 凶 傘
 xin san sou sa
 罽 糗 窈 鑠

唱鑠字时 普愿法界众生 入般若波罗蜜门

ㄑ

22、唱馱（施）字时。入「观察法界道场」般若波罗蜜门。悟一切法能持界性不可得故。

ta tang teng tong tu tao tai ti tin tan tin
施 堂 膝 筒 途 桃 擡 提 田 壇 田
tan tou ta
談 投 施

唱施字时 普愿法界众生 入般若波罗蜜门

ㄒ

23、唱捨（奢）字时。入「随顺一切佛教」般若波罗蜜门。悟一切法寂静性不可得故。

sha shang sheng shong shu shao shai xi xin shān
奢 傷 升 春 書 燒 篩 尸 伸 羶
xīn shān shōu shā
琛 苫 收 奢

唱奢字时 普愿法界众生 入般若波罗蜜门

ㄙ

24、唱佉字时。入「现行因地智慧藏」般若波罗蜜门。悟一切法如虚空性不可得故。

ka kang keng kong ku kao kai ki kin kân
佉 康 硿 空 枯 尻 開 欺 𦵏 看
kīn kân kou ka
欽 龕 彊 佉

唱佉字时 普愿法界众生 入般若波罗蜜门

𪛗

25、唱訖灑(叉)字时。入「决择息诸业海藏」般若波罗蜜门。悟一切法穷尽性不可得故。

cha chang cheng chong chu chao chai qi qin chan
叉 創 琿 衝 初 抄 釵 鷗 嗔 憚

qin chan chou cha
諶 攙 搗 叉

唱叉字时 普愿法界众生 入般若波罗蜜门

𪛘

26、唱娑多字时。入「摧诸烦恼清净光明」般若波罗蜜门。悟一切法住持处非处令不动转性不可得故。

sa da si dang si deng su dong su du si dao
娑 多 思 當 思 登 蘇 東 蘇 都 思 刀

si dai xi di xi din si dan xi din si
思 驪 西 低 西 顛 思 單 西 顛 思

dan si dou sa da
耽 思 兜 娑 多

唱娑多字时 普愿法界众生 入般若波罗蜜门

𪛙

27、唱孃(壤)字时。入「生世间了别」般若波罗蜜门。悟一切法能所知性不可得故。

ra rang reng rong ru rao rai ri rin ran rin
壤 穰 仍 茸 如 饒 徠 而 仁 然 任

ran rou ra
髥 柔 壤

唱壤字时 普愿法界众生 入般若波罗蜜门

ㄟ

28、唱囉佗（曷囉多）字时。入「逆生死轮智道场」般若波罗蜜门。悟一切法执著义性不可得故。

ha la da hanglangdang henglengdeng honglongdong

曷囉多 杭郎當 恒楞登 洪籠東

hu lu du haolaodao hailai dai hi li di hinlindin

胡盧都 毫勞刀 孩來豔 奚黎低 賢隣顛

hanlandan hinlindin hanlandan houloudou ha la da

寒闌單 言林顛 含藍耽 候婁兜 曷囉多

唱曷囉多字时 普愿法界众生 入般若波罗蜜门

ㄋ

29、唱婆字时。入「一切宫殿道场庄严」般若波罗蜜门。悟一切法可破坏性不可得故。

pa pang peng pong pu pao pai pi pin pan

婆 旁 棚 擎 葡 炮 排 皮 貧 样

pin pan pou pa

妍 薏 髻 婆

唱婆字时 普愿法界众生 入般若波罗蜜门

ㄗ

30、唱蹉（車）字时。入「修行加行藏盖差别道场」般若波罗蜜门。悟一切法欲乐覆性不可得故。

cha chang cheng chong chu chao chai qi qin chan

車 昌 稱 衝 樞 怛 差 蚩 瞋 闡

qin chan chou cha

覲 轄 犇 車

唱車字时 普愿法界众生 入般若波罗蜜门

𑖀

31、唱娑麼字时。入「现见十方诸佛旋」般若波罗蜜门。悟一切法可忆念性不可得故。

sa ma si mang si meng sumong sumu si mao si
娑麼 斯 茫 斯 萌 蘇 蒙 蘇 模 思 毛 思

mai xi mi xi min si man xi min si man si mou sama
埋 西 迷 西 民 思 蠻 西 斫 思 葵 思 謀 娑麼

唱娑麼字时 普愿法界众生 入般若波罗蜜门

𑖁

32、唱訶嚩(訶婆)字时。入「观察一切众生堪任力遍生海藏」般若波罗蜜门。悟一切法可呼召性不可得故。

ha pa hangpang hengpeng hongpong hupu hao
訶婆 欣 旁 亨 朋 烘 蓬 呼 蒲 蒿

pao haipai hi pi hinpin hanpan hinpin
袍 哈排 希毗 希貧 預拌 希賓

hanpan houpou ha pa
哈 薙 叻 衰 訶婆

唱訶婆字时 普愿法界众生 入般若波罗蜜门

𑖂

33、唱哆娑(娑)字时。入「一切功德海趣入修行源底」般若波罗蜜门。悟一切法勇健性不可得故。

sa sang seng song su sao sai xi xin san
娑 喪 僧 鬆 蘇 綵 顚 西 辛 珊

xin san sou sa
芯 糝 鍤 娑

唱娑字时 普愿法界众生 入般若波罗蜜门

ㄗ

34、唱伽字时。入「持一切法云坚固海藏」般若波罗蜜门。
悟一切法厚平等性不可得故。

qia qiang qieng qiong qu qiao qiai qi qin
伽 强 擎 蛩 劬 翹 敬 其 芹

qian qin qian qiu qia
乾 禽 鉞 裘 伽

唱伽字时 普愿法界众生 入般若波罗蜜门

ㄛ

35、唱姥（吒）字时。入「愿往诣十方现前见一切佛」般若波罗蜜门。悟一切法积集性不可得故。

zha zhang zheng zhong zhu zhao zhai ji jin zhan
吒 張 徵 中 豬 朝 裡 知 珍 攴

jin zhan zhou zha
砧 沾 輶 吒

唱吒字时 普愿法界众生 入般若波罗蜜门

ㄣ

36、唱寧（拏）字时。入「字轮积集俱胝字」般若波罗蜜门。
悟一切法离诸諠净无往无来行住坐卧不可得故。

na nang neng nong nu nao nai ni nin nan
拏 孃 蠡 醲 柶 嬈 撝 尼 紐 然

nin nan nou na
訕 謫 孺 拏

唱拏字时 普愿法界众生 入般若波罗蜜门

ㄅ

37、唱頗（娑頗）字时。入「成熟一切众生际往诣道场」般若波罗蜜门。悟一切法遍满果报不可得故。

sa pa si pang si peng su pong su pu si pao
娑頗 思滂 思漙 蘇徠 蘇蒲 思胞

si pai xi pi xi pin si pan xi pin si pan si pou sa pa
思巖 西披 西砵 思潘 西砵 思芝 思掇 娑頗

唱娑頗字时 普愿法界众生 入般若波罗蜜门

ㄆ

38、唱塞迦（娑迦）字时。入「无著无碍解辩地藏光明轮普照」般若波罗蜜门。悟一切法积聚蕴性不可得故。

sa ga si gang si geng sugong sugu si gao si
娑迦 思岡 思掬 蘇公 蘇孤 思高 思

gai xi gi xi gin si gan xi gin si gan si gou sa ga
該 西鷄 西斤 思干 西今 思甘 思勾 娑迦

唱娑迦字时 普愿法界众生 入般若波罗蜜门

ㄇ

39、唱也娑字时。入「宣说一切佛法境界」般若波罗蜜门。悟一切法衰老性相不可得故。

ya sa yi sang yi seng yi song yi su yi sao
也娑 亦桑 亦僧 亦蚣 亦甦 亦臊

yi sai yi xi yi xin yi san yi xin yi san yi sou ya sa
亦腮 亦西 亦辛 亦珊 亦心 亦三 亦鞞 也娑

唱也娑字时 普愿法界众生 入般若波罗蜜门



40、唱室左字时。入「一切虚空以法云雷震吼普照」般若波罗蜜门。悟一切法聚集足迹不可得故。

shì za shì zang shì zeng shù zong shù zu shì zao
室左 室藏 室增 束宗 束租 室遭

shì zai shì jì shì jīn shì zān shì jīn shì zān shì zōu shì za
室灾 室贵 室津 瑟簍 室浸 瑟簍 室陬 室左
唱室左字时 普愿法界众生 入般若波罗蜜门



41、唱吒（佉）字时。入「无我利益众生究竟边际」般若波罗蜜门。悟一切法相驱迫性不可得故。

cha chang cheng chong chu chao chāi qī qín chán
佉 莠 橙 踵 攄 超 攄 絺 獬 脰
qín chán chōu cha
琛 覘 抽 佉

唱佉字时 普愿法界众生 入般若波罗蜜门



42、唱茶（陀）字时。入「法轮无差别藏」般若波罗蜜门。悟一切法究竟处所不可得故。

ta tang teng tong tu tao tai tī tīn tán tīn
陀 唐 滕 彤 圖 韜 駘 駘 田 驛 田
tán tōu ta
曇 骰 陀

唱陀字时 普愿法界众生 入般若波罗蜜门

总回向

四十二字妙陀罗 字字包含义理多

梵韵满娑婆 功德大 法界沐恩波

四生九有 同登华藏玄门

八难三涂 共入毗卢性海

南无华严海会佛菩萨(三称)



礼佛大忏悔文

出自《禅门日诵》

戒定真香，焚起冲天上。弟子虔诚，爇在金炉上。顷刻氤氲，即遍满十方。众生祈求，免难消灾障。南无香云盖菩萨摩訶萨（三称）

大慈大悲愍众生，大喜大舍济含识。

相好光明以自严，众等至心归命礼。

我今发心：不为自求人天福报、声闻、缘觉，乃至权乘诸位菩萨；唯依最上乘，发菩提心，愿与法界众生，一时同得阿耨多罗三藐三菩提。

南无皈依十方。尽虚空界。一切诸佛。

南无皈依十方。尽虚空界。一切尊法。

南无皈依十方。尽虚空界。一切贤圣僧。

南无如来、应供、正徧知、明行足、善逝、世间解无上士、调御丈夫、天人师、佛、世尊。

【五十三佛】

南无普光佛。南无普明佛。南无普净佛。
南无多摩罗跋旃檀香佛。南无旃檀光佛。

南无摩尼幢佛。南无欢喜藏摩尼宝积佛。
南无一切世间乐见上大精进佛。南无摩尼幢灯
光佛。南无慧炬照佛。

南无海德光明佛。南无金刚牢强普散金光
佛。南无大强精进勇猛佛。南无大悲光佛。南
无慈力王佛。

南无慈藏佛。南无旃檀窟庄严胜佛。南无
贤善首佛。南无善意佛。南无广庄严王佛。

南无金华光佛。南无宝盖照空自在力王
佛。南无虚空宝华光佛。南无琉璃庄严王佛。
南无普现色身光佛。

南无不动智光佛。南无降伏众魔王佛。南
无才光明佛。南无智慧胜佛。南无弥勒仙光佛。

南无善寂月音妙尊智王佛。南无世净光
佛。南无龙种上尊王佛。南无日月光佛。南无
日月珠光佛。

南无慧幢胜王佛。南无狮子吼自在力王
佛。南无妙音胜佛。南无常光幢佛。南无观世
灯佛。

南无慧威灯王佛。南无法胜王佛。南无须
弥光佛。南无须曼那华光佛。南无优昙钵罗华
殊胜王佛。

南无大慧力王佛。南无阿閼毗欢喜光佛。
南无无量音声王佛。南无才光佛。南无金海光佛。

南无山海慧自在通王佛。南无大通光佛。
南无一切法常满王佛。

【三十五佛、阿弥陀佛】

南无释迦牟尼佛。南无金刚不坏佛。南无
宝光佛。南无龙尊王佛。南无精进军佛。

南无精进喜佛。南无宝火佛。南无宝月光
佛。南无现无愚佛。南无宝月佛。

南无无垢佛。南无离垢佛。南无勇施佛。
南无清净佛。南无清净施佛。

南无娑留那佛。南无水天佛。南无坚德佛。
南无旃檀功德佛。南无无量掬光佛。

南无光德佛。南无无忧德佛。南无那罗延
佛。南无功德华佛。南无莲华光游戏神通佛。

南无财功德佛。南无德念佛。南无善名称
功德佛。南无红焰帝幢王佛。南无善游步功德佛。

南无斗战胜佛。南无善游步佛。南无周匝
庄严功德佛。南无宝华游步佛。南无宝莲华善
住娑罗树王佛。

南无法界藏身阿弥陀佛。

【忏悔回向】

如是等，一切世界，诸佛世尊，常住在世，是诸世尊，当慈念我，若我此生，若我前生，从无始生死以来，所作众罪，若自作，若教他作，见作随喜。若塔若僧，若四方僧物，若自取，若教他取，见取随喜。五无间罪，若自作，若教他作，见作随喜。十不善道，若自作，若教他作，见作随喜。所作罪障，或有覆藏，或不覆藏，应堕地狱，饿鬼畜生，诸余恶趣，边地下贱，及蔑戾车。如是等处，所作罪障，今皆忏悔。

今诸佛世尊，当证知我，当忆念我。我复于诸佛世尊前，作如是言。若我此生，若我余生，曾行布施，或守净戒，乃至施与畜生，一抔之食，或修净行。所有善根，成就众生。所有善根，修行菩提。所有善根，及无上智。所有善根，一切合集，校计筹量，皆悉回向，阿耨多罗三藐三菩提。如过去未来，现在诸佛，所作回向，我亦如是回向。众罪皆忏悔，诸福尽随喜，及请佛功德，愿成无上智。去来现在佛，于众生最胜，无量功德海，我今皈命礼。

【颂礼敬诸佛】

所有十方世界中	三世一切人师子
我以清净身语意	一切遍礼尽无餘
普贤行愿威神力	普现一切如来前
一身复现刹生身	一一遍礼刹生佛

【颂称赞如来】

于一尘中尘数佛	各处菩萨众会中
无尽法界尘亦然	深信诸佛皆充满
各以一切音声海	普出无尽妙言辞
尽于未来一切劫	赞佛甚深功德海

【颂广修供养】

以诸最胜妙华曼	伎乐涂香及伞盖
如是最胜庄严具	我以供养诸如来
最胜衣服最胜香	末香烧香与灯烛
一一皆如妙高聚	我悉供养诸如来
我以广大胜解心	深信一切三世佛
悉以普贤行愿力	普遍供养诸如来

【颂忏悔业障】

我昔所造诸恶业	皆由无始贪嗔痴
从身语意之所生	一切我今皆忏悔

【颂随喜功德】

十方一切诸众生	二乘有学及无学
一切如来与菩萨	所有功德皆随喜

【颂请转法轮】

十方所有世间灯	最初成就菩提者
我今一切皆劝请	转于无上妙法轮

【颂请佛住世】

诸佛若欲示涅槃	我悉至诚而劝请
惟愿久住刹尘劫	利乐一切诸众生

【颂普皆回向】

所有礼赞供养福	请佛住世转法轮
随喜忏悔诸善根	回向众生及佛道

【结归】

愿将以此胜功德	回向无上真法界
性相佛法及僧伽	二谛融通三昧印
如是无量功德海	我今皆悉尽回向
所有众生身口意	见惑弹谤我法等
如是一切诸业障	悉皆消灭尽无餘
念念智周于法界	广度众生皆不退
乃至虚空世界尽	众生及业烦恼尽
如是四法广无边	愿今回向亦如是
南无大行普贤菩萨	(三称)

永嘉大师证道歌

唐慎水沙门玄觉 撰



1 君不见

绝学无为闲道人	不除妄想不求真
无明实性即佛性	幻化空身即法身
法身觉了无一物	本源自性天真佛
五阴浮云空去来	三毒水泡虚出没
证实相 无人法	刹那灭却阿鼻业
若将妄语诳众生	自招拔舌尘沙劫
顿觉了 如来禅	六度万行体中圆
梦里明明有六趣	觉后空空无大千
无罪福 无损益	寂灭性中莫问觅
比来尘镜未曾磨	今日分明须剖析

音注：阿鼻业(yǎ)

2 谁无念 谁无生 若实无生无不生
 唤取机关木人问 求佛施功早晚成
 放四大 莫把捉 寂灭性中随饮啄
 诸行无常一切空 即是如来大圆觉
 决定说 表真僧 有人不肯任情征
 直截根源佛所印 摘叶寻枝我不能
 摩尼珠 人不识 如来藏里亲收得
 六般神用空不空 一颗圆光色非色
 净五眼 得五力 唯证乃知难可测
 镜里看形见不难 水中捉月争拈得
 常独行 常独步 达者同游涅槃路
 调古神清风自高 貌悴骨刚人不顾

3 穷释子 口称贫 实是身贫道不贫
 贫则身常披缕褐 道则心藏无价珍
 无价珍 用无尽 利物应机终不吝
 三身四智体中圆 八解六通心地印
 上士一决一切了 中下多闻多不信
 但自怀中解垢衣 谁能向外夸精进
 从他谤 任他非 把火烧天徒自疲
 我闻恰似饮甘露 销融顿入不思议
 观恶言 是功德 此则成吾善知识
 不因讪谤起冤亲 何表无生慈忍力

- 4 宗亦通 说亦通 定慧圆明不滞空
 非但我今独达了 恒沙诸佛体皆同
 师子吼 无畏说 百兽闻之皆脑裂
 香象奔波失却威 天龙寂听生欣悦
 游江海 涉山川 寻师访道为参禅
 自从认得曹溪路 了知生死不相关
 行亦禅 坐亦禅 语默动静体安然
 纵遇锋刀常坦坦 假饶毒药也闲闲
 我师得见然灯佛 多劫曾为忍辱仙
 几回生 几回死 生死悠悠无定止
 自从顿悟了无生 于诸荣辱何忧喜
- 5 入深山 住兰若 岑峯幽邃长松下
 优游静坐野僧家 阒寂安居实潇洒
 觉即了 不施功 一切有为法不同
 住相布施生天福 犹如仰箭射虚空
 势力尽 箭还坠 招得来生不如意
 争似无为实相门 一超直入如来地
 但得本 莫愁末 如净琉璃含宝月
 既能解此如意珠 自利利他终不竭
- 6 江月照 松风吹 永夜清宵何所为
 佛性戒珠心地印 雾露云霞体上衣

降龙鉢	解虎锡	两钴金环鸣历历
不是标形虚事持		如来宝杖亲踪迹
不求真	不断妄	了知二法空无相
无相无空无不空		即是如来真实相
心镜明	鉴无碍	廓然莹彻周沙界
万象森罗影现中		一颗圆光非内外

7 豁达空 拔因果 莽莽荡荡招殃祸
 弃有着空病亦然 还如避溺而投火
 舍妄心 取真理 取舍之心成巧伪
 学人不了用修行 真成认贼将为子
 损法财 灭功德 莫不由斯心意识
 是以禅门了却心 顿入无生知见力

8 大丈夫 秉慧剑 般若锋兮金刚焰
 非但空摧外道心 早曾落却天魔胆
 震法雷 击法鼓 布慈云兮洒甘露
 龙象蹴踏润无边 三乘五性皆醒悟
 雪山肥膩更无杂 纯出醍醐我常纳
 一性圆通一切性 一法遍含一切法
 一月普现一切水 一切水月一月摄
 诸佛法身入我性 我性同共如来合
 一地具足一切地 非色非心非行业

- 9 弹指圆成八万门 刹那灭却三祇劫
 一切数句非数句 与吾灵觉何交涉
 不可毁 不可赞 体若虚空无涯岸
 不离当处常湛然 觅即知君不可见
 取不得 舍不得 不可得中只么得
 默时说 说时默 大施门开无壅塞
 有人问我解何宗 报道摩诃般若力
 或是或非人不识 逆行顺行天莫测
 吾早曾经多劫修 不是等闲相诳惑
- 10 建法幢 立宗旨 明明佛敕曹溪是
 第一迦叶首传灯 二十八代西天记
 法东流 入此土 菩提达摩为初祖
 六代传衣天下闻 后人得道何穷数
 真不立 妄本空 有无俱遣不空空
 二十空门元不著 一性如来体自同
 心是根 法是尘 两种犹如镜上痕
 痕垢尽除光始现 心法双忘性即真
- 11 嗟末法 恶时世 众生福薄难调制
 去圣远兮邪见深 魔强法弱多怨害
 闻说如来顿教门 恨不灭除令瓦碎
 作在心 殃在身 不须冤诉更尤人
 欲得不招无间业 莫谤如来正法轮

旃檀林	无杂树	郁密森沉	师子住
境静林间	独自游	走兽飞禽	皆远去
师子儿	众随后	三岁便能	大哮吼
若是野干	逐法王	百年妖怪	虚开口

12 圆顿教 勿人情 有疑不决直须争
 不是山僧逞人我 修行恐落断常坑
 非不非 是不是 差之毫厘失千里
 是则龙女顿成佛 非则善星生陷坠
 吾早年来积学问 亦曾讨疏寻经论
 分别名相不知休 入海算沙徒自困
 却被如来苦诃责 数他珍宝有何益
 从来蹭蹬觉虚行 多年枉作风尘客
 种性邪 错知解 不达如来圆顿制
 二乘精进无道心 外道聪明无智慧
 亦愚痴 亦小騃 空拳指上生实解
 执指为月枉施功 根境法中虚捏怪
 不见一法即如来 方得名为观自在
 了即业障本来空 未了应须还夙债
 饥逢王膳不能餐 病遇医王怎得瘥
 在欲行禅知见力 火中生莲终不坏
 勇施犯重悟无生 早时成佛于今在

13 师子吼 无畏说 深嗟懵懂顽皮鞞
 只知犯重障菩提 不见如来开秘诀
 有二比丘犯淫杀 波离萤光增罪结
 维摩大士顿除疑 犹如赫日销霜雪
 不思議 解脱力 妙用恒沙也无极
 四事供养敢辞劳 万两黄金亦销得
 粉骨碎身未足酬 一句了然超百亿

14 法中王 最高胜 恒沙如来同共证
 我今解此如意珠 信受之者皆相应
 了了见 无一物 亦无人 亦无佛
 大千沙界海中沤 一切圣贤如电拂
 假使铁轮顶上旋 定慧圆明终不失
 日可冷 月可热 众魔不能坏真说
 象驾峥嵘谩进途 谁见螳螂能拒辙
 大象不游于兔径 大悟不拘于小节
 莫将管见谤苍苍 未了吾今为君诀

注：每天背诵一段，背熟了再背下一段。争取2周内背诵出全文。

校对参考舒州梵天琪和尚《证道歌注》。（卍新纂续藏经 No. 1241）

放生仪轨

一、杨枝净水赞

杨枝净水 遍洒三千 性空八德利人天 福寿
广增延 灭罪消愆 火焰化红莲

南无清凉地菩萨摩訶萨（三称）

南无大悲观世音菩萨（三称）

二、持咒

大悲咒（三遍）。心经（一遍）。往生咒（三遍）。

三、启请（三请）

香花迎 香花请 弟子○○一心奉请、尽虚空
遍法界、十方常住佛法僧三宝。

四、忏悔（三遍）

往昔所造诸恶业。皆由无始贪嗔痴。

从身语意之所生。一切我今皆忏悔。

五、皈依（三遍）

皈依佛。皈依法。皈依僧。

皈依佛两足尊。皈依法离欲尊。皈依僧众中尊。

皈依佛竟。皈依法竟。皈依僧竟。

六、发愿（三遍）

众生无边誓愿度。烦恼无尽誓愿断。

法门无量誓愿学。佛道无上誓愿成。

七、称名（七遍）

南无多宝如来。南无宝胜如来。南无妙色身如来。南无广博身如来。南无离怖畏如来。南无甘露王如来。南无阿弥陀如来。

八、求愿

南无常住十方佛法僧：弟子○○一心求哀，仰愿十方三宝慈悲加持，怜悯护念。

愿所放众生，既放之后，永不遭遇网捕吞杀，获尽天年，速生净土。并愿捕生人等回心向善，顿悟三世因果，及生佛心性平等无二之理，解冤释结，救世救生，发菩提心，行菩萨道。

更愿放生弟子○○等，三障蠲除，福慧圆成，三学增上，行愿坚固，救护众生，常如己想，尽此报身，得生安养，广度有情，共证菩提。

九、念佛

南无西方极乐世界大慈大悲阿弥陀佛
南无阿弥陀佛（称念数百声后放生）

十、回向

放生功德殊胜行。无边胜福皆回向。
普愿沉溺诸众生。速往无量光佛刹。
十方三世一切佛。一切菩萨摩訶萨。
摩訶般若波罗蜜。

五戒诵戒仪轨

一、上香（三拜）

戒定真香，焚起冲天上。弟子虔诚，爇在金炉上。顷刻氤氲，即遍满十方。众生祈求，免难消灾障。南无香云盖菩萨摩訶萨。（三称）

二、礼佛（三称三拜）

南无本师释迦牟尼佛。

三、忏悔（三番三拜）

往昔所造诸恶业。皆由无始贪瞋痴。

从身语意之所生。一切罪障皆忏悔。（第一遍）

从身语意之所生。今对佛前求忏悔。（第二遍）

从身语意之所生。一切罪根皆忏悔。（第三遍）

罪从心起将心忏。心若灭时罪亦亡。

心亡罪灭两俱空。是则名为真忏悔。

四、诵戒（跪诵）

诸佛净戒难得闻。经于无量俱胝劫。

读诵受持亦如是。如说修行者更难。

今逢白（黑）月十五（四）日，我弟子○○，
谨于佛前诵戒。

第一、不杀生，是优婆塞（夷）戒，我弟子○○奉持。

第二、不偷盗，是优婆塞（夷）戒，我弟子
○○奉持。

第三、不邪淫，是优婆塞（夷）戒，我弟子
○○奉持。

第四、不妄语，是优婆塞（夷）戒，我弟子
○○奉持。

第五、不饮酒，是优婆塞（夷）戒，我弟子
○○奉持。

受戒易，守戒难，莫将大事等闲看，
浮囊渡海须勤护，一念差池全体残。
理胜欲，便安澜，把定从来生死关，
任他逆顺魔军箭，凛凛孤怀月影寒。

五、发愿（三番三拜）

众生无边誓愿度。烦恼无尽誓愿断。
法门无量誓愿学。佛道无上誓愿成。

六、回向

诵戒功德殊胜行。无边胜福皆回向。
普愿沉溺诸众生。速往无量光佛刹。
十方三世一切佛。一切菩萨摩訶萨。
摩訶般若波罗蜜。（三拜）

附注：每逢半月诵戒，白月十五日即农历每月十五；黑月十五（四）日，即农历每月三十（廿九）日。

施食仪轨

准备：

每于晨朝及一切时悉无障碍。取一净器盛以净水。置少饭糗及诸饼食等。以右手加器。

一、召请：

南无佛陀耶。南无达摩耶。南无僧伽耶。
南无本尊释迦牟尼如来。南无安住大地菩萨众。
南无一切龙天善神。愿以威神加哀护助。我今召
请十方刹土，尽虚空界，一切六趣，饿鬼有情类，
以三宝威神力故，悉至我所。

二、普召请真言（面向东方。七遍）：

ná mó bù bù dì lì qié lì duō lǐ
南无部部帝唎 伽哩哆哩

dá tuō yē duō yē
怛他誡哆耶



左按腰

右捻指

三、解怨结真言（三遍）：

ān sāntuó là qié tuó suō pó hē
唵 三陀啰 伽陀 娑婆诃



诵时结印，每遍真言诵完时，双手解开。

(行者尔时应当起大悲心而语之言：汝当善听。我今以此陀罗尼开汝咽喉。施汝清凉柔软快乐。欲令汝等自恣饮食甘露美味。)

四、开咽喉真言（七遍）：

ān bù bù dī lǐ qié duō lǐ dá duō yē duō yē
唵 步步底哩 伽哆哩 怛哆识哆耶

(诵此陀罗尼神咒满七遍已，观想诸鬼等以此咒力，咽喉通息，猛火息灭，无复痛恼，身心泰然。)



五、变食真言（七遍）：

ná mó sà wá dá tuō yē duō wā lū zhī dì ān sān bá là sān bá
南无萨缚 怛他识哆 缚噜枳帝 唵 三跋啰 三跋
là hōng
啰 吽

(咒器中食七遍已，泻着树下，观想此食充塞虚空，周遍法界，是时十方一切饿鬼，以陀罗尼威德力故，皆得食吃，亦不变化作脓血，亦无遮禁，自恣啖食，充足饱满，灭饥汤火，身体安乐，无诸痛恼。)



六、甘露水真言（七遍）：

ná mó sū lū pó yē dá tuō yē duō yē dá zhī tuō ān sū lū sū
南无苏噜婆耶 怛他识哆耶 怛侄他 唵 苏噜 苏
lū bō là sū lū bō là sū lū suō pó hē
噜 钵啰苏噜 钵啰苏噜 娑婆诃

（观想此水咒力加持，清净湛然，
周遍法界，令诸饿鬼咽喉自开，法
界众生一时皆得甘露饮食，诸鬼神
等充足饱满，欢喜无量。）



七、念四如来名（三遍）：


南无多宝如来。南无妙色身如来。

南无广博身如来。南无离怖畏如来。



南无多宝如来


左高，对肩弹指



南无妙色身如来



南无广博身如来



南无离怖畏如来

八、普供养真言（三遍）：

ān yē yē náng sān pó wā wà rì wā hú
唵。誡誡曩。三婆嚩。鞞日囉斛。



九、施无遮食真言（咒语七遍）：

早上：法力不思议 慈悲无障碍
七粒遍十方 普施周沙界

ān dù lì yì suō hē
唵 度利益 莎诃

中午：大鹏金翅鸟 旷野鬼神众
罗刹鬼子母 甘露悉充满

ān mù dì suō hē
唵 穆帝 莎诃

晚上：汝等鬼神众 我今施汝供
此食偏十方 一切鬼神共

ān mù dì líng suō hē
唵 穆帝陵 莎诃



右手放光

十、回向：

愿生西方净土中 九品莲花为父母
花开见佛悟无生 不退菩萨为伴侣

听经、背经的方法

上宣下化老和尚开示

世人一天到晚在竞争奋斗，不外都是为了吃饭、穿衣、财物、住处与名利，为这五件事颠颠倒倒，从朝至暮也没有一个真正休息的时间，虽然偶尔不上班做工，可是在家中就上电视班、电脑班、股票班、电影班、旅行班，做这种种事，也都是在忙忙碌碌中。万佛圣城的人也是忙忙碌碌，但所忙的事完全不同，在这里不为食、衣、住而忙，因为我们对于这些并不讲究，过得去就可以了，至于名利更是看得很淡。虽然我们也是很忙，但忙什么呢？为学佛、法、僧而忙，为修戒、定、慧而忙，完全是不同性质。

我们天天在这里研究经典，要特别专心注意，不要身在而心跑得不知去向。不要因为这个人讲法讲得不错，我就去注意；那个人讲得不好，我就心不在焉。总是在人我是非上用功夫，这样是爱憎心太重，是非好坏心太大，完全没有把它降伏。

听经要专心、至诚恳切，若是有人讲得不错，我要学习他哪个地方讲得好；有人讲得不好的，我更要去听，用妙观察智来观察他讲得对不对？合法不合法？而不是用识心来分别计度。对于任何人所说的一言一行，一举一动，我都要特别注意留心而不

空过，这样才能有所得，才能开智慧。开智慧不是一日一夜就成就的，而是朝于斯夕于斯，早晚都不间断地来学习，这样才会有所成就。

现在你们每个人都在读诵《楞严经》与〈楞严咒〉，要知道《楞严经》就是佛的真身，就是佛，就是法，就是僧，也就是戒、定、慧。你想恭敬佛、恭敬法、恭敬僧，先要恭敬《楞严经》。你想学戒、修定、发慧，先要学《楞严经》。佛法有八万四千法门那么多，可是《楞严经》皆已具足，不多不少，恰到好处。

所以我们应该学这部经，并且要背得出。学习的方法就是天天把你已能背得出的经文，重新温习一次。不要贪多或贪快，要天天温习一遍，才会熟能生巧，巧能生慧。千万不要舍近求远，向外驰求，这样只是在皮毛上打转转，而不能深入经藏，不会开智慧的。

那要利用什么时候来背经呢？一早起身穿衣服或漱洗时，都可以默诵经文。晚间上床睡觉，躺在枕上还可以默诵温习。白天在路上走路，或工作时也都可以默背，能这样连绵不断地用功，很快就会背熟了。读书方法有‘三到’——眼到、口到、心到。你的眼睛、口、心都应该专心一致于书本上。

又有‘三上’——路上、枕上、厕上，在这三上，正好背经。你们谁愿意用这种方法，就能把经背得很熟。各位可以试一试！

※ ※ ※ ※ ※ ※ ※

就好像我们新出家的果宁说：「唉！这〈楞严咒〉对我可是一个大障碍，我怎么样读也记不住。」你不要望洋兴叹，不要以为这是大海：「喔！这么多！怎么办呢？」我教你一个方法，你不要全读，你一句一句地读，一行一行地读；记得这一句，再读那一句。那一句记住了，再往下读；如果记不清楚，就不往下读，就单念这一句。

譬如「南无萨怛他。苏伽多耶。阿罗诃帝。三藐三菩陀写。」读多几遍，你把眼睛闭上，「哦！记得了！」再读第二遍，并加上第二句：「南无萨怛他。苏伽多耶。阿罗诃帝。三藐三菩陀写。南无萨怛他。佛陀俱胝瑟尼钶。」这么样地把它读到完，more、more、more（越来越多），就会背了，就能背得出。你不要贪多，你要是贪多了，就嚼不烂了。

※ ※ ※ ※ ※ ※ ※

你现在既然在我的门下出家了，我所收的徒弟一定要会背诵〈楞严咒〉和〈大悲咒〉；背不出来，我不收他出家的。所以今年暑假的时候，人人都要考试，要考〈楞严咒〉，也就是这个道理。你要是把〈楞严咒〉学会了，我认为你是有一点诚心；你若没有一点诚心，这个叫「楞半年」，一「楞」就要「楞」半年，半年才会。现在我限你三天的时间，无论如何要把它读会了；如果读不会，你这个和尚做得成做不成，这还不保险的。

附：华严字母 唱诵利人天

比丘尼恒良法师开示于台北法界佛教印经会

访问团这次法会活动主要有：诵念《华严经》和〈华严字母〉、拜《华严忏》。我相信你们每一位，往昔都诵过经，也拜过忏；但也许有些人从来没有唱过「华严字母」。为什么我们要唱念「华严字母」呢？因为它是《华严经》中的一部份。在〈入法界品〉中善财童子往南参访善知识，其中一位「善知众艺童子」教他〈华严字母〉。就好像《楞严经》中有〈楞严咒〉一样，是个秘法。诵咒有很多利益，没有办法用文字说得很明白。同样地，诵〈华严字母〉也有很多利益，没有办法说得很清楚。但是它是一种「法」，这种「法」是要给发菩提心的修行者或菩萨来修的。

诵〈华严字母〉另外一个原因是：这是上人亲自传授的。七〇年代在金山寺，上人请慧僧老法师教我们唱〈华严字母〉。当时他告诉我们可以也应该来修这个「法」。总而言之，修这个法门，一共有四十二个字母，各有不同的音义，我们就可以慢慢得到般若的智慧。观音菩萨有四十二手眼的法门，《华严经》也有四十二个字母的法门。如果有兴趣研究，可以参考上人讲述的《华严经浅释》。


我在此简单介绍一下唱诵这四十二个字母的利益。我们所唱的是最后四个字母，是照着梵文的音翻译成中文。梵文不同于中文，它有的字母在中文中是找不到的。第三十九个字母「也婆」，这二个音合成

梵文一个字。「也娑」的意义：诸法是空的。我们唱「也娑」字时，可以入名为「宣说一切佛法境界」的「般若波罗蜜门」。第四十个字母「室者」意义是不动。我们唱「室者」字，可以入名为「于一切众生界法雷遍吼」的「般若波罗蜜门」，所以我们能听到「室者」，就知道一切法是不动的。「法雷遍吼」，就是行法——实行佛法。唱第四十一字「佉」，可以入名为「以无我法开晓众生」的「般若波罗蜜门」。就是用「无我」的法，让众生明白。唱第四十二个字「陀」时，可以入名为「一切法轮差别藏」的「般若波罗蜜门」。

我刚说过这四十二个字母都是秘法，所以无法用我们理智的心去了解它的意义。但是当我们唱的时候，我自己有一种很特别的感觉，我相信每个人在唱诵这些字母时，都有特别的一种心情。如果各位想了解更多这个法门，可以去参考《大智度论》。在《大智度论》中：唱「佉」字，表示他是相当等觉菩萨位。唱最后一个字「陀」时，是表示到了妙觉位。所以在诵字母时，有善巧方便，能辩才无碍说法。

修一切的密法，大家都要很小心，不能随随便便地来修。一定要守戒，才能修。如果你真的修这个法门，你慢慢会开智慧。我感觉唱诵〈华严字母〉的音声非常庄严、美妙，古来大德对《华严经》、〈华严字母〉，非常恭敬，所以他们特别用这个很庄严的方法来修行。我觉得我们非常幸运能碰到这个法门，应该好好珍惜！

自皈依佛 当愿众生 体解大道 发无上心
 自皈依法 当愿众生 深入经藏 智慧如海
 自皈依僧 当愿众生 统理大众 一切无碍
 和南圣众



大随求陀羅尼(後唐·五代十國時期)
 (1978年,河南省洛陽市東郊出土)



普为出资读诵受持辗转流通者回向偈曰

愿以此功德 消除宿现业 增长诸福慧 圆成胜善根
所有刀兵劫 及与饥馑等 悉皆尽消除 人各习礼让
一切出资者 辗转流通者 现眷咸安宁 先亡获超升
风雨常调顺 人民悉康宁 法界诸含识 同证无上道

★ 为了便于大家理解背诵，【】内文字为科文表解。校对版本参考《乾隆大藏经》；音注参考上海佛学书局《常诵佛经生字注音手册》，仅供参考。

★ 疏漏之处敬请诸位师兄大德指正。建议指导请Email至：
76995261@qq.com；

电子稿下载：<http://iask.sina.com.cn/u/1691378180/ish>。